

北京圖書館 編

北京圖書館藏珍本
年譜
叢刊

第 125 冊

DUXIU.COM

北京圖書館出版社

□北京圖書館 編


北京圖書館藏珍本

年譜叢刊

北京圖書館出版社



第 125 册




道光十年庚寅七十一歲

正月二十五日

奏為甘州各廠孳生馬多廠窄碍難容牧請照歷屆
挑變成業辦理以裨馬政而節牧費恭摺奏

聞事竊查甘州提標孳生馬廠自乾隆元起原額兒
騾馬一千二百匹至嘉慶六年牧馬一萬八千餘
匹因孳生蕃息廠地狹窄經前督臣覺羅長麟奏
准挑變清廠後迄今截至道光八年該提標牧廠



現牧孳生馬一萬四千一百餘匹又提屬永固協
牧廠原領馬八十三匹除嘉慶六年挑變外截至
道光八年現牧孳生馬八百餘匹涼州協標牧廠
原領馬六百二十五匹截至道光八年現牧孳生
馬五千七百餘匹肅州鎮牧廠原領馬五百二十
七匹截至道光八年現牧孳生馬四千八百餘匹
以上各廠馬匹較之原額均增至數倍之多歷年
以來地不加廣而馬數日增以致擁擠傷殘兼之

水草不敷率多病斃所產馬駒亦俱碎小不堪經
牧若欲另擇廠地非缺水草即碍民田諸多窒碍
且每馬二十四匹應需牧兵一名每月靴鞋鹽菜
等項均係動

帑開銷以有用之兵丁而牧此殘廢之馬匹亦屬徒
滋糜費伏查道光九年正月間因西寧鎮牧廠狹
窄存馬過多經臣奏請於所牧馬一萬六千餘匹
內挑出口老病廢碎小馬六千餘匹變價充公業

經奉

旨准行在案今甘州各廠情形均同一律自應循照成
案酌請疏通俾歸核實現據甘州提臣胡超等查
明該提標馬廠內挑出二十歲以上口老傷病及
碎小不堪留牧兒騾馬四千數百匹永固協馬廠
挑出不堪留牧馬二百餘匹涼州協標馬廠挑出
不堪留牧馬二千數百匹肅州鎮標馬廠挑出不
堪留牧馬一千餘匹均擬估計變價充公裁撤牧

兵歸伍詳請具

奏前來臣覆加查訪均係實在情形合無仰懇

聖恩俯念甘州各標馬多厰窄實難容牧准照上次奏

准西寧成業挑估變價俾在厰馬匹不致擁擠可

期腴壯蕃滋而經牧兵丁亦可減撤歸伍差操節

省糜費實於馬政營務均有裨益如蒙

俞允當委府道大員分赴各該厰詳晰點驗核實估變

分別等第造冊送部發交地方官據實變價即令

解交藩庫報撥充餉不使稍有弊混謹

奏

同日

奏為懇

恩俯免口外梨貢以免擾累而廣

皇仁恭摺奏

聞事竊查口外梨貢向例每歲由臣衙門差派弁兵前
赴吐魯番採辦

進呈

國家撫馭外夷自應任土作貢即該回子等久經向
化亦俱樂輸方物藉表悃誠歷久以來遵行在案
第吐魯番相距內地數千餘里較為遙遠所辦梨
果向交該處伯克代為採購臣前在回疆稔知窮
苦回子咸以所藝梨果藉為生計每年內地差往
弁兵雖經嚴立限期飭令照額採辦毋許稍涉擾
累無如道途寫遠稽查難周其承辦之大小伯克

輾轉假手恐亦不免有藉端滋擾之弊伏思回疆甫就肅清現當整飭之時似應加意撫綏俾知感畏如以常年例貢少有擾累殊非所以仰體

皇上懷柔荒服之至意謹

奏奉

上諭楊

奏懇免口外梨貢一摺口外梨貢向例由

陝甘總督衙門差派弁兵赴吐魯番採辦進呈該處距內地數千餘里所辦梨果仍交伯克代為採購惟

念該處窮苦回子咸藉所藝梨果為生每年差往弁
兵雖經嚴立限期飭令照額採辦毋許擾累誠恐道
遠稽查難周其承辦之大小伯克輾轉假手亦不免
有藉端滋擾之弊著自本年為始將此項梨果貢即
行停止以杜滋擾而示體恤將此諭令知之欽此

二月初十日

奏為遵

旨覆議恭摺奏

聞事竊臣接准軍機大臣字寄欽奉

上諭楊

奏請籌款生息增設滿洲營餘兵額缺一

摺甘肅涼州莊浪兩營披甲例有定額成丁閑散衆
多挑補甲缺需時生計艱難每多曠廢自係實在情
形惟此時借款生息歲有定額而該丁等生齒日繁
養贍仍未能普徧殊非經久之策即以所奏調劑情
形而論涼州營成丁閑散一千三百餘名挑選餘兵
僅二百名莊浪營成丁閑散三百餘名挑選餘兵僅

五十名每名月給餉銀一兩不惟閑曠仍多且所給
餉銀有限焉能資其養贍所謂以君養人則不足不
若使其自資生計庶期經久可行着該督悉心酌議
此外有無長策行之久遠詳籌周妥具奏到時再降
諭旨將此諭令知之欽此跪讀之下仰見我

皇上養育生成

思周慮遠下忱欽感莫可名言伏查涼州莊浪二滿營
額設甲缺涼州共一千六百名莊浪共八百五十

名前因甲缺有限而閑散衆多奏請借款生息增設餘兵藉資調劑仰蒙

訓示周詳自應另籌長策第查該閑散等素無別項生計其平時養贍非藉父兄所得錢糧即望本身挑選甲缺近年生齒愈繁謀生愈絀惟其間弓馬去得漢仗可觀者頗不乏人此時若令其靜待挑缺則額少人多實不能徧敷養給如令其自謀生計則素無恆產又不能別有經營况旗丁以騎射為

重兼之駐防邊營尤當教養兼施更未便任其拋
荒本業臣現與涼州副都統臣伍爾袞布莊浪城
守尉臣五十九復又往返酌議並與藩司等體察
情形竊以此項閑散均係八旗有用子弟與其閒
居株守徒令曠日廢時似莫若增設餘兵尚可藉
資操練此外再四詳籌別無經久善策合無仰懇
天恩俯准仍照前請於涼州添設餘兵二百名莊浪添
設餘兵五十名先由成丁閑散內挑選充補與正

額甲兵一體差操所議每名月給餉銀一兩為數雖屬無多但已與綠營守兵餉項相等似亦可敷津貼况既挑餘兵遇有甲兵缺出即可先儘挑補其餘閑散又可挑補餘兵俟將來借款歸還後每年所餘息銀仍可發商生息陸續增挑如此源源接續以後生齒雖多而息項日增兵額亦因之日廣是普濟於一時者雖不足而收效於日後者則甚長似於旂營養育操防均有裨益如蒙

俞允所借銀款應請亦照前議在於涼州滿營庫存馬
價內提借銀五千兩再由司庫借銀二萬五千兩
莊浪滿營庫存馬價內提借銀二千五百兩再由
司庫借銀七千五百兩以上統共借銀四萬兩責
成甘涼道飭屬遴選殷實妥商分領每月一分行
息過閏加增按季交納臣仍與藩司另行嚴定章
程總不准稍有拖欠計每年除支放餘兵餉銀外
應得餘銀一千八百兩先歸馬價次還庫項務使

帑項仍歸原款而旗營獲有實濟庶以仰副
聖主垂久恩施之至意謹

奏奉

硃批兵部議奏欽此

三月二十四日

奏為恭報起程查閱甘肅營伍日期恭摺奏

聞事竊臣前奉

諭旨查閱陝甘兩省營伍當因甘肅各營官兵留防口

外各城尚未歸伍帶缺軍械亦未補製齊備奏明
隨後校閱先將陝省閱過各營情形於上歲節經
奏報在案茲查甘肅各營留防官兵已陸續撤回軍
械已漸次補製自應遵奉前

旨前往補閱現在秋審各案趕辦完竣別無緊要事件

臣擬於三月二十四日自省起程先赴莊浪涼州
甘州肅州次及西寧河州等處查閱滿漢營伍並
察看地方情形自當恪遵

聖諭認真簡校以期仰副

皇上修明武備整飭營伍之至意至臣衙門日行事件
飭委藩司方載豫代拆代行遇有要緊公事仍送
臣行署核辦謹

奏

四月初一日

奏為查閱莊浪涼州滿漢各營官兵情形恭摺奏
聞事竊臣前將查閱甘肅各提鎮營伍自省起程日期

業經

奏報在案嗣臣順道先將莊浪涼州兩處滿漢營伍
以次簡校旂幟軍械鮮明銳利馬匹臙壯足額演
習各陣步伐整齊鎗炮聲勢亦復聯絡籐牌跳舞
及馬上雜技尚屬可觀鎗箭中靶按例俱足分數
弓力在六力以上除涼州滿營堪列一等其莊浪
滿營並涼州協及所屬各營均堪列二等臣於閱
兵時擇其材技出衆者優加獎賞並予記名遇缺

拔補其技藝生疎年力尚堪造就或曾經出師著
績者分別勒限練習先據署涼州協副將周悅勝
稟稱該協標中營千總王增弓馬平庸右營千總
祁三秀年力就衰等情臣考驗屬寔應請

旨將該二弁勒令休致以肅戎行臣仍囑令該管將領
認真操練務期一律精純勿以閱伍已過稍有懈
弛仰副

皇上修明武備捍衛邊疆之至意臣校閱完畢即於四

月初二日由涼州起身前赴甘州肅州俟將該提鎮並所屬營伍查閱如何另行具奏再臣出省後於古浪縣涼州途間遇雪兩次沿路田土均已播種民情靜謐土番頭目咸來謁見詢悉該管境內亦俱安靖臣分別給賞諭令約束所屬人等各安生計莫不感激歡忻合併陳明謹

奏奉

上諭楊

奏查閱營伍一摺甘肅涼州協標中營千

總王增弓馬平庸右營千總祁三秀年力就衰俱著
勒令休致該部知道欽此

十五日

奏為查閱甘州提標肅州鎮標及所屬協路各營官
兵情形恭摺奏

聞事竊臣前將閱過莊浪涼州滿漢營伍緣由業經恭
摺

奏報在案嗣臣由甘州前赴肅州所有該提鎮標協

各營逐加校閱排演各陣並擡砲噴筒過堂烏鎗俱屬聯絡齊整鎗箭中靶足數分數弓力在六力以上馬上技藝對刀藤牌亦甚趨健旂幟鮮明軍械銳利馬匹臙壯足額均堪列為一等兵丁均各強壯間有弓馬軟弱者臣當即嚴飭該管將備勒限練習其年力壯技藝優者記名拔補分別獎賞以示鼓勵惟有山丹營遊擊馬安邦久病不愈難期供職甘州提標後營千總鮑得弓馬稍軟差操

尚知勤奮甘州提標後營把總張文喜弓馬平常
肅州鎮屬高台營千總金伏旺年逾六旬精力就
衰肅州鎮標右營額外外委馬漢兩膀麻木艱於
騎射臨水堡額外外委閔得身多疾病不能差操
經該提鎮呈請核辦臣考驗屬寔未便姑容應請
旨將千總鮑得降為把總遊擊馬安邦千總金伏旺把
總張文喜額外外委馬漢閔得一併勒令休致以
肅戎行臣仍諄囑提臣胡超總兵竇德並各該將

備勤加操演務使益勵精強仰副

皇上整飭營伍之至意至烏魯木齊巴里坤提鎮各標
並所屬營汛遠在口外歷屆查閱之年俱

奏明由烏魯木齊都統就近校閱臣現已咨明烏魯
木齊都統循照辦理臣拜摺後於四月十五日由
肅州起身前赴西寧河州俟抵該處查閱營伍如
何再行具

奏再臣自涼州起程經過甘州肅州所屬一帶地方

麥田均已佈種苗根暢發肅州地方於四月十三日得有微雨民情安貼堪以上慰

聖懷合併陳明謹

奏奉

上諭楊 奏校閱營伍一摺甘肅甘州提標後營千總鮑得弓馬稍軟惟差操尚知勤奮着降為把總遊擊馬安邦久病不愈千總金伏旺精力就衰把總張文喜弓馬平常額外外委馬漢艱於騎射閏得身多

疾病均着勒令休致該部知道欽此

閏四月二十日

奏為涼州綠營現有裁撥事宜該處滿營閑散一時
無缺可挑懇

恩仍准先設餘兵以資調劑而免曠廢恭摺奏

聞事竊照甘肅涼州莊浪二滿營前因甲缺有限閑散

衆多不敷挑補經臣會同涼州副都統伍爾袞布
等奏請籌款生息增設餘兵藉資教養嗣准部議

請照駐防滿營閑散酌補附近綠營兵缺之案於涼州莊浪二處綠營額兵內酌量馬步多寡均勻挑補二成所請增添餘兵之處應毋庸議等因奏奉

諭旨允准飭遵誠於調劑生計之中垂經久可行之策部議實屬至善惟查涼州綠營前經

欽差大臣那彥成於奏請添設喀什噶爾總兵案內改鎮爲協裁撤原設馬步官兵一千名撥歸督標及

循化保安起台等營募補並經臣奏明先儘空缺
事故退革各名糧陸續裁撥約計每年所出糧缺
多則不過百分少則數十分至速亦在七八年方
能完竣是涼州綠營既有應裁之缺則該處滿營
即無可挑之兵臣此次閱伍涼州莊浪目擊該滿
營閑散生計無資不堪艱苦以有用之人才徒使
曠廢非惟可憫亦且可惜臣再三籌計別無調劑
良策不得已惟有仰懇

聖恩俯准照臣前奏仍於涼州滿營添設餘兵二百名
挑補閑散每名照綠營守餉月給銀一兩所需餉
項即於涼州滿營庫存馬價內提借銀五千兩再
由司庫借銀二萬五千兩發商每月一分行息按
季交納核計每年除支放餘兵餉銀外應盈餘銀
一千二百兩陸續歸還原欸

帑項既無虛糜而於旂丁實有裨益俟涼州綠營裁
撥事宜辦竣再行遵照部議挑補十分之二如此

並行不悖似於滿營生計益就寬裕至莊浪綠營
雖無裁撥兵缺第查該營營分較小額兵僅五百
餘名每年出缺無多挑補正需時日可否亦

准照臣前奏一面借款生息添設餘兵一面遇有莊浪
綠營兵缺仍行陸續挑補俾獲兩事兼行之益謹
奏奉

上諭楊 奏涼州綠營現有裁改事宜該處滿洲營
閑散無缺可挑仍懇准設餘兵一摺前據該督奏請

籌款生息增設涼州莊浪滿洲營餘兵部議照駐防
滿洲營閑散酌補附近綠營兵缺之案令於涼州莊
浪二處綠營額兵內酌量馬步之多寡均勻挑補二
成其所籌增添餘兵之處應毋庸議茲該督以涼州
綠營現有裁撥之缺該處滿洲營即無可挑之兵莊
浪額兵出缺無多仍請添設餘兵復行陳奏國家經
費有常豈可屢議增添着仍照兵部原議辦理該督
所請着不准行欽此

同日

奏查閱西寧河州二鎮標屬官兵情形及臣事竣回
省日期恭摺奏

聞事竊臣前將閱過甘州肅州提鎮屬營伍緣由業經
繕摺具

奏在案嗣臣先後行抵西寧河州二處隨將該鎮標
屬各營官兵逐加校閱排演各陣馬步整齊擡炮
排鎗亦俱聯絡鎗箭中靶足數雜技跳舞趨捷器

械銳利旗幟鮮明馬匹臙壯足額均堪列爲一等
臣擇其技藝出衆者當場分別獎賞記名弓馬稍
軟者勒限勤加練習並囑各該鎮督飭各將備隨
時操演務期精益求精咸成勁旅其中惟先據該
鎮等呈稟西寧鎮標前營把總李天佑恩騎尉鮮
得明弓馬均屬平庸康家寨堡額外外委田玉順
年力就衰又河州鎮屬起台堡經制外委杜蓮臨
洮營恩騎尉劉珠精力俱形衰弱鞏昌營額外外

委牟金魁騎射甚屬平常呈請核辦臣考驗屬實
未便姑容應請

旨一併勒令休致以肅戎行至西寧河北蒙番現在甚
為安靜其各該頭人咸來謁見臣當加優賞並曉
諭恩威極知畏順河南野番亦俱斂戢其餘沿途
各土司以及河州撒拉爾回民情情形均臻安謐各
屬地方連獲雨澤麥田暢發民氣歡愉均堪上慰
聖廑所有西路營伍業已全行閱竣臣即於十八日回

省趕辦奏銷盤查一切事宜所餘寧夏延綏二鎮
標屬官兵容隨後再行前往補閱謹

奏奉

上諭楊

奏校閱營伍一摺甘肅西寧鎮標前營把

總李天佑恩騎尉鮮得明弓馬均屬平庸康家寨堡
額外外委田玉順年力就衰河州鎮屬起台堡經制
外委杜運臨洮營恩騎尉劉珠俱精力衰弱鞏昌營
額外外委牟金魁騎射平常均着勒令休致該部知

道欽此

同日片

奏臣前奉

諭旨回疆各城無業流犯每名賞給口糧俾令回籍嗣後凡有內地出關及由北路南來各人民由該管道廳查明寔係客商帶有貨物者方准給票出關其單身無業之人一概不准給票等因欽此仰見

皇上慎重邊方安益求安之至意自應遵照辦理惟查

新疆向分南北兩路其南路不過回疆數城北路則自烏魯木齊以至伊犁塔爾巴哈台幅頓遼濶且有道府州縣佐雜所管地方情形與內地無異向來除商賈而外無業民人多往謀生若一旦概行禁止殊於民生轉多未便臣查吐魯番所屬之托克遜地方為南路咽喉總口若於彼處設卡稽查無論內地出關及北路南來民人斷難偷越臣前准札隆阿來咨曾經咨明吐魯番領隊大臣查

照辦理並飭肅州於出關民人查明南北兩路分別禁止放行在案臣愚昧之見嗣後凡有內地出關民人除南路各城即遵新奉

諭旨查明飭禁外其赴北路者應請仍照舊例由肅州覓保給票放行倘出關後有潛赴南路者由吐魯番領隊大臣於托克遜地方派員設卡嚴行查驗但無照票即行拿究治罪如此分別辦理似於邊防民生均無窒礙謹

奏奉

上諭楊 奏內地出關民人請查明南北兩路分別
禁止放行等語嗣後內地出關民人除南路各城仍
遵前旨飭禁外其赴北路者着照舊例由肅州覓保
給票放行如有出關後潛赴南路者着吐魯番領隊
大臣於托克遜地方設卡派員嚴查如驗無照票者
即行拿究治罪欽此

五月十二日

奏為恭謝

天恩事竊閏四月二十一日由提塘賫到
恩頒

御製巡幸盛京詩一冊又

御製初集詩一部臣當即恭設香案望

闕叩頭祇領欽惟我

皇上帝矩鴻昭

神謨駿播

上儀躬舉申儆愼於

橋山

久道化成啟賡歌於

堂陞用是

摠孝思以續述抑且

發至德為文章銘

劍銘

弓展春露秋霜之慕曰謀曰肅泯冬寒夏暑之咨凡茲

文瀾學海之敷宣悉屬

法

祖勤民之憲典臣仰欽

舜孝載誦

堯文

光爛星雲十六字之心傳如揭

經同日月億萬年之景運常新所有臣欽感欣幸下忱

謹

奏

二十九日

奏為古城孳生馬廠報有倒缺馬匹請

旨查辦以歸核實恭摺奏

聞事竊照巴里坤古城濟木薩三處孳生馬廠前據巴
里坤總兵德克登額來稟以該三廠所牧馬匹孳
息繁多廠地窄狹每多擁擠損傷碍難容牧請照
歷次挑變成案酌量疏通臣因口外馬廠相距遙

遠其間實在情形無由深悉隨經札商烏魯木齊
都統英惠旋准查覆屬實並酌擬留變馬數於上
歲會同具奏奉

旨交部議奏嗣准部咨以請挑馬匹較多行令再加揀
選復據烏魯木齊提督哈豐阿巴里坤總兵德克
登額先後報稱聞古城西廠馬匹有存價抵補之
事隨即委員前往清查實因歷年馬多廠窄擁擠
不堪兼之水草不敷牧兵有限以致病斃殘傷陸

續倒缺共計短馬四千餘匹歷任經牧各員現存
有認賠馬價銀九千餘兩第為數不敷擬將歷年
專轄統轄以及經牧各員分攤賠補咨請查辦前
來臣查孳生馬匹例應按羣馭駒不容倒缺逾額
即為馬多廠窄水草不敷亦何致損傷如此之多
雖據稱歷任各員均有攤存馬價但既未隨時呈
報又不照數買補輒以所有價銀交相作抵則其
中致虧之由是否實因倒斃抑或另有別情自應

徹底清查且西廠而外尚有東廠三廠俱係一鎮
所轄一廠如此則其餘兩廠恐亦難保無短缺價
抵情弊亦須一律查明方免隱混事關牧政臣不
敢因奏請疏通在前稍涉回護惟該處相距內地
較遠委員前往需時應請

旨飭令新任烏魯木齊都統就近確查徹底根究俾歸
核實而昭詳慎謹

奏奉

上諭楊

奏古城馬廠報有倒缺請旨查辦一摺所
奏甚是口外古城西廠倒缺馬四千餘匹即因馬多
廠窄水草不敷致有擁擠損傷何至為數如此之多
雖據稱歷任各員現有賠存馬價但既未隨時呈報
又不照數買補輒以所存價銀交相作抵其中恐有
弊端且該鎮所轄共有三廠一廠如此其餘兩廠亦
難保無短缺價抵情弊事關牧政必須徹底清查着
交烏魯木齊都統成格就近確查將如何短缺之由

詳細究明據實具奏以免隱混而歸核實欽此

八月二十五日

奏為據報喀什噶爾復有安集延逆回入卡滋事傷
陷大臣官兵急請派兵前往救援臣現已一面咨
令提臣胡超先行帶兵出口一面親自馳赴肅州
照料調度並分別預調官兵候

旨遵辦恭摺奏

聞事竊臣於八月二十六日卯刻連接喀什噶爾葉爾

羗阿克蘇等處大臣八百里來文據報喀什噶爾
於本月初十十一等日突有安集延賊匪撲入卡
倫與官兵打仗滋事經帶兵巡卡之協辦大臣塔
斯哈追擊至明約洛地方遇仗陷歿並將札隆阿
所派帶兵策應之副將賴允貴一併被困勢甚危
急葉爾羗亦有不靖情形現經阿克蘇大臣長清
派令官兵三百名先往赴援均已一面具
奏一面咨調伊犁烏魯木齊等處官兵并囑臣亦即

選派內地官兵馳往合勒等情前來臣接閱之下
不勝駭異伏查回疆各城戡定未久乃安集延回
匪復敢入卡肆行滋事並傷陷大臣官兵已屬罪
不勝誅且來文聲稱探得賊匪尚欲困住喀什噶
爾大城由樹窩一帶直撲阿克蘇以截西四城官
兵後路如果屬實各城回衆性類犬羊反覆靡定
一經煽結更難保無表裏為奸情事現在喀什噶
爾攔城守禦既已勢在危急葉爾羌亦有不靖情

形阿克蘇等各城兵力無多且尚須防守本境地
方斷難兼顧自應調集內外官兵前往合勦方可
迅就肅清臣再三籌酌查伊犁烏魯木齊以及喀
喇沙爾所轄之土爾扈特霍碩特等處官兵相距
喀什噶爾葉爾羌等城較近臣現已飛咨趕緊即
照該處所調兵數各一二千名先行馳往救援臣
一面飛咨甘肅提督胡超挑帶官兵三千名並順
道再帶肅州鎮官兵一千名共四千名即令該提

督統帶即日先行出口一路迎探情形至阿克蘇再行相機進勦所遺提督篆務查寧夏鎮總兵中福堪以署理至中福所遺總兵篆務查署定邊協副將永孔阿相距較近堪以署理除分飭遵照外一面仍飛咨固原提督楊芳預為挑選官兵三千名并飭河州鎮挑選官兵五百名肅州鎮屬挑選官兵一千名西安鎮挑選官兵一千名漢中鎮挑選官兵五百名再咨會西安將軍挑選滿營馬隊

五百名均將一切軍械配帶齊全聽候調用再查
延綏鎮總兵郭繼昌前在回疆帶兵得力且熟悉
口外情形現亦一併札調前來以備派遣其所遺
篆務即委神木協副將劉允忠前往接署臣現駐
省城相距口外過於寫遠聲息較遲難以調辦現
將應需官兵糧餉一切事宜與藩臬兩司籌商料
理後即行挑帶督標官兵一千八百名並委員蘭
州道圖明額帶印起身馳赴肅州暫行駐劄查探

信息隨時隨事調度辦理請

旨迅賜簡派統兵大員前往督辦臣當隨同進勦至臣
衙門日行一切事宜即委藩司方載豫代辦其要
緊事件仍飛遞臣核明辦理俟續得信息情形應
如何籌辦之處再當隨時馳奏請

旨遵行謹

奏奉

上諭楊

由六百里加緊馳奏據喀什噶爾等處大

臣咨報喀什噶爾有安集延賊匪撲入卡倫與官兵
打仗滋事幫辦大臣塔斯哈追擊至明約洛地方遇
仗陷歿並將帶兵策應之副將賴允貴一併被困勢
甚危急葉爾羌亦有不靖情形等語回疆各城戡定
未久乃安集延回匪復敢入卡滋事並傷陷大臣官
兵現在喀什噶爾櫻城守禦勢在危急葉爾羌亦有
不靖情形阿克蘇等各城兵力無多且尚須防守本
境地方斷難兼顧自應調集內外官兵前往合剿以

期迅就肅清伊犁烏魯木齊以及喀喇沙爾所轄之
土爾扈特霍碩特等處官兵相距喀什噶爾葉爾羌
等城較近業經降旨飭令玉麟容安成格薩迎阿即
照該處所調兵數各一二千名派員迅速馳往救援
琦善選調四川官兵三千名馳赴肅州並令固原提
督楊芳甘州提督胡超迅速出口一路迎探情形至
阿克蘇再行相機進勦所有挑帶各鎮官兵及西安
滿洲營馬隊一切事宜均着照該督所請行甘州提

督着中福署理所遺寧夏鎮總兵着永孔阿署理延綏鎮總兵郭繼昌該督現已札調前往所遺員缺着劉允忠署理陝甘總督已降旨令鄂山馳驛前往署理着楊 將應需官兵糧餉一切事宜與藩臬兩司籌商料理後即挑帶督標官兵一千八百名並委員蘭州道圖明額等馳赴肅州即在彼駐劄妥辦後路事宜毋庸出關其軍需銀兩着即在甘肅封貯銀內先行動支應用將此由六百里加緊諭令知之欽

此

三十日

奏為交卸西寧辦事大臣印務日期恭摺奏

聞事竊照西寧辦事大臣印務前經臣

奏明暫行兼理茲新任大臣布彥泰已於八月二十
六日到省臣當將西寧辦事大臣關防委員送交
布彥泰祇領任事伏查西寧地方氣候早寒黃河
水勢現已日漸減落轉瞬即屆冰橋結凍之時所

有應行添派防河官兵臣前已檄飭河州西寧二
鎮照例預為挑選依期前往協同該處副將所派
弁兵分撥卡岸認真巡守其現在應辦一切事宜
臣已詳細告知布彥泰前往經理惟該大臣甫經
到任臣自當隨時隨事與之妥為商辦務期邊防
綏靖庶以上慰

聖懷謹

奏

道光十年庚寅

九月初三日

奏為續據各城具報口外賊匪情形現催派就官兵
先行分起出關並籌辦後路糧餉各事宜恭摺奏
聞事竊臣昨於八月二十六日接據喀什噶爾葉爾羌
等處咨報逆夷入卡滋事調請官兵前往勦援當
經臣一面飭派陝甘各營官兵預備聽調一面咨
令甘州提督胡超帶兵四千名先行馳往阿克蘇

相機勦辦及臣不日親赴肅州調度一切候
旨遵辦各緣由繕摺由驛馳奏在案連日續據各城飛
文具報該夷匪此次入寇賊衆甚多勢亦猖獗葉
爾羌迤西軍台俱被搶截道路不通喀什噶爾英
吉沙爾二城業已被圍十分緊急烏什卡外亦有
布魯特潛往窺伺雖經各該城竭力守禦無如兵
力無多竇難周顧催調官兵前往救援臣疊接來
咨不勝焦灼現在喀什噶爾既已被圍望援更迫

且阿克蘇烏什為進兵扼要之區尤不可稍有閃失惟內地相距南疆過於寫遠赴援萬里一時驟難應急臣現已飛催前經派定之肅州鎮標官兵一千名作為頭起先行出關仍令提督胡超速將所帶官兵三千名相繼進發並囑其一路查探情形趕赴阿克蘇會集各路援兵再行確探賊情審度兵力可否即為進勦抑尚須等待大兵隨時咨報情形相機商辦一面仍飛咨各城現在大兵業

已陸續前來務須鼓勵兵民曉諭回衆并力固守以安人心而弭內患第是師行糧從兵食最為急務指日內地官兵接踵出關且口外烏魯木齊現據提督哈豐阿報稱已挑派滿漢官兵三千五百名該提督統帶前往伊犁亦報稱派撥官兵二千名交領隊額爾古倫貴成等先行帶往並函稱尚擬續派官兵一千名吐爾扈特兵一千名民遣一千名叅贊容安帶領繼進此外尚有喀喇沙爾所

派之吐爾扈特霍碩特等兵亦即調集前進不久
官兵零集軍營應需糧料寔屬繁浩第恐各城一
時備供不及有兵無糧最為可慮是以臣現已飛
咨烏魯木齊都統成格循照上屆辦過章程迅速
籌備運供一面咨會各城亦即趕緊就地採買務
期互相濟用俾就寬饒並酌擬此次各城糧務內
地不必另派員前往即各歸各城自行辦理以臻
簡便其中惟哈密一處為出關總匯之區應後呼

前尤為繁要查該城大臣敦良前在陝省南山軍營曾辦糧務諸事熟練人亦精敏應請

勅令該大臣專司其事臣已派撥妥幹熟諳委負前往隨同經理可期妥協惟查各營進征官兵例支口食每名每日給銀五分上次軍需曾蒙

恩旨因甘省食物昂貴口外徑行戈壁買食愈難酌量加增每兵口內日給銀一錢口外日給銀一錢白麵一斤遵辦在案今此次官兵出口與上屆事同

一律且又將值寒冬合無仰懇

聖恩仍照舊案支給以示體恤至於應需餉項臣已飭
司籌撥銀二百萬兩委員分起解赴肅州以備轉
解各城暨官兵支領出關之用並委臬司惠豐帶
印前往肅州會同安肅道蓋運長將收撥糧餉雇
備車駝一切事宜設立總局妥為籌辦其所遺臬
司事務即委蘭州道圖明額代印兼署再查口外
各城現已紛紛請餉將來各路官兵進剿需用更

多甘省藩庫籌款無多斷不敷用應請

勅下部臣即於附近省分籌撥銀數百萬兩來甘接濟
並請先由陝西藩庫籌借銀五十萬兩趕緊解甘
以應急需臣現將一切軍需要務辦有頭緒肅州
已有臬司惠豐會同安肅道在彼經理臣因口外
軍情日益緊急拜摺後即於初八日帶印起程先
赴肅州暫住料理俟奉

聖諭簡署有人臣即一面交卸一面帶領督標官兵一

千八百名並河州鎮標官兵五百名亦即趕緊出
關接續胡超前進以資策應恭候

聖主簡定統兵大員應如何進剿之處臣當遵奉

諭旨隨同籌辦謹

奏奉

上諭楊

奏續報口外賊匪情形及催兵籌餉一摺

據稱已飛催前派之肅州鎮標兵一千名作為頭起
先行出關仍令胡超帶兵三千名繼發前赴阿克蘇

會集又口外烏魯木齊伊犁等處官兵亦已分起前進指日大兵雲集糧務最為急要該督業經飛咨成格查照上屆章程籌運並咨各城採買糧石此次糧務着各歸各城辦理內地不必另行派員前往惟哈密爲往來要道該城糧務着責成該大臣敦良專司妥辦仍由該督派委妥員前往隨同經理所有此次進征官兵口食着准照上屆之例每名口內日給銀一錢口外日給銀一錢白麩一斤用示體恤至應需

之餉項該督已由甘省撥銀二百萬兩解赴肅州並
即着陝西巡撫速發銀五十萬兩解往甘省應用現
經節次降旨調派各路官兵馳往戶部已奏派撥銀
一百萬兩現仍籌撥款項以資接濟甘省地方緊要
提督楊芳胡超均已出關着該督務遵前旨在肅州
料理一切事宜斷不可遽行出關是為至要現在需
用兵糧戶部奏請在口外各城酌量採買着陝甘總
督及回疆各該大臣酌量情形於阿克蘇附近各城

豫行採買以備供支一面迅速辦理一面具奏將此
由六百里加緊諭令知之欽此

同日片

奏再河州鎮總兵德克金布前因應行赴京

陸見經臣奏明委令鎮海協副將周佐勝接署鎮篆茲
值口外軍興之際該鎮地方番回錯處尤應加意
巡防甚關緊要且冬令尚有與西寧鎮防河會哨
各事宜該鎮德克金布辦理較熟應請暫緩入都

以重地方現在檄飭遵照並令周佐勝仍回本任
謹

奏奉

硃批是欽此

初十日

奏為遵

旨前赴肅州駐劄督辦後路事宜並飭令派定之陝省
滿漢官兵迅速起程復勦並委署提鎮篆務各緣

由恭摺奏

聞事竊臣於道光十年八月二十六日具

奏喀什噶爾復有安集延逆回入卡滋事等情一摺
茲於九月初九日自省起程前赴肅州途次接准
軍機大臣字寄本月初三日奉

諭旨一道臣跪讀之下遵即飛咨固原提督楊芳趕緊
帶領前派該標營官兵三千名即日分起起程與
先已帶兵出關之甘州提督胡超接續前進並令

遵

旨一路迎探情形到阿克蘇時會合伊犁烏魯木齊等處帶兵大員先將阿克蘇烏什二城扼要之區防堵周密再行確探賊情審度兵力相機妥籌勦辦其楊芳所遺提督事務自應趕緊委負接署查西安鎮總兵劉鳳翥諳練老成堪以飭委署理其所遺鎮篆並令就近先交陝西巡撫臣史譜暫行兼理以便即日交代起程一面仍飛飭現已奉

旨准派之西安滿營官兵五百名西安鎮標官兵一千
名漢中鎮標官兵五百名即交得力將備分起管
帶趕緊前往此時內地官兵已陸續進發川省之
兵不久自亦馳來所有口外各城應供糧料一切
倍關緊要臣前已逐處照調撥解銀兩分令先行
就地採辦寬為預備並咨准烏魯木齊都統成格
亦已遵照上屆運糧成案沿途安設台站委負經
理滾運當可濟用餉項銀兩臣前於籌撥之初即

已在於甘肅藩庫動支封貯等項銀二百萬兩解
赴肅州道庫以備轉撥口外各處之用此外雖尚
有前經奏明籌借陝庫銀五十萬兩現准臣鄂山
來咨業已分批起解不日即可運到惟刻下在在
需項寔屬浩繁應請

聖恩俯准照臣前奏飭部再行酌撥數百萬兩來甘以
資接濟臣現蒙

恩命帶領本標官兵駐劄肅州辦理後路事宜所有總

督關防即派委文武妥員賫送東路沿途呈交鄂
山接收署理至臣現在應辦一切文移事件已飭
藩司另刊木記委員送肅以便鈐用嗣後一應軍
需糧餉要務仍當與鄂山隨時隨事熟商妥籌具
奏辦理再蘭州道圖明額臣前奏派隨同赴肅辦事
嗣因改派臬司惠豐先行前往當經奏明委令該
道兼署臬篆現已留省同藩司方載豫總辦蘭州
軍需局務合併陳明謹

奏奉

上諭楊

奏遵旨前赴肅州駐劄督辦後路事宜並
飭令官兵迅速起程委署提鎮篆務一摺所有固原
提督員缺業經降旨令海凌阿署理總兵劉鳳翥俟
海凌阿到任後仍回西安鎮總兵之任至軍需經費
前已降旨令於該省封貯銀內動撥復經戶部兩次
奏准撥銀二百四十萬兩茲該督復奏懇飭部酌撥
銀數自係前降諭旨尚未接奉該省封貯銀兩應存

一百六十萬兩合之戶部奏撥之數共有四百萬兩
現在足數撥用該督即覈計應用之項隨時支給嗣
後戶部仍當籌撥以資接濟不致有悞要需至該督
應辦一切文移事件已頒發欽差大臣關防一顆交
該督鈐用所刊亦記即可撤銷將此由五百里諭令
知之欽此

十二月

奏為祇領關防日期恭摺奏

聞事竊臣昨於本月初十日將遵

旨前赴肅州駐劄辦理後路事宜並催令提督楊芳帶
兵起程及委署提鎮篆務各緣由繕摺具奏在案
茲於十一日在平番縣途次奉到

上諭以臣現駐肅州應辦文移

恩頒欵差大臣關防一顆以便鈐用當即叩頭祇領伏
思軍務以糧餉為先而籌辦以後路為重惟此番
事出倉猝一時籌備難周兼之接連上屆軍需之

後不特

國家帑項有常即口內口外之倉貯未盈營伍之軍
裝亦絀思維計畫應手殊艱臣惟有殫竭愚誠隨
事隨時會同鄂山設法商辦既不敢貽誤要需更
不敢稍糜浮費務期措置協宜以仰副

聖主委任之至意謹

奏

同日片

奏再臣正在繕摺間復奉

廷寄

諭旨以口外賊勢情形緊急飭令臣即催胡超迅速帶兵出口趕至阿克蘇與長清相機固守聽候諭旨不可冒昧前進等因欽此仰見

皇上慎重軍務籌算萬全曷勝欽服查胡超所帶官兵

臣前因疊接口外各城來信緊要隨經飛催並據具報已於本月初三日帶兵起程初七日出關提

督楊芳亦報初九日帶兵起程分起前進現奉
諭旨臣復又飛速行知胡超迅即趨程馳往阿克蘇遵

照

聖訓相機固守並令將一路迎探情形隨時具奏請
旨伏查阿克蘇為各城扼要之區大兵屯集之所必須
防守周嚴方可再籌進步臣前曾飛致容安哈豐
阿長清等此時兵力未厚後路未周官兵到該城
時切不可急於輕進務將阿克蘇烏什二城先為

防堵周密顧住後路再行查探情形妥籌辦理茲
查伊犁頭起額爾古倫等所帶官兵二千名已於
八月二十日起程容安繼帶官兵亦於是月二十
八日起程屈計日期刻下均已可抵該城烏魯木
齊之兵不久亦當繼到得此兵力足資捍禦是阿
克蘇烏什二城此時自可無虞堪以少紓

宸厯惟前路需兵正急楊芳甫經起程所有臣挑帶之
本標及河州鎮官兵均已先行赴肅臣現擬趕抵

該州即將本標官兵一千五百名河州鎮官兵五百名共二千名飭令總兵銜中衛協副將馬金魁帶領先行出口以便接續胡超藉資策應俟楊芳到肅臣再當面囑一切令其趕緊出關再行奏報再臣昨奉清字

諭旨本年來京朝覲伯克回子等回疆現在安集延等滋事該伯克等均有應辦事件且不無有護家之心飭令陝甘等省督撫查明該伯克等行抵何處即明

白曉諭仍着由驛旋回以示撫愛等因欽此 臣現已
遵

旨移行遵照合併陳明謹

奏

十六日准軍機大臣字寄道光十年九月初八日
奉

上諭前因喀什噶爾有安集延逆回入卡滋事已降旨
令楊 馳赴肅州督辦後路並照該督請調兵數

令其迅速派往救援飛飭胡超先行出口趕赴阿克
蘇相機進剿復派哈朗阿楊芳一併馳往本日據王
麟等馳奏南路情形緊急必須厚集兵力星速進剿
着該督即於陝甘兩省各營內再行酌量添派兵數
揀派諳練帶兵官員一面飭催星速前進一面奏聞
並飭帶兵官員一路偵探賊情加緊遄行不可稍有
遲悞將此由六百里加緊諭令知之欽此

十七日

奏為遵

旨添派官兵分飭星速出口赴勦恭摺覆

奏事竊臣前於平番縣途次奉到

欽頒欽差大臣關防並遵

旨飭催提督胡超趕緊馳赴阿克蘇相機固守聽候

聖諭及擬將臣所帶之督標河州官兵亦即派令相繼

出關各緣由於九月十二日具摺馳奏在案茲臣

於本月十六日行抵涼州府途次承准軍機大臣

字寄道光十年九月初八日奉

諭旨一道查陝甘兩省官兵臣前於接得口外咨報軍情之初即經奏請調派滿漢各營暨臣本標官兵共一萬一千三百名預備赴勦嗣蒙

俞准所請除胡超所帶之四千名業已先行出關其餘各營官兵亦即飛催陸續前往並因口外需兵緊急而楊芳甫經起程是以復擬將臣所帶先期分起赴肅之督標官兵內先派一千五百名同河州

鎮標官兵五百名共二千名派令總兵銜中衛協副將馬金魁即行帶領出口接續胡超前進俟楊芳隨後到肅再行催令出關以期節節策應聲勢聯絡茲奉

諭旨勅令再行添派官兵星馳前進臣復將陝甘二省各營兵額除口外各處屯防及西寧防河會哨等項差遣外通盤籌酌現擬添派陝甘二提屬官兵各一千五百名寧夏延綏二鎮屬各二千名肅州

鎮屬一千名西寧河州陝安三鎮屬各五百名西
安滿營五百名寧夏滿營五百名涼州滿營二百
名莊浪滿營一百名共計滿漢官兵一萬零八百
名現已分頭飛飭趕緊配帶軍火器械分別馬步
隊伍選派曾經出兵諳練之大小將備分起管帶
星速起程並令遵奉

諭旨出關後一路偵探賊情加緊進行不得稍有遲誤
以上陝甘二省前後統計派令出口官兵共二萬

一千八百名臣仍再一面飛催四川官兵亦即趕
緊前來相繼馳進俾資勦辦所有臣遵

旨添派官兵並令星速分起前往緣由謹

奏奉

上諭前因玉麟等馳奏南路情形緊急降旨令楊

於陝甘兩省各營內再行酌量添派兵數茲據奏現
擬添派陝甘二提屬寧夏延綏肅州各鎮屬及西安
寧夏涼州滿洲營官兵共一萬零八百名等語現在

各路調派官兵業經三萬有奇足敷勦捕除該督前
次奏調官兵一萬一千三百名仍飭令分起出關外
所有此次添派之西安滿洲營五百名寧夏滿洲營
五百名涼州滿洲營二百名莊浪滿洲營一百名均
着停其調派其陝甘二提屬官兵各一千五百名宣
夏延綏二鎮屬各二千名肅州鎮屬一千名西寧河
州陝安三鎮屬各五百名着暫緩起程令在各該營
預備調遣如業經分起前進即飭令各折回原營俟

長齡抵肅州後會同籌商再行的量奏調帶往將此
由六百里諭令知之欽此

同日片

奏再涼州莊浪二滿營所派之官兵三百名現在臣
行抵涼州當即面令署副都統協領德通挑派統
帶即日起程其所遺涼州副都統篆務查有該營
協領八十四堪以接署謹

奏

十九日准軍機大臣字寄道光十年九月十一日
奉

上諭前有旨令楊於陝甘兩省各營內再行酌量
多添撥兵數相即添派奏聞其前奏請調派各處之
官兵內西安滿洲營已挑備馬隊五百名着再於該
營內添調馬隊一千名預備調遣南路軍情緊急凡
各處調派救援官兵計可陸續趕到如逆賊聞大兵
將至紛紛逃竄即可相機進剿但東四城相距均不

甚遠現在賊勢猖獗萬一阿克蘇或有閃失關以內
不可無重兵駐劄楊務遵前旨駐劄肅州策應
一切毋庸出關將所帶本標兵一千八百名留於肅
州以壯聲威關外各州縣地方遼闊如有應行防堵
之處並着迅速督飭各該地方官設法小心防守毋
稍疎虞將此由六百里加緊諭令知之欽此

二十一日

奏為恭摺覆

奏事竊臣於九月十七十九等日途次疊奉

廷寄道光十年九月初十十一等日

諭旨兩道伏查口外糧務前因各城倉貯無多業經臣

奏明咨准烏魯木齊都統成格查照上屆章程安

台籌運並令各城再行就地採買以資足用今蒙

俞准臣仍當飛文分咨遵照趕緊妥辦毋稍絀乏至西

安滿營官兵臣昨奉

上諭勅令添兵赴勦已於陝甘二省續調官兵一萬八

百名內添派該滿營馬隊五百名連前調共一千
名均令迅速起程馳往業於本月十七日繕摺具
奏茲奉

聖諭現又飛咨西安將軍再行挑備五百名聽候調遣
並阿克蘇一城為南路進兵扼要之區斷不可稍
有閃失臣前曾飛致長清容安哈豐阿等務將該
城先為保住再籌進勦屈計伊犁喀喇沙爾等處
援兵此時早已趕到烏魯木齊之兵不日亦可會

集得此各路兵力該城自可無慮其前路西四城情形昨接阿克蘇轉准葉爾羌來信據稱喀什噶爾英吉沙爾兩城雖被賊圍尚俱固守葉爾羌官兵回子曾於上月擊退攻城賊匪並經該處阿奇木伯克阿布都爾滿派令伊子及得力伯克人等分帶回兵幫同官兵防堵各處要路甚為出力似此情形是各該城回衆現尚咸知効順並未為賊所誘不待此時可免內變之虞即不久大兵齊集

進勦一切堪期順手臣現又分催胡超楊芳並前
後所派之各營官兵一併接續加緊過往以便乘
機勦辦臣屢奉

聖諭勅令帶兵駐劄肅州策應一切所有挑帶之督標
官兵一千八百名現已遵

旨隨同留駐以壯聲威仍一面飭令關外各州縣如有
應行防堵之處亦即設法小心防守不致踈虞堪

紓

宸廕謹

奏

十月初三日

奏為臣馳抵肅州現辦一切事宜恭摺奏

聞事竊臣於九月二十一日在山丹縣途次將遵

旨復派西安滿營官兵五百名預備調遣並分催胡超

楊芳及各營官兵趕紮前往阿克蘇相機援勦各

緣由繕摺具

奏在案茲臣於九月二十七日馳抵肅州連日督同
軍需局司道查核收支軍餉催辦車駝馬匹一切
事宜正擬繕摺具奏十月初一日接到臣前於九
月初十日具奏之摺承准軍機大臣字寄九月十
八日奉

諭旨一道臣跪聆之下除飭知劉鳳翥欽遵外查此次
軍需餉項臣前於在省籌辦之初當與藩司方載
豫查明庫款動撥封貯銀一百六十萬兩又兩准

撥到新增經費銀一十八萬九千兩又朋合款內
存貯銀二十一萬一千兩共銀二百萬兩委員分
起解交安肅道庫收入軍需項下專供轉解口外
各城及口內辦理軍務之用嗣後因所需繁浩一
面

奏請酌撥一面臣與鄂山先後奏明兩次借調陝西
藩庫銀一百萬兩以資應用俟部撥軍餉過陝再
行扣留歸款茲查陝省銀兩雖已起解尚未到肅

甘省所撥之二百萬兩現截至十月初二日止共
已收到銀一百七十萬兩陸續分撥口外南北各
城並內地各屬及出關隨營糧台共已解發過銀
一百六十餘萬兩此外尚有烏魯木齊之滙兌商
民銀伊犁之請調經費以及各處之應找應解續
調續撥及口內供支兵需雇辦駝脚轉運軍火糧
餉一切等項欸目紛紜支用繁雜茲蒙

諭旨除飭部撥銀二百四十萬兩外仍當籌撥以資接

濟臣惟有督同肅局司道隨時收餉即隨時撥發仍於應行支用之中隨事詳籌力圖撙節既不敢遲誤要需尤不敢稍滋糜費務期實撥寔用仰副委任再查糧餉而外馱脚亦關緊要前奉

諭旨飭令籌商購辦查上屆山西陝西採買駝隻官為經理牽喂牧養未能得宜每多疲乏倒缺是以臣前飭甘肅素產駱駝之州縣設法廣為雇辦並恐或不敷用復商經鄂山行令阿拉善王嗎哈巴拉

再行協辦一萬隻以備撥用業經鄂山前已具奏
嗣因奉

旨添調官兵及

勅派京營吉林黑龍江等處勁旅兵數多則需駝愈廣
甘省一時添辦不及復又商同鄂山分咨山西陝
西二省迅再雇辦駝九千餘隻協濟應用亦經會
同具奏俟各處陸續解到即當隨時分別撥用至
於口外南路情形近據各城咨報賊勢雖屬緊急

幸就地回衆未盡從逆尚俱固守且葉爾羌擊賊
獲勝已挫其鋒惟疊接來文催兵速進現在伊犁
烏魯木齊及喀喇沙爾所派之土爾扈特等處官
兵均已接續會集阿克蘇約計兵力不下萬名如
有可進之機諒容安哈豐阿等自必先行援應以
解急圍倘兵數尚單不敷遣用則必等待胡超兵
到始能前進 臣昨又飛咨該提督趕緊馳往楊芳
現於二十九日到肅連日熟籌一切因其所帶官

兵起程在後出關較遲所有臣督標官兵不敢因前已奏明遵

旨留駐稍涉拘泥有悞進援重務是以再三斟酌隨將督標官兵選派一千六百九十餘員名並同河州鎮屬已到官兵五百餘員名共二千二百餘員名即交楊芳帶領於初三日趕緊先行出關馳往以便早到一日早得一日之用其楊芳原帶在後官兵俟遂起到肅仍即飭催繼進至於肅州應駐官

兵容俟續調兵到臣再當量為留駐另行奏

聞再臣前於交卸督篆後曾奏飭司另刊木記鈐辦文

案嗣於奉到

頒發欽差大臣關防後業已飭司止刊合併陳明謹

奏奉

上諭楊

奏軍務需用浩繁前經飭部撥銀二百四

十萬兩外尚需籌撥以資接濟着戶部速議具奏欽

此

十一月初二日

奏為遵

旨籌商緩調續派官兵並陝甘滿漢各營初調征兵現
已全數出關及肅州毋須再行留駐官兵各緣由
恭摺奏

聞事竊臣自抵肅州後將應辦後路一切事宜並節次
奉到

廷寄

諭旨均經會同鄂山熟商籌辦隨時具

奏在案惟查陝甘滿漢各營二次添派官兵一萬八
百名前奉

諭旨飭令分別停緩俟長齡抵肅州後會同臣籌商再
行酌量奏調隨經飛傳遵照止令回營茲長齡於
十月二十五日行到肅州當即遵

旨面商因口外南路賊情近據各城咨報喀什噶爾英
吉沙爾二城尚在固守葉爾羌又於十月初七日

擊獲勝仗審度情形現派進征各省官兵已共三萬有奇似可足敷勦辦所有前項止回添派官兵此時即可毋庸再調仍俟長齡馳抵軍營察看如尚需用再行隨時奏調長齡與臣酌商一切後即於二十七日起身出關至於陝甘各營初派進征官兵自九月初一日起截至十月三十日止共一萬一千餘員名均已全數供送出關其餘在後之京營四川東三省官兵不日亦可接續到肅仍當

逐起妥為照料飭令趨行趕緊赴勦伏查哈豐阿
所帶先進援兵計期刻下已可由和闐馳抵葉爾
羌該城於連次獲勝之後添此兵力聲勢益壯附
近賊匪自不敢再往窺伺胡超已於十月十六日
遵

旨趕赴阿克蘇所帶官兵啣尾亦到今已旬餘諒必與
額爾古倫等乘此事機知會哈豐阿分進夾勦殺
威一振當不難一鼓解圍所有各城應需餉銀駝

脚以及大營調用軍火關外接乏馬匹臣均已陸續接解籌備惟駝脚尚未解足軍餉更須接濟臣已與鄂山詳慎核籌奏辦總期無悞要需至爾州應駐官兵昨奉

聖諭俟續調兵到應留若干臣酌量辦理查臣前帶督標官兵一千八百名除

奏明已交楊芳帶去一千六百餘員名外下剩將備弁兵現在尚有二百餘員名一切差派已敷遣用

彈壓地方尚有肅州鎮標官兵其後到之兵即可
毋庸再行留駐是以臣均已飭令儘數前進以資
助勦謹

奏奉

硃批覽奏均悉欽此

初五日

奏為恭摺請

旨事竊臣前准鄂山來咨欽奉

上諭顏伯燾着馳驛前往肅州會同鄂山辦理軍需陝
西巡撫印務仍着史譜護理等因欽此查此次軍務
應辦後路事宜臣自八月二十六日接報至今即
督率省局肅局司道等逐一詳慎籌辦並隨事商
同鄂山具摺會

奏現在口外口內應需糧餉車駝馬匹軍火諸大端
及一切應行籌備事件均已辦有就緒今顏伯燾
奉

命前來是否將臣所領

欽差大臣關防移交收用會同鄂山辦理臣另候

賞派差使抑或仍與臣及鄂山公同督辦之處理合請

旨祇遵謹

奏

同日片

奏再帶領京營官兵之護軍統領阿勒罕係副都統
安福已於本月初三初五等日先後馳到肅州所

帶侍衛官兵亦已來齊沿途行走甚為安靜現經分給馬匹支領鹽糧分例鍋帳等項畧為安頓阿勒罕保定於初六日出關安福隨後亦即跟進至四川先調續調官兵昨據稟報現在陸續接踵行抵蘭州省城分起啟程不久均可到肅出關謹

奏

初六日會同署理陝甘總督鄂公山

奏為遵

旨籌畫並撥解伊犁經費銀兩日期恭摺奏

聞事竊臣等承准軍機大臣字寄欽奉

上諭據成格奏此次內地撥出口外駝隻除帶運烏魯

木齊並吐魯番以東餉鞘外其大營應調軍火各物

請由內地另為籌備駝隻運送不得再將協濟本處

駝隻直赴大營烏魯木齊現派進征官兵數千名所

用車駝均由本處直送阿克蘇將來內地征兵似可

照此辨理等語着楊

鄂山將成格所奏是否可

行迅速妥爲籌畫一面咨會一面奏聞再前據玉麟
奏請飭籌撥伊犁一年經費銀兩着楊 鄂山即

將該處一年經費如數迅速撥解以備應用將此由
六百里各諭令知之欽此伏查 臣等前因烏魯木齊
運糧駝隻不敷已飭局酌於內地雇買駝隻內撥
給托克遜喀喇沙爾庫車每處各駝三千隻以資
轉運當經

奏明在案此項駝隻專為協濟烏魯木齊供運軍糧

而設其大營應調軍火各物由肅州直至吐魯番
均由各地方丞倅州縣供運臣等已分飭酌雇駝
隻或雇回子車輛按城遞送其托克遜喀喇沙爾
庫車三處已派委西寧道湯鼎帶同委員分赴各
城籌運查托克遜距喀喇沙爾九站須撥給駝九
百隻喀喇沙爾距庫車十二站須撥給駝一千二
百隻庫車距阿克蘇九站須撥給駝九百隻已飭
局如數籌撥專運軍火各物倘再不敷即就近添

雇應用並嚴飭該道等總不得將協濟烏魯木齊
運糧駝隻濫用致誤兵糈至該都統

奏稱烏魯木齊現派進征官兵數千名所用車駝均
由本處直送阿克蘇將來內地征兵似可照此辦
理一節查內地征兵除酌撥駝隻尚可直送阿克
蘇外其甘省車輛多係木輪難以經久不損若趕
辦鐵腳車輛又恐糜餉費時且車夫等多因站長
路生裹足不前與烏魯木齊常赴回疆各城載運

貿易者不同倘強令前往誠恐沿途車損夫逃轉
致有悞軍行臣等與管局司道再三籌議又復往
返札商應請仍照道光六年章程按站倒換車馬
供送庶臻妥協再查伊犁調解道光十一年經費
銀兩已於六月十六日撥解銀十萬兩七月十三
日撥解銀二十一萬兩九月二十八日撥解銀十
萬兩十月初四日撥解銀十萬兩十一月初七日撥
解銀十萬兩又飛飭肅州軍需局迅速添解銀二

萬兩所有應解伊犁滿年經費銀六十三萬兩均已撥解清楚合併聲明謹

奏

十二月初五日

奏為現因口外前隊援兵已由英吉沙爾進抵喀什噶爾酌將四川吉林黑龍江官兵傳令暫緩前行聽候信息再定進止恭摺奏

聞事竊查初調四川進勦官兵三千名自十一月十三

日起至二十九日止均已陸續抵肅除出關外尚
未起程者一千餘名吉林頭二起官兵五百餘名
跟接亦到正在照料供送前進間適於三十日接
據哈豐阿等限行六百里函稱該提督等所帶官兵
於十一月初四五兩日在葉爾羌勦賊獲勝後隨
趕緊前進復在哈拉布扎什迤西地方又獲勝仗
已於十四日馳抵英吉沙爾解圍業經具
奏等語臣等聞信之下欣忭正深又據肅州軍台稟

報提督哈豐阿等於十五十七等日自喀什噶爾
發遞奏摺火板兩件過肅自係該城賊匪亦已廓
清重圍悉解臣等雖未續接來文尚不知喀什噶
爾如何詳細情形惟節據烏什及叅贊楊芳咨報
有喀什噶爾賊衆聞大兵進援先已逃逸之語此
時哈豐阿等業經到彼諒必賊踪潰散臣等核計
前途兵力連胡超楊芳等所帶已不下二萬如果
喀什噶爾等處逆氛已靖則在後之四川吉林黑

龍江官兵似可酌量減撤以節糜費且長齡前過
肅州曾經

奏明一俟前途報就肅清當將後起官兵量為停止
是以臣等再三籌酌即飛傳出關未遠之川兵以
及在途未到之吉林黑龍江官兵行抵何處暫於
何處駐劄聽候信息並一面飛速知會長齡如何
定議即行咨覆以便飭令進止俾免往返再揚威
將軍印信並叅贊大臣關防前於十一月二十二

日經侍衛巴清德等業已護送出關合併陳明謹
奏奉

硃批所辯是一俟長齡咨覆即行照辦欽此

二十二日

奏為恭謝

天恩事竊臣於十二月二十一日准鄂山來咨賚到
賞賜福壽字荷包食物等件當即望

闕碰頭祇領伏念臣材庸識淺承辦軍需方以報效

毫無正深刻迺荷

寵頒遠逮渥被

殊恩福自

天申衍箕疇之錫極齡由

帝子瞻

羲畫以延釐而且佩藻采於荷囊彰身有耀拜

尚方之珍品食

德無疆凡茲

稠疊之

鴻施倍切感惶於蟻悃臣惟有矢勤矢慎將後路一切
事宜核實妥辦盻邊籌之早歲遐陬永慶昇平際
首祚之宏開寰宇同登仁壽謹

奏

二十五日會同署理陝甘總督鄂公山
奏爲減撤官兵並酌撤駝馬緣由恭摺奏

聞事竊臣鄂山前接哈豐阿孝順岱來信內稱該提督

等自葉爾羌進兵連獲勝仗賊衆均已遠竄又臣
楊 接准楊芳來信陝西前後隊官兵足數勦
辦並辦理善後其餘隨後三省馬隊四川步隊可
以不必多用臣等當即傳知各官兵暫行駐劄一
面咨商長齡應否酌量減撤於具報黑龍江官兵
過蘭摺內

奏明在案茲於十二月十九日接准長齡傳牌內開
現在卡內業已肅清前路官兵足資鎮撫該將軍

業經具


奏飭令京營吉林黑龍江西安滿營四川官兵在於
何處接見傳知即由何處各歸營伍等因臣等現
已飛傳東西路各廳州縣趕緊雇備車馬照例妥
為供支即以黑龍江第五起官兵作為頭起依次
撤回並飭局咨司酌發備供銀兩分委妥員解送
各廳州縣具領應用免將倉庫各款藉口虧挪仍
照進征章程派委文武大員分段稽查照料以免

滋擾閭閻查現在留營之官員弁兵餘丁跟役統計不過二萬餘人所需口糧無多兼以各城肅清尚可就近採買運糧駝隻亦可酌裁臣等現已飛咨烏魯木齊都統及各城大臣並札飭台員糧員核計大營每日需糧之多寡各城相距道里之遠近解到雇買駝隻如數酌留總以足敷應用為率其有餘之駝雇者即時散遣買者即就近變價總期兵食足用而

帑項不致虛糜再查臣等前因籌備京營並吉林黑龍江官兵乘騎豫調陝西甘肅二省營馬五千一十匹解赴哈密並肅州棚養此時官兵既已減撤前項馬匹應即飭令解回原營以省買補而節喂

養
謹

奏



道光十一年辛卯七十二歲

正月十一日

奏為減撤官兵現已接續進關東旋並酌撤口外各
台委員以節浮費恭摺具奏事竊臣等前因喀什
噶爾英吉沙爾二城圍解賊匪竄逸當將在後之
四川東省官兵傳令沿途暫留候信再定進止奏

蒙

硃批所辦是一俟長齡咨復即行照辦欽此嗣接長齡

來咨以卡內業就肅清前路官兵足敷剿捕奏明
將京營東省及四川西安滿營等官兵全行止撤
臣等當即分別咨行各帶兵大員遵照折回仍按
起間日行走並令沿途照例妥為供夫及飛咨經
過各省一體預備以免遲悞茲查自上年十二月
十三日接准長齡咨會起至二十八日止所有已
未出關之四川吉林黑龍江等項官兵均已折廻
東旋京營兩起官兵亦於正月初四初五等日先

後進闖 臣等督率照料起程回京其在後之西安
滿營官兵約計開印前後當可全行過肅是此時
後起官兵俱已撤回口外各城糧台事務較減且
有烏魯木齊原派委員在彼足資經理昨接成格
薩迎阿等來信亦云內地委員已可減撤 臣等函
商鄂山將前派托克遜各台之道府正佐委員一
概撤回以節浮費其各台應辦糧運等事即交烏
魯木齊原派之員一手承辦俾歸簡妥現在長齡

已抵阿克蘇籌議善後自己得有把握尚應留兵
若干需餉若干如何定局俟咨照到日臣等擬將
應辦事務趕緊料理完竣肅州軍需局亦即裁撤
歸併蘭局造銷屆期再為具奏謹

奏奉

上諭楊 等奏減撤官兵已接續進關並酌撤口外
各營委員一招前因喀什噶爾英吉沙爾二城業已
解圍降旨令將續調官兵撤回歸伍茲據楊 等

奏四川吉林黑龍江等項官兵俱已折回京營兩起
官兵亦已先後進關其在後之西安滿洲營官兵計
已將全過肅州所有內地委員自應減撤着將托克
遜各台之道府正佐委員概行撤回其各台應辦糧
運等事即交烏魯木齊原派之員一手承辦其肅州
軍需局俟長齡咨照到日亦即裁撤歸併蘭州局造
銷以節浮費楊 鄂山顏伯燾均着各回本任欽

此

二月十一日

奏為裁撤肅州軍需局並

臣等遵

旨起程回任各日期恭摺具奏事竊

臣等現接正月十

一日具奏

批摺欽奉

上諭肅州軍需局侯長齡咨照到日即裁撤歸併蘭州

局造銷楊鄂山顏伯燾均着各回本任等因欽

此伏查肅州後路應辦事宜自上歲九月設局以

來迄今半載所有進征減撤各起兵差均已料理
過竣經收軍餉駝隻計軍興起截至本年二月底
止共收銀四百一十七萬餘兩除支發官兵分例
車駝腳價及

恩賞兵丁皮衣等銀七十餘萬兩其餘均撥解出口並
兌還烏魯木齊商民滙項現祇存銀七萬餘兩核
計已解大營及各城餉銀此時當可敷用昨准長
齡咨會善後事宜已奉

諭旨回京籌辦將來作何定局前途如需續調餉銀再
當隨時酌撥駝隻一項前後共收陝甘山西各處
解到雇買駝二萬六千餘隻隨時分撥各城各台
應用刻下烏魯木齊糧運已停需用較減業經分
咨各處核實的留其餘之駝卽照臣等奏准原案
分別雇買就近退變藉省脚價喂養之費其肅州
局撥刺及止回官兵交還駝二千餘隻亦已遣散
變價辦理全數完竣此時肅州軍需局已無應辦

要件臣等將一應文案賬目飭局逐細查明開造
總冊同原卷一併解省備銷餘剩銀兩存貯安肅
道庫備支卽於二月十一日將肅州軍需局裁撤
並令總辦之臬司惠豐及直隸甘肅委員書吏等
均各旋回以節糜費此後如有應撥餉項及未盡
事宜卽交安肅道蓋運長隨時轉解稟辦足資經
理仍酌留委員數人督備差委臣等料理完竣卽
已無事自應遵奉

諭旨各回本任 臣顏伯燾擬於本月十二日起程 臣楊

擬於十四日起程俟抵蘭州省城面晤鄂山

如有應奏事件再當另行會奏至 臣楊 現用

之

欽差大臣關防容俟回省後即專員赴京費繳合併陳

明謹

奏

三月初五日

奏為恭摺覆奏事竊臣於三月初二日接准軍機大臣字寄道光十一年二月十八日奉

上諭前因徵調各路官兵均經撤回諭令楊

鄂山

顏伯燾各回本任昨降旨將鄂山補授四川總督現
在肅州軍需局自己裁撤着楊 卽回陝甘總督

本任以便鄂山交卸起程至上屆蘭州局軍需報銷
係顏伯燾一手經理此次該處辦理報銷是否祇須
該督督率派出司道大員覈辦抑仍須顏伯燾在蘭

州辦理着楊

酌量據實具奏欽此伏查肅州軍

需局前經奏明業於二月十一日裁撤歸併蘭州
省局辦理顏伯燾卽於十二日先行馳回直隸藩
司本任屈計此時當已行過陝省所有此次軍需
事務均經省肅兩局司道隨事稟商籌辦一切欸
目均臻熟晰應用餉項亦俱查照定例及上屆准
銷成案核實支發各屬承辦兵差又係按起先行
酌發銀兩預備供支隨案報查別無牽混該司道

等半載以來俱係一手經理報銷事件不難按款
勾稽次第核辦查直隸地方緊要藩司事務殷繁
顏伯燾業經回任自可無須再行來甘以省往返
臣甫經旋省與鄂山面商意見亦屬相同此時前
路善後事宜雖未定局應撥軍餉一時尚難截數
而內地應銷各案現已先行趕辦臣當督率該司
道等催令各屬上緊造報逐一認真稽覈陸續題
咨務期實用實銷斷不敢稍任浮冒謹

奏奉

硃批嚴查浮冒不可忽畧欽此

同日

奏為恭謝

天恩事竊臣昨准鄂山咨會轉准吏部咨開欽奉

硃諭茲京察屆期陝甘總督楊身經百戰絕域宣

勞昇以封疆克勝鉅任着加恩交部議叙等因欽此

聞

命之下望

闕碰頭感愧靡既伏念臣一介武夫至愚極陋夙隨行

陣曾無出衆之勞繼典軍門尤乏寸長之效廼蒙

皇上殊施曠格

簡畀封圻任重才庸涓埃莫報省躬思過補救弗遑何

期考績三年復荷

優加甄叙

龍綸寵逮十六字勉寓於褒蟻悃懷慚方寸間感深以

泣臣祇有竭盡血誠辦理地方一切事務並訓勵
臣之子揚國楨實心實力勤慎奉公庶期世沫

鴻施仰副

生成之德同伸駑効稍酬

高厚之恩謹

奏

同日

奏為恭報微臣旋省接篆日期叩謝

天恩事竊 臣前在肅州將裁撤軍需局及遵

旨起程回任各日期繕摺具奏後卽於二月十四日就
道東旋茲於三月初二日抵省當准鄂山將總督
關防及

王命旂牌等項委員費交前來隨即恭設香案望

闕叩頭祇領回任伏念 臣荷蒙

委任督辦肅州後路軍需半載以來惟恐籌畫未周經
理未善五中兢惕寢饋交深茲因前路肅清局務

就竣仰邀

恩諭旋頒

飭卽仍回本任幸仔肩之甫釋復鉅任之重膺感悚下

忱尤難名狀查前路善後未定凱撤未完蘭州省

局尚有應辦事宜兼之口內口外報銷正須次第

核辦地方營伍尤應隨事整飭臣惟有勉竭庸愚

倍天勤慎以期無負厥職藉報

高厚鴻慈於萬一至臣前用之

欽差大臣關防現在封交赴京引

見便員甘肅提標左營遊擊楊得貴敬謹賚繳合併陳

明謹

奏

三月十八日

奏為請

旨事竊臣仰蒙

高厚畀任陝甘自道光八年春間入都

陸見回任後扣至本年春季已屆三年大馬下忱彌殷
戀

主亟思入覲

天顏恭請

訓誨惟現在回疆善後未定凱撤未完蘭州省局尚有
應辦事宜兼之各屬報銷正須趕緊督催核辦臣
甫經旋任未敢遽請赴京復事交卸可否暫行從
緩一俟善後大局定有端倪內地銷案亦可辦有

就緒彼時再當奏懇

聖恩趨叩

闕廷藉申戀悃伏候

訓示祇遵謹

奏奉

上諭楊

奏三年期屆現有應辦事件請暫緩入覲

一摺現在回疆善後章程未定凱撤官兵尚未過竣

該督甫經旋任所有一切應辦事宜亟須妥為料理

此時着毋庸前來俟善後大局已定內地報銷各案
辦竣彼時再行奏請候旨遵行將此諭令知之欽此

二十五日

奏為接辦盤查遵

旨認真辦理恭摺具奏事竊查甘肅各屬倉庫前於上

屆軍需之後經臣奏准辦理盤查以杜虧挪弊混

未及查竣又值口外軍興臣因帶兵前赴肅州候

旨當將業已查明之三十一州縣實虧銀二十三萬五

千餘兩及未經核定之十三州縣約虧銀一十五萬六千餘兩錢三千串文先行具奏俟全案查竣核其銀數分別叅追嗣奉

諭旨飭交署督臣鄂山確切詳查並經奏明將九年以後截至十年九月底止一併統行盤查以歸核實茲鄂山欽奉

諭旨來京請

訓盤查一事交臣認真辦理現准鄂山將歷次奉到

諭旨暨該督

奏稿並局中各冊籍文案卷宗移交接辦前來伏查

盤查一案前經鄂山在臣署設局提集各屬冊籍

文案卷宗遴派調甘辦理軍需之陝西漢中府知

府雲麟等九員於籌辦軍需之暇分手勾稽並委

甘肅鞏秦階道程德潤總司督辦數月以來已將

原查八年以前續查九年以後實虧各數目分造

清冊由鄂山覆核具

奏並檄委各屬員分路會同該管道府直隸州逐處
盤量分別封貯在案臣現在奉

旨接辦誠恐交卸之際或有觀望瞻徇現又嚴飭各道
府等會同委員逐細認真盤查如實貯內尚有匿
報續虧卽據實稟詳以憑彙案叅辦倘扶同隱飾
一經查出卽將該管道府直隸州一併嚴叅並將
查出續虧之項着落先行分賠以示懲儆至道光
八年預買兵糧現據各屬具報並無虧短誠如

聖諭難保該州縣不將積存額征之常糧或採買未支之兵糧互相指抵鄂山已檄飭各道府覆加確查並飭各委員於盤量時就近提訊倉書斗級研訊以歸核實臣現又嚴飭各道府委員等從嚴根究務期水落石出並與鄂山商定將來定案時如有承領道光八年預買糧價之員但有虧短卽先儘預買糧價着追以杜該員等朦混取巧之弊統俟委員等盤查完竣再行確核虧數彙案叅

殊 殊 殊

奏分別嚴辦勒追惟思此次盤查虧空多至三十餘

萬固由於地方瘠苦州縣不肖而臣未能先事防

慮咎實難辭實深愧悚因念致虧之源必有積弊

若積弊一日不盡則虧源一日不清臣此言見卿之於錢穀事

誠心

宜素未諳練現就臣心思所到與鄂山體察情弊

忠心務須勉力為之

酌定杜虧章程不敢存一毫自是之心尤不敢有

一毫袒護之念總期盡除積弊永杜新虧以仰副

我

皇上委任矜全之至意至甘肅省實屬各州縣積蠹


臣於上次抵任後即飭司嚴禁近年來雖無此種
名目第恐日久弊生防維亦不可不密現在亦與
鄂山悉心酌議專條俟商定後統入杜腐章程具

奏謹

奏奉

硃批卿之公誠朕所素知總要細心秉公不

蠹役有所欺蒙也欽此



道光十一年辛卯

四月初八日會同西寧辦事大臣恒公敬

奏為籌添蒙古兵數分布各卡隨同官兵防堵接時


操練可期振作事竊臣恒敬前據右翼正盟長郡

王恭木楚克集克默特稟稱青海各旗原派駐防

蒙古兵丁為數太少不敷分布懇請加添以資防

堵等情當經臣恒敬擬期出口查辦附片奏

聞在案茲臣恒敬於三月十八日查議事竣回署十九



日承准軍機大臣字寄道光十一年三月初八日
奉

上諭據恒敬奏察漢托洛亥地方駐防蒙古官兵五百
名向係分作四班按四季輪流更換茲據右翼正盟
長郡王恭木楚克集克默特稟稱兵數太少不敷分
派請將原派蒙古兵五百名分作兩班一班二百五
十名以五十名遞送文報外其餘二百名隨同官兵
操練等語此項官兵果能認真操練將來技藝嫻熟

該蒙古藉資捍衛足以自強豈不大有裨益現在恒
敬業已前往察漢托洛亥地方着察看情形是否可
期日久得力會同楊 酌議具奏將此諭令知之

欽此咨會臣楊

商辦前來仰見我

皇上策勵蒙古使其自強藉資捍衛之至意曷勝欽服

臣恒敬此次出口赴察漢托洛亥會集各王貝勒
貝子公台吉等面議添兵除郡王恭木楚克集克
默特現丁父憂並年班台吉二員未到外其餘正

副盟長王貝勒貝子公台吉等均先齊集成稱我
們青海各旗從前每年派兵總須千名自行防守
屢被番子搶掠嗣蒙

大皇帝格外

天恩不惜帑金築城安兵常年防守所以我們各旗纔
得享受

昇平之福前議駐防蒙古官兵每班一百二十五名
除遞送文報兵五六十名外其餘之兵向隨盟長

等在察漢托洛亥城西駐紮我們世受

大皇帝養之恩不能自禦番匪捫心自思實有難安
惟有懇恩加添兵數得以隨同官兵防堵時加添
練不特自相捍衛亦可少圖報効等情臣等查前
議駐防該蒙古兵每班一百二十五名為數較少
且正副盟長閒居城西毫無應辦公事逐商同將
前議蒙古兵五百名分作兩班每班二百五十名
分安八卡各准馬十五匹以一年更換至期正副

盟長輪流挑選精壯兵丁並配帶鮮明器械前赴
防所交營員點收後卽將班滿之兵飭令各回原
牧盟長亦卽在本旂就近專理旂務以歸核實而
免廢弛至分卡各兵照舊責成扎齊魯克齊章京
等管帶仍派官兵二三十名督率防堵按期操練
不惟技藝易熟且年年更換各旂歲增諳練之兵
膽氣旣壯可望自強自衛第兵數加多費用必增
亦不得不為之籌計查各旂應需口食向遵章程

均係在城領票採買糧茶運赴牧所轉給該兵往返運脚需費繁多計每兵口食羊茶炒麵馬匹等項月需銀二兩七錢八分合計每歲共銀四千一百七十兩零今臣等酌議將該兵應需口食每兵每日額定銀三分每月計銀九錢令該盟長等將此項銀兩按季先期交察漢托洛亥駐防副將等官就近代為採辦糧茶以節往返之費蒙古兵丁向用熟食計每兵每月需銀七錢有奇其盈餘之

數分給該兵作為零用再查該兵乘騎馬匹每匹
每月需銀一兩今兵數既加馬匹費用不無稍多
今議定每年派步兵一百三十名馬兵一百二十
名新舊減去馬一百三十匹計每歲節省銀一千
五百六十兩如此變通是兵數雖加而用費仍屬
無增再蒙古向以牲畜合算羊一百隻以上者方
派兵差數年來並未清理所派兵數亦與舊章稍
異辦理實有未善今已飭令該正副盟長等俟本

聞請

年五六月間清查後或能再添兵數另行核議奏
旨此後蒙兵技藝漸臻嫻熟可期得力巡河之兵亦可
隨時量減以節經費現在該盟長帶到蒙古兵四
百名內挑選得年富力強者二百五十名內執持
烏鎗堪用者二百名無鎗者五十名 臣恒敬會同
西寧總兵官舒通阿捐給烏鎗五十桿以資應用
飭令副將馬鳴謙於四月初一日已將該兵分安

各卡訖謹

奏

同日片

奏再查每年派兵防守黃河計長八百餘里初定章程時歲額防兵一千名於夏冬二季派官兵三百餘員名大遊巡二次六七八九等月派官兵三四十員名小遊巡數次嗣因河北肅清經費不敷將大遊巡次第裁撤冬令黃河結凍加派防兵五百

名西寧河州二鎮巡河兵二百名共七百名分布
防守歷年以來經派防各員體察情形尚難周顧
每年河開撤兵後派防所兵四五百名在於沿河
水勢平淺扼要處所設卡防範六七月間更恐賊
番鳧水偷渡尤須加添官兵方敷巡察惟是防兵
分安各卡口食運費在在必需臣恒敬此次巡查
詢據派防各員僉稱此項用度因格於舊章未敢
據實呈報向年若添巡河兵僅數十名所有應支

口糧由將備千把等官各按分例多寡分攤如兵
添至百名歷次稟明由總督籌款捐辦查捐數雖
屬無多均非經久之計臣等細加核算此項設卡
官兵每年夏秋二季總須六百餘名至冬季更須
添派巡河之兵其應需口食運費各項除每歲額
定經費外非酌增銀一千兩實難敷用

國家經費有常曷敢輕議加增第該處巡防關要不
得不熟計深籌以期經久臣等再三商酌應請於

司庫歸併兵餉數內撥銀一萬兩發商生息每年
所得息銀一千兩以補不足藉免將弁賠累再每
年防河兵丁於四十月分作兩班更換查十月正
當防河吃緊之際未便更易生手並請嗣後統歸
四月一班更換以資得力謹

奏奉

上諭楊

等奏籌添蒙古兵數分布各卡隨同官兵

防堵按時操練一摺前據恒敬奏請將察漢托洛亥

地方原派蒙古兵丁分作兩班除遞送文報外其餘
之兵隨同官兵操練降旨令恒敬察看情形會同楊
酌議具奏茲據奏籌添兵數隨同官兵防堵操
練可期得力着照所請將前議蒙古兵五百名分作
兩班每班二百五十名分安八卡各准馬十五匹以
一年更換至期正副盟長輪班挑選精壯兵丁並配
帶鮮明器械前赴防所交營員點收後即將班滿之
兵飭令各回原牧盟長亦即在本旗就近專理拮務

以歸核實而免廢弛至分卡各兵照舊責成扎齊魯克齊章京等官帶仍派官兵二三十名督率防堵按期操練所有該兵應需口食每名每日額定銀三分每月計銀九錢令該盟長等將此項銀兩按季先期交察漢托洛亥駐防副將等官就近代為採辦糧茶以節往返之費蒙古兵丁向用熟食計每兵每月需銀七錢有奇其盈餘之數分給該兵作為零用至蒙古向以牲畜合算羊一百隻以上者方派兵差數年

來並未清理所派兵數亦與舊章稍異辦理實有未善現已飭令該正副盟長等候本年五六月間清查後如能再添兵數另行議奏請旨此後蒙古兵技藝嫻熟即將巡河之兵隨時量減該大臣等務當遵照新定章程認真操練俾技藝嫻熟該蒙古藉資捍衛不可視為具文仍致有名無實至另片奏防兵分安各卡口食運費向因格於舊章未敢據實呈報歷係分別籌款捐辦本非經久之計現議設卡官兵應需

口食運費各項除每歲按定經費外非酌增銀一千兩不能敷用自係實在情形着准其於司庫歸併兵餉款內撥銀一萬兩發商生息每年所得息銀一千兩以補不足其防河兵丁向係於四月十月分作兩班更換十月正當防河喫緊之際未便更易生手嗣後着統歸四月一班更換欽此

初八日

奏為現在口外需駝減少擬將阿拉善王所進駝隻

請

旨賞還以示體恤事竊查此次軍興之初阿拉善王瑪

哈巴拉曾

進駝二千隻於奉

旨賞收後由肅州撥解出口以為烏魯木齊一路滾運

軍糧之用現在各台糧運已停需駝減火節據烏

魯木齊等處來文所有餘駝均照臣與鄂山等

奏准原案分別雇買遣散變價查上屆軍需阿拉善

王瑪哈巴拉呈

進駝隻事後蒙

恩賞還在烏魯木齊變價駝內撥給以示體恤在案此
次事同一律且烏里雅蘇台蒙古所進之駝業已
奉

旨賞還所有該王前進駝二千隻現已無所需用可否
仰懇

慈施仍照上屆卽於烏魯木齊所收變價駝內如數

賞還益昭我

皇上矜恤蒙古臣僕俾裕生計之至意如蒙

俞允臣當移咨烏魯木齊都統照數撥出並行知該王
派人前往自行收領謹

奏奉

上諭楊 奏請將阿拉善王所進駝隻賞還一摺此
次軍興之初阿拉善王瑪哈巴拉進駝二千隻由肅
州撥解出口現在各台糧運已停無所需用本月初

七日據成格奏各城前後截止駝隻除雇駝隨時遣散外其進買之駝在吐魯番者現有四千數百隻已過哈密未到吐魯番者一千餘隻業經委員解交迪化州收管變價所有阿拉善王瑪哈巴拉呈進之駝二千隻已明降諭旨卽於此項駝隻內如數撥去賞還令成格飭知該王派員赴烏魯木齊收領矣該督此奏想未接到成格咨照計成格接奉前旨自當遵照辦理該督卽一體欽遵可也將此諭令知之欽此

同日片

奏再查此次軍需口內口外供應官兵動用一切銀
糧欸項紛繁亟應查辦報銷以歸核實臣回任後
即將蘭州軍需局於道光十一年三月初十日改
為報銷局督催司道委員等將一應用欸分門別
類趕緊逐案查辦陸續造冊題銷謹

奏

二十七日

奏為遵

旨覆奏事竊查前准部咨欽奉

諭旨御史邵正笏奏內地奸民種賣鴉片烟貽害民生
請旨飭查嚴禁一摺所奏甚是鴉片烟流毒最甚向
係產自外洋奸商夾帶銷售徧行內地屢經嚴行飭
禁茲該御史奏近年內地奸民竟有種賣之事浙江
如台州府屬種者最多寧波紹興嚴州温州等府次
之有台漿葵漿名目均與外洋鴉片烟無異大夥小

販到處分銷地方官並不實力查禁以致日久蔓延此外如福建廣東雲南亦皆種賣有建漿廣漿芙蓉膏等名目似此紛紛種賣若不禁止盡絕將來必至傳種各省不特貽害善良更屬大妨耕作着各省督撫嚴飭所屬確切查明倘有奸民種賣責成地方官立即究明懲辦並將應如何嚴禁之處妥議章程具奏如所屬實無種賣者亦着確切查明據實覆奏總期認真查辦淨絕根株若日久視為具文仍致有名

無實一經發覺惟該省督撫是問凜之欽此伏查甘
省地處極邊山高土冷非如南方肥燠之地易於
種作烟漿且風氣較醇民間瘠苦素鮮食販鴉片
之人惟近年各處蔓延誠恐外來商旅夾帶偷銷
不特為害民生抑且有闕風俗臣向飭地方官及
各處稅口凡有此等違禁之物必須嚴事稽查犯
則必懲以杜來路茲蒙

訓飭諄諄復又剖晰利害通行出示曉諭並與藩臬兩

司酌議章程飭屬一體實力奉行查禁按季稟報
倘敢視為具文一經查出卽當隨時叅處務使清
源截流閭閻益臻淳厚以期仰副我

皇上正俗教民戒靡返樸之至意除俟年終查取各道
府出具所屬並無種賣鴉片烟切實印結遵照新
奉

諭旨另行具

奏外為此恭摺覆

奏並將所議章程四條繕具清單敬呈

御覽謹

奏

謹將甘省查禁鴉片烟章程繕具清單恭呈

御覽

一嚴禁廣種罌粟也查罌粟花到處皆有甘省向無收漿熬土之事但此方既已流傳內地難保將來不傳入甘省民間趨利若鶩不可不預為之防除

民房隙地栽植無多止圖觀玩者毋庸查禁外其
有將成段之地廣種罌粟卽恐有收漿熬土之漸
應責成地方官嚴行查禁以杜其端

一杜絕烟土來路也查烟土俱係來自外省應責令
東南二路之入境首站及設有稅口之各州縣認
真嚴密稽查一經拿獲先究其從何處入甘經過
何處稅口卽將失於查察之州縣叅處倘胥吏人
等有得賄故縱情弊照例從嚴懲辦仍禁止借端

滋擾致累行旅

一 禁止修製烟具也查服食鴉片烟必有烟具此等器皿本非民間常用之物除喫烟之外再無可用之處販賣製造應照賭具之例辦理其有將烟具携出修製者許匠工據實出首量予獎賞

一 責成家長約束也查鴉片烟之為害人皆知之官禁其民父兄卽當禁其子弟同居一室更不得諉為不知應出示曉諭民間子弟如有販賣買食者

卽當奉法禁治倘溺愛姑容一經發覺將家長照不能禁約子弟為竊之例治罪奉

上諭楊

奏遵旨查禁鴉片烟章程開單具奏據稱查明甘肅省現在尚無將罌粟花熬烟販賣之事惟成段地畝栽種罌粟恐致有收漿熬土不可不嚴示創懲以防其漸着責成地方官認真隨時查察如有違禁廣種罌粟卽照新定之例從嚴懲辦倘地保兵役得賄容庇俱治以應得之罪地方官查拏不力分

別失察故縱叅辦其外來商旅夾帶偷銷責令該省
東南二路入境首站及設有稅口之各州縣嚴密稽
查一經獲犯根究販賣來路暨經過稅口即將失察
之州縣故縱之胥吏嚴行叅懲不得藉端擾累行旅
至製造及販賣鴉片烟器具着照賭具之例懲辦其
有將烟具携出修製者許匠工首告量子獎賞並出
示曉諭責成家長約束倘同居子弟有販賣買食者
別經發覺除本犯治罪外着將家長照不能禁約子

弟為竊之例治罪仍令各州縣按季稟報責成該管
道府於年終出具所屬並無種賣鴉片烟切實印結
詳報該督於每年年終彙奏一次務當實力查禁杜
絕弊端不可日久生懈視為具文致干重咎欽此

七月初九日

奏為撥解軍餉數目恭摺覆奏事竊臣接准軍機大

臣字寄道光十一年六月初九日奉

上諭據長齡等奏喀什噶爾葉爾羌阿克蘇烏什等處

現駐官兵月需餉銀及採買糧料價值分運腳費計自五月起至年底止共需銀一百五十四萬七千餘兩除移咨陝甘續調銀五十萬兩外尚需銀一百零四萬七千餘兩應預為籌備着楊

卽於前奏各

省解到存留藩庫軍餉項下照數撥解阿克蘇以資接濟至長齡等請勅部籌撥銀二百萬兩解貯甘肅藩庫以備就近撥用已交戶部速議具奏俟此項銀兩陸續解至甘肅着隨時存貯藩庫備撥將來善後

事竣所餘銀兩着儘數撥歸甘肅司庫封貯原款將
此諭令知之欽此伏查口外大營軍餉自軍興起至
裁撤肅州軍需局之日止蘭肅二局共撥過阿克
蘇局及交隨營糧員帶解銀二百一十一萬兩肅
局裁撤後交存安肅道庫並蘭局三次撥解統計
道庫存貯銀二百二十二萬八千五百餘兩內除
由道撥發烏魯木齊滙兌商民並伊犁庫車等處
各項銀兩外又四次共撥阿克蘇轉解軍營銀八

十萬兩核計道庫現尚存銀八十萬三千餘兩今
長齡等奏調喀什噶爾等處自本年五月起至年
底止共需銀一百五十四萬七千餘兩除由安肅
道已先撥過銀八十萬兩茲再將道庫現存銀八
十萬三千餘兩全數撥往核計所調之數已屬有
盈無絀不致有誤軍需惟現當籌辦善後之際誠
恐需用繁多臣復與報銷局司道等酌議再於司
庫籌撥銀四十萬兩解貯安肅道庫以備軍營續

調仍俟奉

旨勅部撥銀二百萬兩解甘到日另行分別查收備撥
將來善後事竣所餘銀兩卽當儘數撥歸司庫封
貯原欸以資儲備謹

奏

八月十六日

奏為甘肅倉庫一律盤查完竣將查明各員實虧數
目分別叅追並酌擬杜虧章程恭摺具奏事竊查

甘肅盤查倉庫一案前因鄂山補授四川總督奉
旨交 臣認真辦理當將着追限期定案罪名及以後杜
虧章程均與鄂山逐一講求悉心商定並將接辦
原由具

奏欽奉

硃批卿之公誠朕所素知總要細心秉公不可被奸書
蠹役有所欺朦也欽此聞

獎訓之自天更愧悚於無地當即諄飭各局員一體各

矢天良細心稽覈以期無負

天恩維時鄂山已委員分路盤查臣仍恐各委員有所

瞻顧復密派員并跟隨逐細查訪該員等查辦均

屬認真現已陸續回省將各廳州縣倉廩庫銀糧

草束應存應抵實存實虧各數目開摺稟報前來

臣飭司與司案逐欵覈對復飭甘肅鞏秦階道程

德潤陝西漢中府知府雲麟督同各局員分手詳

細勾稽造具清冊臣逐加親覈尚無舛錯遺漏統

計截至道光十年九月底止除調赴軍營之循化同知馬佑龍等八員據後任報出虧挪銀二萬八百三十餘兩尚未清算交代候補知府夏祥培虧銀三千餘兩業已另案叅提尚未到甘應請俟該員等差竣到甘核算明確再行辦理又除陸續完交扣抵外計實虧正雜攤賠各款並糧價銀二十六萬七千九百一十兩零制錢四千九百六十六千零內有實因兵差賠累者有因地方別項公事

賠累者亦有分賠代賠者逐一確查實無侵盜入
己情事伏查前奉

諭旨此次盤查凡有短絀銀糧之州縣若與兵差並無
干涉着究明照例嚴辦其雖有挪移而尚有經手未
領軍需及別項銀欸數足相抵着俟領回卽行歸欸
免其開叅至未領軍需銀數不敷所挪或並無領項
可抵實因承辦兵差例不准銷以致賠累確有案據
者着覈其所挪多寡分別勒限完交以昭平允等因

欽此又查例載凡挪移庫銀五千兩以下者仍照律擬雜犯流總徒四年其挪移五千兩以上至一萬兩者擬實犯杖一百流三千里不准折贖若挪移一萬兩至二萬兩者發近邊充軍二萬兩以上者雖屬挪移亦照侵盜錢糧例擬斬監候統限一年果能盡數全完俱免罪其未至二萬兩者仍照例准其開復若不完再限一年追完減二等發落二年限滿不完再限一年追完減一等發落若三

年限滿不能全完者除完過若干之外照現在未完之數治罪等語伏思甘肅雖異常瘠苦連年又值兵差各州縣不無賠累惟止於勒限完交而不繩之以法則該員等無所做懼仍恐逾限宕延臣愚以為此次盤查止應寬其追限未便寬其罪名自應欽遵

諭旨叅酌定例分別定擬查撫彞通判何貴孚虧銀四萬餘兩中衛縣丁憂知縣李棣通虧銀二萬餘兩

該二員虧挪均在二萬兩以上應請

旨先行革職何貴孚勒限五年李棣通勒限四年完交
如果限內全完該員等究因兵差賠累懇

恩從寬開復限滿不完照例擬斬監候監追查封備抵
若完不足數查照未完之數照例治罪其因承辦
兵差虧挪銀一萬兩以上之涇州直隸州知州袁
作翰等三員應先請革職留任勒限三年完交五
千兩以上之渭源縣知縣周慶雲等七員應先請

降三級留任勒限二年完交五千兩以下之河州
知州羅文楷等十七員應先請降二級留任勒限
一年完交限內全完均照例准其開復限滿不完
及完不足數者查照未完之數照例革職監追查
封治罪其未經承辦兵差之州同李光連等六員
共虧挪銀四千七十餘兩臣嚴切查訊實係因公
賠累並非侵盜入已此時卽照例嚴辦亦屬咎所
應得惟念該員等缺均瘠苦入不敷出輾轉挪墊

成虧為數尚不甚多仰懇

天恩先將該員等摘去頂戴勒限一年完交限內全完
准其開復逾限不完或完不足數卽照例革職監
追查封治罪其短交攤賠各款之鹽茶廳同知沈
在光等十九員查明均係分賠代賠銀兩與本員
實虧有間應請不計銀數多寡均勒限一年完交
免其議罪至挪虧正雜各款之已故知縣張瓊等
七員應請分別虧數多寡查照本例在於各該員

子孫名下着追其短交攤賠各款之已故知州黃錫寶等八員所虧均係分賠代賠之款本非該員等實虧且本員已故應請在於甘省一成養廉內彌補免其咨追以示區別以上各虧員中有候補候選告病丁憂降革無缺各員均照現任人員酌展限期一半其候補等項人員得缺以後仍照現任人員限期着追毋庸展限再此次盤查既蒙鴻慈逾格勒限完交所有各員虧挪應無分正雜各款

併限嚴追以免懸宕其有服官別省者照甘省奏
定限期罪名咨照該省分別依限嚴追照例查辦
其回籍回旗之候選丁憂告病病故降革各員咨
照原籍本旗分別依限嚴追照例查辦在甘之員
以奉

旨飭知之日起限離甘各員以接到甘省咨會飭知之
日起限追出銀兩解甘歸欵如將來虧員家產盡
絕卽着落歷任上司各按在任月日照例分賠如

此則虧員知感知懼得以趕緊完交度

帑項不致無着臣受

恩深重報稱無能於各屬虧空失於覺察自問獲咎實
深迺蒙

聖主格外寬容轉加

委任愧悚交集寢食難安惟有查明致虧積弊據實和
盤托出殫竭血誠力圖整頓現已諄飭藩司並各
道府直隸州共相砥礪正己率屬訓節儉以正其

趙除冗費以恤其苦清積弊以絕虧之源嚴交代
以截虧之流臣仍不時嚴查以後各屬交代但有
絲毫虧空立即叅究務使舊欠全清新虧永杜以
期仰副

高厚深恩於萬一謹

奏

謹將酌擬杜虧章程十條敬繕清單恭呈

御覽

一省書盤踞宜加重懲辦也查省書盤踞省城勾串各衙門書吏表裏為奸凡州縣詳稟冊籍不經省書手辦者各衙門書吏即苛駁無已甚至一案不能完結省書因之向本官闕說使費其州縣每年咨部之

奏銷冊及例造各案冊籍名曰舊案其非年例必有之事名曰新案逐案需索有加無已各州縣受其箝制不得不任其侵漁而本官因公至省該省書

又百計殷勤一切公館鋪墊無不預備齊全或有
缺乏卽為代借銀錢或有應酬卽為代賒貨物各
州縣既畏其箝制又喜其殷勤遂不得不視為腹
心而智愚皆受其籠絡及至領銀之時不經其手
則勾串苛駁既經其手則任意開銷迨使費私債
扣收一清而餘銀已屬無幾勢必至應支發者挪
移別款而庫因以虧應採買者價值不敷而倉因
以虧及舊官叅草監追又轉而剝削新任是州縣

之身家性命盡供若輩之貪饕虧空之源大半在此臣到任時卽飭司嚴行查禁雖近日稍知斂跡而懲辦不重恐日久故智復萌現又諄飭兩司嚴行訪查應請嗣後但有省書之名及變易其名而仍辦省書之事者卽逐名拏究訊出不法情節照各本例加一等治罪卽訊無別情亦連家口遞解本籍嚴加管束各衙門書吏但與省書交結者同罪各廳州縣仍用省書者卽行嚴叅道府直隸州

失察者一併叅處如此則立法既嚴有犯必懲省書自可除草矣

一嚴禁吏胥苛求以節冗費也查各州縣申賚上司詳稟冊籍各書吏無不吹毛求疵先行苛駁以為需索使費之地省書遂因而通知各州縣任意勒索不滿其欲則刁難不休各州縣或恐要案久逾限期或領項急需應用因而俯首吞聲受其剝削在詳稟文義簡明是非易辨而冊籍卷帙繁重稽

核難周是以猾吏奸胥總以冊造不合四字籠統
苛駁使費一日不來駁飭一日不止此等冗費甚
屬繁多甘省地瘠官貧州縣無項賠累其勢必至
虧挪尤不可不嚴行禁止因思欲除其弊必先使
之無權現已嚴飭兩司嗣後凡書吏稟請駁冊籍
者必須令其將如何不合之處詳細簽明札飭該
廳州縣更造如有以冊造不合四字籠統駁飭而
又不能指出所以不合之故者卽將該經書從嚴

懲辦並通飭各屬如有苛駁無理者准其指實稟
明以憑查究如此則吏胥無權而冗費可節矣
一採買兵糧宜責成各道領價督買也查向來請領
糧價藩司徑發各廳州縣而各廳州縣又交省書
代領省書遂勾串司書留難需索並將銀兩借給
本官重利盤剝於領銀後如數扣還及至糧價領
回或僅存十之四五或僅存十之二三甚至有蕩
然無存者價既無存糧何能買是以

國家帑項盡歸奸吏私囊而本員之性命身家亦黯
然與之俱盡現已飭知藩司嗣後各屬採買糧價
責成各道咨領由道委員分送各屬監同買足後
稟道親往盤驗封貯俟估夫兵糧時再行稟請啟
封散放平日仍責成該管府州時加訪查不准擅
動倘道員推諉通融任聽該員仍交省書代領查
有虧短卽着落該道代賠該府州不加訪查致有
虧短卽着落該府州代賠如此辦理則道員與藩

司官階相去不遠有弊可以直陳省書司書自不敢留難需索而層層稽查維制亦不致任意虧挪矣

一嚴禁倉糧交價以杜虧源也查甘省各屬交代倉糧或有虧挪或霉變折耗往往作價移交每下色糧一石折交價銀五錢至六七錢不等上色糧一石折交價銀一兩至一兩五六錢不等私相授受相習成風後任若不接收則寅僚皆以為刻接收

後又畏買糧賠累亦思輾轉移交而缺乏時遂不
免挪用及後任遇有事故並價銀亦化為烏有或
謂有價卽屬無虧而不知虧源悉從此起現在盤
查各屬虧糧交價均不盡一若逐員追溯如增則
官非一任事隔多年且病故叅革無缺之員居多
徒有加追之名並無交糧之實且一經加價將來
責成後任買補前任虧糧必須照加價之數給發
是以原交一石糧價止能買補數斗虧糧虛價追

補無虧而實貯轉增虧缺查此項糧價前任固不應折交後任亦不應濫接現已責成道府直隸州查看年豐穀賤督飭現任各員各照原交之價如數買糧歸倉價銀不敷卽着落現任濫接之員賠補並通飭各屬嗣後交代時責成該道府直隸州嚴查遇有虧糧均責令買糧還倉永不准以價銀交抵違者立即揭叅或領價後未及採買卸事及霉變折耗應賠者無論額徵採買豫買上色糧一

石俱作價銀二兩下色糧一石俱作價銀一兩於
交代限內提貯道庫委員監同後任代為買糧歸
倉仍責成該管道親往盤驗封貯如此則前任無
利可圖後任亦畏累不接矣

一攤銷名目永行禁止也查各屬修理一切工程請
修不准往往以攤廉修理為名詳明道府本州分
年攤銷又將前任因公無着虧欵議明代為攤銷
並因上次清查案內不准鋪墊器具作抵而鋪墊

器具又為歷任所必需因而互相私議分任攤銷
遂至前任之攤銷未完後任之攤銷又起輾轉流
交不免作抵正項日積日多後任實受其累應將
攤銷名目永行禁止如有必須修理工程而例不
准請

帑者止准詳請該管道府親往勘估確定數目由道
咨移藩司詳請臣衙門確核立案借廉修理在於
該廳州縣應領養廉內按季扣還歸欵不准挪用

應存庫項議請攤銷其鋪墊器具如果後任必需
止准以現銀交易不得私議攤銷至前任虧項無
論因公與否有虧卽揭總不得代為攤銷倘交代
時再有攤銷名目如係該州縣私自議攤者卽責
令議攤之州縣賠交倘係詳明批准者卽責令批
准之道府直隸州賠交庶各州縣賠項漸少而虧
空亦無所藉口矣

一無着各款宜生息彌補也查現議將攤銷名目永

行禁止而以前攤銷各款非遠年流交卽故員無
着若一一窮源溯本不過紛紛咨追有名無實於
帑項終無裨益若仍令後任照常攤銷則所行反其
所禁亦非政體查攤銷一項通省合算已積至二
十餘萬兩甘肅瘠苦何能當此若不設法調劑則
此日之攤款卽將來之新虧流弊相沿何所底止
應請在於通省攤廉一成再於司庫籌出間款銀
十萬兩發商生息以每年一成養廉及所得息銀

彌補各屬未完之攤銷及無着各款俟彌補全完
再將養廉停扣提回本銀歸款度攤銷可以永禁
而虧項亦不至久懸矣

一 墊修考棚銀兩不准作抵庫項也查學政每屆按
試一切修理考院號舍修整棹橙等項勢所必需
向來均係各首縣籌款墊辦事竣各屬分作三年
攤捐歸款各屬視為攤捐之款無闕緊要往往日
久拖延而首縣一經交代勢必抵交正項此款雖

非無着而日積月累庫項不免宕懸易啓虧空之
漸現在飭司確查某府某州應需修理考棚銀若
干兩核定數目詳明臣衙門存案照數在於各州
縣應領廉費內分季扣收發交首縣承辦倘有浮
濫責令承辦之員賠出此後交代倘藉口不敷應
用再議分攤者卽行嚴叅庶首縣不至墊虧而各
州縣亦不至日久宕延矣

一應解各款宜從嚴查核也查銀兩久貯屬庫易致

虧挪此次盤查所有冊造實存銀兩已飭各委員
用臣印花封貯飭司除應存經費外一概提貯司
庫其續行刑駁抵款加入實貯銀兩亦飭司嚴催
補解並諄飭藩司嗣後每年

奏銷之時卽詳細查核如有應解之款尚未解司者
無論正雜錢糧均卽委員守提如守提不解必係
虧挪卽詳請撤任查明立卽揭叅至各屬徵收錢
糧零星小戶以錢折交固係俯從民便而日久弊

生甚至交代時應交各款亦有以錢抵交者時價
低昂不齊遂不免漸有虧短現在盤查案內各屬
歷任折存錢文已飭司責令現任之員易銀解司
嗣後交代時無論何項款目如有以錢抵交者後
任卽詳報藩司責令前任易銀解司倘有短絀照
虧空例叅辦若後任濫行接收從嚴比照虛出通
關例叅處如此則銀兩不致久貯屬庫而流弊亦
可盡除矣

一抵虧各款亟宜歸補也查此次盤查案內各屬以未領各款扣存司庫抵虧此項抵款繁多大半係常年應領款目稍不加察則不肖各員恐不免賄通司書蒙混冒領以致各屬虧款變為司庫虧款不可不預為之防臣現已札飭藩司凡各員應領各款已報入盤查案內作抵者迅即在於各員虧款項下分別歸補並將盤查案內各員抵虧領項另造一冊註明款目年月銀數每科房各給一本

以備各廳州縣領銀時按冊逐款覈對倘有已抵
虧項又復冒領者一經查出卽從嚴叅究若該書
聽受賄囑勾串冒領除將冒領之員叅辦外並將
勾串舞弊之書吏照例從重治罪則稽察嚴密弊
端自絕矣

一有虧各員俾其陞調以昭炯戒也向來清查案內
在任勒追虧員均不停其陞調此次盤查奉

旨勒限完交已屬

恩施格外若於虧項未清以前准其陞調則有虧與無
虧之員無異殊不足以昭炯戒而挽頽風應請現
在盤查案內降留勒追各虧員除逾限不完照例
治罪外其在勒追限內虧項未清以前無論虧數
多寡一概停其陞調以示嚴懲卽現查無虧各員
遇有陞調亦嚴飭該員歷任各處之該管道道府直
隸州督同後任逐一嚴查結報如實係無虧候結
報到司方准詳請

題奏如本係有虧交代時後任代為擔承者准後任
據實檢舉將虧員分別叅辦寬免後任虛出通關
之咎倘再扶同掩飾一經查出除該員照例叅辦
外仍將捏結之各道府直隸州並後任一併照虛
出通關例嚴叅庶虧員知所做畏虧項可以早清
而委查各員亦不敢稍有捏飾矣

同日片

奏再查道光八年豫買糧石 臣前經具

奏如承領豫買之員但有虧短卽先儘豫買糧價着
追茲已逐細查明凡承領道光八年豫買倉糧各
虧員原報虧短額徵常平糧石均改歸八年豫買
項下一併彙入該員等虧數內勒追又民捐義倉
糧石前經鄂山

奏請一併盤查茲據報虧糧五千二百八十餘石 臣
細加究訪實緣當日辦理義倉各廳州縣據該捐
戶等報捐數目詳報嗣捐戶未經交足以致虧短

均有收糧欠糧案據可查並非官侵吏蝕查前項
欠糧雖非該員等實虧惟捐數報明在先當時既
未收足未便復向各捐戶補追致滋擾累現已分
別着落當日勸捐各員如數賠交歸於各虧員賠
項內勒限着追謹

奏

同日片

奏再查嘉慶二十五年前督臣長齡

奏請將河西各廳州縣自嘉慶二十一年起每年額
徵新草除酌留兵草之外所餘草束按年變價解
司津貼河東大路各州縣驛站不敷公費並幫補
貴德循化巴燕戎格等廳及臣衙門筆帖式辦公
不敷之資其嘉慶二十一年以前舊草亦令各屬
售變解司遇有災歉緩免新草不敷卽於舊草價
內撥補經戶部核議覆

奏奉

旨依議欽此節年以來經徵新草雖不能掃數全完而遞
年帶徵陸續變解尚敷支發嗣於道光八年恭逢
恩旨蠲免道光七年額征草四百五十七萬餘束又免
節年民欠草五百八十七萬餘束以致津貼公費
不敷支發現當盤查定案統計該州縣應支津貼
公費未領銀三萬四千八百九十一兩零內已入
盤查抵虧銀一萬四千七百二十二兩零未入盤
查抵入交代銀二萬一百六十八兩零抵虧者固

當發給歸欵其抵入交代者亦應分別提解當此
盤查之後必應亟為清釐惟此項津貼銀兩應在
草束變價欵內發給茲民欠草束既已蠲免新收
之草又有現年之用是津貼銀兩無項給發而盤
查案內抵欵不免虛懸查司庫舊草變價欵內尚
存銀三萬五千一百一十兩零足敷撥補合無仰
懇

皇上准照

奏定原案將河東各州縣未領津貼銀三萬四千八百九十餘兩於舊草變價款內照數撥補庶盤查抵款得歸實在而以後交代案內提解各項亦可清結謹

奏奉

上諭楊 奏甘肅倉庫盤查完竣查明各員實虧數目分別叅追並酌擬杜虧章程一摺着該部議奏片單各二件併發欽此

二十二日

奏為承辦軍需盤查兩案始終出力各員籲懇

天恩事竊查甘肅盤查倉庫錢糧經前署督臣鄂山

奏明在於臣署設局遴派甘肅鞏秦階道程德潤並

調辦軍務之陝西漢中府知府雲麟等十員於辦

理軍務之暇兼辦盤查維時正當進兵喫緊之際

事事急如星火而盤查卷宗文案又已提至臣署

案牘山積款目紛繁該員等每日辦理軍需文案

籌辦糧餉軍火車駝及供支一切事宜毫無貽誤
有暇卽赴局辦理盤查晝夜辛勤不遺餘力鄂山
陞授四川總督臨行時曾將該員等出力之處向
臣備細告知囑臣留心稽察如果始終認真再予
獎勵臣回任後時加察看該員等勾稽查核諸事
躬親毫不假手書吏奔馳兩局刻無片間剔除一
切積弊均極公正周詳毫無瞻顧其出外盤查時
臣加以密訪亦均精細認真實屬自始至終勤慎

不懈查此次軍需前路用兵雖較上屆情形不同而局中籌畫供支則與上屆無異該員等兼辦兩局事務任勞任怨辛苦經年均能妥協無誤臣既資其力未便壅於上

聞謹另繕清單恭呈

御覽可否仰懇

皇上天恩量予鼓勵伏候

聖裁再雲麟等十員經手事件均已完竣現俱飭令回

陝供職合併陳明謹

奏奉

上諭楊

奏請將承辦軍需盤查兩案出力各員懇

予鼓勵一摺此次辦理軍需事務與上屆不同鼓勵

之處與上屆總當有所區別該督所請未免過優甘

肅鞏秦階道程德潤陝西漢中府知府雲麟俱着交

部從優議叙陝西寧陝廳同知郭維暹留堪廳同知

李希曾俱着賞加知府銜陝西候補直隸州知州林

一銘着以直隸州知州遇缺卽補陝西宜君縣知縣
趙植候補知縣王以銘俱着賞加知州銜陝西候補
知縣鄭華國候補知縣徐來清俱着不論繁簡儘先
補用陝西西鄉縣丞魏一德着以知縣卽補陝西候
補州吏目盧演弼着免補本班以府經歷縣丞卽補
局書候選未入流周繼先焦大理俱着以從九品未
入流不論雙單月歸部儘先選用局書候士鋒司書
陳育仁俱着以未入流不論雙單^月歸部卽選局書楊

騰蛟左向榮司書劉誠篤俱着以未入流歸部卽選
以示鼓勵該部知道欽此

二十八日

奏為遵

旨嚴審定擬恭摺覆奏事竊臣接准部咨道光十一年
四月十二日奉

旨此案甘肅民人何聰前在都察院衙門呈遞封章當
交刑部審訊茲據刑部審訊何聰所控各案係聞黑

番肆搶心懷不平自行起意來京馮就封章呈遞並
牽及回疆茶稅難保無聽人從中主使着將何聰解
赴甘肅交楊 嚴行審訊查明何聰在籍有無為
匪不法別情照律定擬具奏至該犯所稱黑番疊次
搶劫各案事隔多年而黑番膽敢肆搶不可不防其
漸又稱出入嘉峪關民人起票驗票需索錢文一節
如果屬實尤應查禁着楊 會同西寧辦事大臣
將該處黑番隨時彈壓如有肆搶等事務當認真查

拿懲辦毋許將就消弭致釀事端其嘉峪關官弁胥吏倘有藉端科斂等情卽嚴行禁革以除積弊欽此等因咨行到臣當卽督同兩司先行提犯研訊一面將該犯呈訴各款分行各屬切實查覆去後旋據安肅道蓋運長詳稱遵查道光八年

欽差大臣那彥成籌辦回疆善後議定在於嘉峪關抽收茶稅以杜奸商私販旋經戶部議奏停止奉文裁撤至嘉峪關為新疆出入門戶稽查盤詰最宜

嚴密向例民人出關由肅州給票進關由哈密大
臣及各地方官衙門給票到關時遊擊巡檢會同
驗票註冊放行其出關入關之人自覓妥實店保
呈請給票所需紙張及印刷工料向係書吏備辦
每票收紙價錢五文始自乾隆年間相沿已久守
關弁兵書役向無出關索錢五文進關加倍及藉
端留難科斂情弊卽該犯何聰從前進關亦未給
過守關兵役錢文又據代理玉門縣事安西州州

判朱煥稟稱提訊店戶周自成據供何聰從前進關時係伊具保請稟僅給過書吏紙價錢五文又付伊房火飯錢七十文屬實質之承辦經書供亦相同檢查出入關口號簿何聰所指漢中府回民丁發祥等姓名多不相符無從提質又據西寧府知府珠滿稟稱前任西寧辦事大臣穆蘭岱並未建修生祠近來沿邊設防嚴密偶有蒙番搶劫之案均經隨時懲辦該蒙番等咸知畏法斂戢並據

鎮番玉門敦煌等縣先後申報查明該犯何聰在
原籍寄籍並無為匪不法別情各等情前來臣隨
督同藩司方載豫署臬司圖明額親提該犯何聰
逐細研鞫緣何聰籍隸鎮番寄居玉門嗣復遷居
敦煌縣該犯幼年讀書無成出外充當長隨後又
遊方行醫嘉慶二十五年以後該犯在西寧蒙古
游牧地方往來行醫賣藥並無勾結蒙番搶劫及
私販禁物情事道光元二年間野番滋事經前督

臣長齡等堵勦懲辦並查拿漢奸禁止內地民人私出口外該犯不敢在蒙古地方停留旋回敦煌嗣四疆軍興該犯復往大營謀食因乏生計欲仍赴西寧蒙古地方行醫於十年三月十五日在玉門縣請票進關前赴西寧因各口隘弁兵把守盤詰不能出口資生無策起意赴京呈遞封章遂將平素傳聞野番搶劫各案回疆軍需茶稅及所見書籍並進關時曾給書吏紙價錢文隨意接拾具

呈在都察院衙門呈遞其呈內所指前任西寧辦事大臣穆蘭岱建修生祠訊係得自風聞並未見過祠宇該犯前在玉門縣請票曾給過書吏紙價錢五文又給店戶周自成房火飯錢七十文進關時並未給過守關兵役錢文旁人出入關口曾否給錢該犯不能確指嚴訊委無聽人主使在情呈訴亦無另有為匪不法別情覆加究詰該犯惟俯首認咎別無置喙自應擬結查例載軍民人等呈

遞封章挾制入奏本犯係平民照衝突儀仗妄行
奏訴例加一等發邊遠充軍若所控虛誣核其誣
告本罪僅止笞杖徒者仍發邊遠充軍笞杖罪名
到配枷號一個月等語此案何聰前在蒙古遊牧
地方行醫賣藥雖究無勾結蒙番為匪別情惟私
出口外已罪應擬流嗣因各口隘盤詰周密不能
復行出口輒敢挾拾浮詞赴京呈遞封章詆毀大
臣挾制入奏實屬謬妄查該犯呈訴各款詰係得

自傳聞核其誣告之罪較輕應按例從重問擬何
聰合依軍民人等呈遞封章挾制入奏本犯係平
民照衝突儀仗妄行奏訴例加一等發邊遠充軍
例發邊遠充軍到配加枷號一個月滿日杖一百
折責安置至嘉峪關出入商民請票驗票雖據安
肅道查無留難需索但胥吏既有得受紙價名目
恐難保無藉端科歛情弊應責成該道督飭所屬
嗣後官為捐脩票紙隨時填給勿任胥吏借端需

索其到關驗票放行嚴禁兵役勒索留難所有紙
價名目卽行禁革以除積弊而便行旅至西寧蒙
古地方野番出沒搶劫自道光二年勦辦以後奏
定章程如有河南番子偷渡河北者卽在河干正
法示衆沿邊執持弓矢軍器搶劫案件卽照理藩
院奏准定例斬梟隨時懲辦並令甘州肅州西寧
各提鎮輪按四季親身帶兵會哨每月仍分派副
叅大員帶兵搜查近來蒙番頗知畏威斂戢邊圉

尚屬肅清 臣惟當會同西寧辦事大臣凜遵
聖訓隨時彈壓認真查拿有犯必懲以防其漸斷不敢
稍涉大意將就消弭致釀衅端現在該犯何聰呈
訴黑番疊次搶劫各案或在勦辦之先或係已結
之案事隔多年應照部議毋庸逐案提究致滋紛
擾謹

奏

二十八日

奏為勘明甘肅各屬地方夏秋禾苗被旱被水被雹情形分別辦理事竊查隴蘭等三十廳州縣縣丞州同州判等處地方夏秋禾苗前於五六月間據報間有被旱被水被雹之處當將飭司查辦緣由節經

奏明在案茲據藩司方載豫將被災各處先後督飭印委各員會同勘明分別辦理詳請具

奏前來 臣覆查通渭岷州固原秦安等四州縣委員

勘明受傷甚輕不致成災毋庸查辦外其河州渭源東樂靖遠張掖沙泥隴西寧遠安定會寧洮州武威永昌平番花馬池秦州清水中衛靈州鹽茶鎮番等二十一廳州縣縣丞州同州判等處被雹被水被旱之區亦據正委各員勘明均係一隅中之一隅或因續得雨澤或因節氣尚早業已改種晚秋應請統俟秋成體察情形如有應需接濟之處另為辦理此外尚有前已具奏之平羅同續報

之古浪等二處均經委員往勘統俟勘覆到日一
併歸入秋成案內彙核辦理惟碾伯地氣陰寒禾
苗被旱受傷秋成難望應同被災較重之鞏蘭狄
道金縣等三州縣夏收歉薄民力均不無拮据所
有本年應納新舊錢糧合無仰懇

聖主天恩俯准緩至來歲麥後徵收以抒民力俟奉

恩旨臣當謹刊謄黃道行張掛以彰

皇仁而杜欺冒謹

奏奉

上諭楊

奏勘明甘肅各屬地方夏秋田禾被旱被
水被雹情形不同分別辦理一摺甘肅碾伯縣地氣
陰寒禾苗被旱受傷秋成難望及被災較重之臯蘭
狄道金縣等三州縣夏秋歉薄民力均不免拮据所
有該四州縣本年應納新舊錢糧俱着加恩緩至來
歲麥後征收以抒民力該部知道欽此

十月初八日

奏為甘省秋收歉薄地方請借冬月口糧以資接濟
恭摺具奏事竊查甘省各屬本年夏秋禾苗間有
被雹被旱被水被霜之區前經臣

奏明俟秋成體察情形如有應需接濟之處另為辦
理在案茲據藩司方載豫詳據皋蘭等一十九廳
州縣會同委員勘明現在各該處秋收歉薄民力
實形拮据必須酌借冬月口糧俾資接濟等情前
來臣當與該司詳加察核應請酌借皋蘭縣本色

糧八千石金縣本色糧三千石靖遠縣本色糧四
千石狄道州本色糧五千石沙泥州判本色糧一
千石隴西縣折色銀二千兩安定縣本色糧一千
五百石折色銀一千五百兩會寧縣本色糧一千
石折色銀二千兩通渭縣折色銀一千兩岷州本
色糧三千石隆德縣折色銀二千兩鹽茶廳本色
糧二千五百石清水縣折色銀一千兩秦安縣本
色糧一千石禮縣本色糧二千石徽縣折色銀一

千兩崇信縣折色銀一千兩靈台縣本色糧一千石鎮原縣本色糧一千五百石以上共酌借本色倉斗口糧三萬四千五百石折色銀一萬一千五百兩其所借本色糧石在於倉貯額征常平糧內動用折色銀兩在於司庫寄貯新舊清查等案糧價款內借給散放如蒙

允准俟奉到

恩旨卽敬刊謄黃遍行張掛一面責成該管道府委員

會同該地方官按戶監放弗任胥役人等從中滋
弊務使實惠及民以仰副

聖主怙冒邊黎之至意謹

奏奉

上諭楊

奏查明歛收地方懇借口糧一摺甘肅臯

蘭等一十九廳州縣據該督查明本年秋收歛薄民
力不無拮据請酌借冬月口糧俾資接濟着照所請
加恩准借臯蘭縣本色糧八千石金縣本色糧三千

石靖遠縣本色糧四千石狄道州本色糧五千石汝
泥州判本色糧一千石隴西縣折色銀二千兩安定
縣本色糧一千五百石折色銀一千五百兩會寧縣
本色糧一千石折色銀二千兩通渭縣折色銀一千
兩岷州本色糧三千石隆德縣折色銀二千兩盩厔
廳本色糧二千五百石清水縣折色銀一千兩秦安
縣本色糧一千石禮縣本色糧二千石徽縣折色銀
一千兩崇信縣折色銀一千兩靈台縣本色糧一千

石鎮原縣本色糧一千五百石統共借給本色倉斗
口糧三萬四千五百石折色銀一萬一千五百兩所
有本色糧石在於倉貯額徵常平糧內動支折色銀
兩在於司庫寄貯新舊清查等案糧價數內借給該
督卽刊發謄黃徧行曉諭責成該管道府及委員會
同該地方官按戶監放認真經理如查出吏胥有侵
蝕情弊卽嚴行究辦務期實惠普霑用副朕軫念邊
黎至意該部知道欽此

初八日

奏為恭謝

天恩事竊臣接准吏部咨開道光十一年八月初三日

內閣奉

上諭本年朕五旬萬壽加惠臣工楊任內有違例

題請陞用罰俸三個月一案着開復等因欽此當即

望

闕叩謝

天恩伏念臣猥以庸駑忝任邊圻雖兢惕以維深每愆
尤之易集恭逢

慶典

特沛恩施仰

聖德之寬仁悉捐瑕類矢官箴而黽勉益切糾虔謹

奏

十六日

奏為勘明秋成歉薄地方懇請緩征錢糧以抒民力

恭摺具奏事竊查本年河州等二十三廳州縣間
有被雹被水被旱之區前經

奏明統俟秋成確勘酌辦在案嗣又據臯蘭狄道金

縣西和靜寧隆德安化禮縣崇信靈台鎮原等十

一州縣稟報秋禾倘被雹水雪霜亦卽委員一併

勘辦去後茲據藩司方載豫督飭印委各員先後

查勘明確分晰議詳前來臣查本年夏間被災各

地方原奏勘辦者二十三處又續報被災者一十

一處共計三十四處內除阜蘭狄道金縣等三州
縣已於夏災案内奏奉

恩旨緩征隆德清水崇信等三處已奏請借放冬月口
糧接濟渭源西和靜寧張掖東樂永昌鎮番中衛
平羅花馬池等十處夏秋禾苗偏被災傷僅係一
隅中之一隅收成不致甚歉民力尚可支持均毋
庸另議外惟被災較重之河州靖遠沙泥隴西寧
遠安定會寧洮州鹽茶安化武威平番古浪靈州

秦州禮縣靈台鎮原等一十八處同秋收歉薄之
通渭固原二處共計二十廳州縣州判民力均屬
拮据所有應征本年新舊正借銀糧草束合無仰
懇

聖主天恩准其緩至明歲秋後征收以抒民力如蒙
恩允俟奉到

諭旨卽當敬刊謄黃遍行張掛以廣
皇仁而杜欺冒謹

奏奉

上諭楊

奏勘明秋成歉薄地方懇請緩徵錢糧一

摺甘肅河州等廳州縣本年被雹被水被旱又續報
被災州縣據該督查明民力拮据懇請緩徵着照所
請加恩將被災較重之河州靖遠沙泥隴西寧遠安
定會寧洮州鹽茶安化武威平番古浪靈州秦州禮
縣靈台鎮原等一十八處同秋收歉薄之通渭固原
二處共計二十廳州縣州判應徵本年新舊正借銀

糧草束准其緩至明歲秋後徵收以紓民力該督卽
刊刻謄黃遍行曉諭務期實惠均沾毋任吏胥侵冒
該部知道欽此

十一月二十五日

奏為擬請減價平糶倉糧以濟民食而平市價恭摺
具奏事竊查甘肅地方瘠苦閭閻素鮮蓋藏且自
道光六年迄今兩次軍興車馬兵差頗資民力今
歲雨暘失時又多水雹偏災夏秋二收歉薄現值

嚴冬市糧日少價值日昂雖前經請借冬底口糧而民情終形拮据轉瞬交春青黃不接尤為可慮臣體察情形若非四路平糶俾商販得以運售流通不足以濟民食而平市價現與藩司方載豫熟商籌議查得甘肅倉貯額征糧多之州縣除留備估支兵糧並地方應用外尚可平糶一半額征上色倉斗糧二十五萬二千五百石內擬糶渭源縣糧二萬石岷州一千五百石西和縣四千石東樂

縣丞三萬石鎮番縣六萬石平羅縣六萬石碾伯
縣二千石秦州二萬石秦安縣二千石安西州三
千石敦煌縣三萬石玉門縣二萬石照數年減價
之例每石各照市價減銀一錢飭令地方官妥為
出糶商賈往來概毋禁過度幾市糧日廣市價可
平俾瘠土窮黎無不渥沫

鴻慈咸臻鼓腹其糶獲糧價隨時提解司庫俟年豐穀
賤之時卽令買補還倉但得民食無缺價值照常

卽行停止亦不必拘泥酌定之數全行出糶是舊
貯旣得出陳易新而貧民更獲普資接濟實於倉
貯民生兩有裨益如蒙

俞允俟奉到

諭旨卽當飭發告示遍行張掛使民周知仍隨時密派
員弁分路稽查務使諸弊肅清

恩膏廣被以期仰副

皇上念切民依之至意謹

奏奉

上諭楊

奏請減價平糶倉糧以濟民食一摺本年

甘肅省雨暘失時又多水電偏災收成歉薄民力不免拮据加恩著照所請渭源縣糶糧二萬石岷州糶糧一千五百石西和縣糶糧四千石東樂縣丞糶糧三萬石鎮番縣糶糧六萬石平羅縣糶糧六萬石碾伯縣糶糧二千石秦州糶糧二萬石秦安縣糶糧二千石安西州糶糧三千石敦煌縣糶糧三萬石玉門

縣糶糧二萬石照數年減價之例每石各照市價減銀一錢務令地方官妥為出糶其糶獲糧價隨時提解司庫俟年豐穀賤之時卽令買補還倉各該州縣民食無缺價值照常卽行停止亦不必拘泥酌定之數全行出糶該督卽刊刻謄黃遍行曉諭仍隨時密派員弁分路稽查務令諸弊肅清用副朕念切民依之至意該部知道欽此

十二月初八日

奏為留駐肅州官兵議支事例在所必需懇

恩俯准造銷事竊臣前准戶部議覆此次軍需調派官兵應支一切事例分別准駁行令遵照前來除將所議各款飭局查辦外惟查內開留肅聽差官兵請支給鹽菜口糧以資食用一欵並調赴肅州聽差官弁請照例支給盤費以資度用一欵戶部因道光六年回疆軍需章程案內無此二欵不准格外增添行令刪除等因臣查此次軍興之始欽奉

諭旨現在賊勢猖獗萬一阿克蘇或有閃失關以內不可無重兵駐劄着楊 駐劄肅州策應一切毋庸出關將所帶本標兵一千八百名留於肅州以壯聲威欽此嗣因前路需兵緊急經臣

奏交固原提督楊芳帶去官兵一千六百餘員名外下餘留肅官兵二百餘員名以備差遣而資彈壓奉到

硃批覽奏均悉欽此是此項官兵係屬遵

旨留駐並非格外增添若不給予鹽菜口糧勢難枵腹
從事且相距本營已遠在一千數百里之外與川
楚軍需派往鞏秦一帶防堵官兵事同一例是以
援照川楚軍需案內應支事例請給鹽糧以資食
用至此外由甘涼各營調赴肅州聽差官弁係因
彼時肅標官兵調派出征者已二千餘員名留營
官弁無多而肅局派送餉鞘駝隻軍物等項在在
需人不敷差遣隨卽在於甘涼各營調派官弁數

十員赴肅聽差離營較遠肅城食物又復昂貴微末寒弁力難自給不能不照依押解一切什物官弁兵役之例自離營到肅之日給予盤費口食俾藉趨公軍需移步換形勢難與上屆執一而論合無仰懇

天恩俯念前項官兵均係實派有數原議事例在所必需並非無故增添

勅部准其支給以便造銷而歸實用謹

奏奉

上諭楊

奏前經戶部議駁留駐肅州聽差官兵支
給鹽菜口糧並調赴肅州聽差官兵支給盤費二款
事在所必需請仍准其支給着戶部再行查覈具奏
欽此

十八日

奏為恭謝

天恩事竊臣於本年十二月十二日奉到

欽賜康熙字典

御製文初集各一部當卽恭設香案望

闕碰頭祇領訖欽惟我

皇上學緯珠躔

道隆玉券繩

武而宣

祖訓寶笈重鐫

數文以煥


宸綸

琅函遠錫洵同書之正體實

邛治之宏謨臣恪守編摩永珍什襲昭億萬斯年之景
運點畫胥遵萃五十九篇之典章闡揚無斁臣感
激下忱繕摺叩謝

天恩謹

奏



道光十二年壬辰七十三歲

正月二十八日

奏為請補改復舊制之總兵副將及酌擬留撥原裁官兵以裨營伍事竊臣接准長齡等咨開現奏籌辦善後情形摺內因陝甘地方緊要請將前次涼州改鎮為協移駐喀什噶爾換防之總兵仍歸原地奉到

諭旨着照所議辦理欽此欽遵知照前來伏查涼州設地

處西路衝衢夙稱重鎮前因上屆軍需奏改為協將該處總兵移駐喀什噶爾莊浪副將移駐涼州涼標中軍遊擊移駐莊浪并裁該鎮兵一千名內撥歸督標五百名循化保安起台各營五百名其餘應裁官弁奏明俟兵丁全數裁撥完竣後再行酌量辦理在案今涼州總兵既由喀什噶爾改歸原處則前者裁撥官兵自應一併歸還以復舊制惟查涼州標屬原額馬步守兵共有七千六百餘

名而督標原額僅止馬步兵三千餘名自裁撥以
來督標及起台堡營已募補兵三百餘名現時亦
未能遽行退出照數撥還因思涼州兵額本多卽
少撥還三百名不形單薄而督標兵額較少若多
添此三百名尤為得用是以臣詳加籌酌應將涼
州原裁兵一千名內請卽留於督標三百名毋庸
再行撥還其餘七百名分別已裁未裁仍歸該鎮
原營俾資搃防似覺兩有裨益至於涼州一缺今

經復設總兵應卽揀員請補臣現與長齡等札商
核選查現署喀什噶爾換防總兵四川綏定協副
將周悅勝前署涼州副將辦理營務訓練官兵均
極認真可妥靠且在甘年久節歷戎行口內口外情
形均所熟悉人亦實心能事現蒙

恩旨賞加總兵銜署理喀什噶爾邊要鎮缺以之請補
涼州總兵作為換防最為得宜惟該員籍隸臯蘭
係屬本省與例未符第武職提鎮大員如桂涵竇

德等曾荷

鴻慈予任本省該員周悅勝可否籲懇

天恩俯念人地相宜准其補授涼州總兵仍在喀什噶
爾換防抑或暫行升補俟班滿撤回後另行酌調
他缺之處均出自

聖主殊施如蒙

俞允其涼州鎮篆一時委署乏員并請卽以現署該處
副將之甘肅提標叅將托克通阿暫為代辦俟軍

營凱撤副將有人再行改委接署至涼州協旣已
裁撤甘省副將較少其前改之莊浪協應請一併
復回卽以軍營新升之涼州協副將伍魁英調補
所遺現任莊浪營遊擊李遐齡本係涼州鎮標中
軍遊擊移駐並請仍歸原營統符舊制其所需涼
州鎮總兵莊浪協副將以及涼州鎮標中軍遊擊
印信關防請卽

勅部鑄造頒發以資鈐用至於該副將遊擊二缺仍應

照舊作為題缺合併陳明謹

奏奉

上諭楊

奏請補改復舊制之總兵副將及酌擬留

撥原裁官兵一摺甘肅涼州為西路重鎮前因上屆
軍需改鎮為協將該處總兵移駐喀什噶爾莊浪副
將移駐涼州涼標中軍遊擊移駐莊浪并裁該鎮兵
一千名茲據該督奏現在涼州總兵既由喀什噶爾
改歸原處着准將涼州原裁兵一千名內督標所留

三百名毋庸再行撥還其餘七百名分別已裁未裁
仍歸該鎮原營俾資操防以符舊制所有涼州鎮總
兵准其以周悅勝補授仍留喀什噶爾換防其涼州
鎮篆卽着現署該處副將之甘肅提標叅將托克通
阿代辦至前改之莊浪協着一併復回卽以軍營新
陞之涼州協副將伍魁英調補所遺現任莊浪營遊
擊李遐齡本係涼州鎮標中軍遊擊移駐並着仍歸
原營所需涼州鎮總兵莊浪協副將涼州鎮標中軍

遊擊印信關防着該部卽行鑄造頒發餘俱着照所
議辦理該部知道欽此

二月二十八日

奏為酌裁直隸州州判等缺以免冗濫事竊臣接准
部咨道光十一年十一月二十二日奉

上諭朕恭閱康熙五十九年

聖祖仁皇帝實錄內載吏部等衙門會議各直省督撫題
裁閒冗官三百三十六員應照所題裁汰奉

聖諭口北道缺不必裁餘依議欽此復據吏部查明以後
各省裁汰文職間冗官員單開雍正年間共裁二百
五十餘員乾隆年間共裁三百三十餘員嘉慶年間
共裁二十餘員道光年間裁汰二員朕詳加披閱仰
見我朝

列聖相承澄叙官方刪除冗濫至為詳慎國家設官分職
原以保乂民生必使閭閻獲益方足收指臂之效若
令冗員濫竽充數其本任既無事可辦而各員官廨

一切公用不能盡出己資勢必取之民間是多設一官百姓反多受一官之累卽如近日徐寅第收受節壽陋規一案顯係州縣朘脂膏藉以供應據此一端已可概見嗣後若不分別裁汰則間冗相仍冒濫欲衛民而轉以病民朕心屢保赤非為節省俸糈起見總期有裨民生官不虛設始足以臻上理着各直省督撫及各河督監政悉心核議於所轄文職間員如有可裁者酌量裁汰據實奏聞請旨用副朕慎簡

官僚勤恤民隱至意欽此欽遵行知前來臣隨與藩
臬兩司公同酌議查甘省地處邊陲幅輳遼濶原
設道府丞倅等官統轄分管各有專司其州縣員
缺所管地扯動經百里或二三百里不等加以各
處民情土俗淳悍不一又有徵收錢糧及勘辦命
盜等案在在均關緊要實無間冗可裁之缺惟查
有安西直隸州屬之馬蓮井地方設立州判一員
遇有軍流遣犯責令查察並無經管錢糧稅務且

該處居民鮮少又乏客商雖係邊缺頗屬間冗應請裁汰此外各州縣間有分駐佐貳雜職等官或專司水利驛務或經管錢糧民詞率皆分駐遙遠實非州縣所能兼顧未便據議裁汰致有鞭長莫及顧此失彼之虞第情形時有不同仍當詳加體察隨時酌量辦理再教職一官專司訓迪甘省府屬州縣學額多寡不一各祇設立教職一員儘可資以課士惟皋蘭縣並狄道州固原州寧州隴西

縣安定縣中衛縣等七處舊設教職二員皋蘭縣
為省會首邑士子濟濟又有監理書院事宜一人
恐難兼顧應請毋庸更易其狄道固原寧州三州
及隴西安定中衛三縣學額無多一學兩官似覺
浮冗請將原設之訓導六員概行裁汰祇留學正
教諭各一員足資董課如蒙

俞允其裁汰之已調馬蓮井州判董正誼撤回遇缺即
補訓導各員俱令回籍歸部即選所遺衙署俟奉

准之日照例查辦謹

奏奉

上諭楊

奏遵旨覆奏酌裁冗員一摺所議是甘肅

安西直隸州屬馬蓮井州判並無經管錢糧稅務着
卽裁汰其狄道固原寧州三州及隴西安定中衛三
縣着留學正教諭各一員原設訓導六員概行裁汰
其已調馬蓮井州判董正誼撤回遇缺卽補訓導各
員俱令回籍歸部卽選所遺衙署照例查辦該部知

道欽此

二十八日

奏為請借貧民青黃不接口糧事竊查甘肅省上年
被災地方前經臣奏蒙

恩施借給籽種口糧以示體恤茲查臯蘭等七廳州縣
去歲夏秋二禾收成本屬歉薄兼有偏被災傷之
區現值青黃不接之際該處乏食貧民懇請借給
官糧以資糊口由各廳州縣查明報司經藩司方

載豫察核情形酌借阜蘭縣三四兩月倉斗口糧
八千石金縣三四兩月倉斗口糧二千石靖遠縣
三四兩月倉斗口糧三千石洮州廳三四兩月倉
斗口糧一千石隴西縣三四兩月口糧折色銀一
千兩伏羗縣三四兩月口糧折色銀一千兩涇州
直隸州三四兩月倉斗口糧三千石折色銀三千
兩共酌借本色倉斗糧一萬七千石折色銀五千
兩所借糧石在於各該處額徵糧內動用如額徵

不敷散放另動常平倉糧其折色銀兩在於司庫
已徵未報銀糧草價欸內借給散放等情詳請具
奏前來臣覆加查核俱屬核實無浮合無仰懇

聖主鴻慈俯准照數借給俾資接濟臣仍督同藩司飭
令各道府委員會同該廳州縣按戶散放務使窮
黎均沾實惠胥役無從滋弊以仰副

皇上惠愛元元有加無已之至意謹

奏奉

上諭楊

奏請借給貧民口糧一摺甘肅省皋蘭等

七廳州縣上年夏秋收成歉薄兼有偏災現值青黃不接之際民力未免拮据如恩着照所議准借給皋

蘭縣倉斗口糧八千石金縣倉斗口糧二千石靖遠

縣倉斗口糧三千石洮州廳倉斗口糧一千石隴西

縣口糧折色銀一千兩伏羗縣口糧折色銀一千兩

涇州直隸州倉斗口糧三千石折色銀三千兩共借

給本色倉斗糧一萬七千石折色銀五千兩所借糧

石着於各該處額徵糧內動用如不敷散放着另動
常平倉糧其折色銀兩着在於司庫已徵未報銀糧
草價數內借給散放該督卽刊刻謄黃遍行曉諭仍
督同藩司飭令各道府委員會同該廳州縣按戶散
給務使窮黎均沾實惠胥役無從滋弊以示朕惠愛
元元有加無已之至意該部知道欽此

三月十五日

奏為擬請易地減糶倉糧以濟民食而平市價恭摺

具奏事竊臣前因甘省上年秋收歉薄糧價日昂
當經

奏准將倉貯糧多之涇源等十二州縣乘時減價出
糶以平市價去後茲據秦州玉門縣各稟稱該二
處地方居民尚不乏食商販又不能通可以毋須
減糶業經飭令停止惟查現在省城地方上色糧
價甚為昂貴兼之正二兩月雨雪連綿地氣陰寒
各色禾苗尚未能以出土瞬值青黃不接糧價勢

必日增民情頗形窘急臣與藩司方載豫熟商籌酌查有距省二百一十里之狄道州倉貯現存上色糧六萬九千餘石該處離省既近商販易行可否仰懇

聖恩將秦州玉門停糶糧石改於狄道州減價平糶不必仍照該二處原請出糶四萬石之數但令酌動倉糧一二萬石俾糧價一就漸平卽行停止如此量為變通庶省會要區軍民不致乏食而出糶糧

數亦與原奏並未加增實於地方大有裨益如蒙
俞允臣仍當派員嚴密稽查不使胥役奸商侵漁囤積
少滋弊端其糶獲糧價隨時提解司庫一俟年豐
卽令買補還倉用資儲備謹


奏奉

上諭楊

奏請於近省地方平糶倉糧以濟民食一

摺甘肅省上年秋收歉薄業將倉貯糧多之渭源等
十二州縣減價出糶以平市價茲據該督查明秦州

玉門縣該處居民尚有積儲毋須減糶現已飭令停止惟省城地方糧價較昂必須量為變通俾裕民食着照所請准將秦州玉門停糶糧石改於距省較近之狄道州酌動倉糧一二萬石減價平糶俟糧價平賤卽行停止該督卽遴派妥員認真稽查嚴禁胥役奸商侵漁囤積情弊其糶獲糧價提解司庫隨時飭令買補還倉用資儲備該部知道欽此



道光十二年壬辰

四月二十七日

奏為官兵會哨番族安靜並據野番投誠酌核辦理

恭摺奏

聞事竊查循化貴德巴燕武格三廳所屬地方全屬
番地族類繁多其間生熟各番遍山襟處慮恐時
相搶殺是以飭委各廳文武按月會哨在案茲據
貴德同知查寶勤署遊擊馬進祿稟報正月分帶



領漢土弁兵遵照出口會哨適據野番剛自壓倉
族番目土夫旦帶領該族老民人等到營乞求賞
給門牌並呈明該族有二百六十餘戶細冊情愿
每年交納

貢馬二匹稟請核辦前來臣等查該番族曾經搶劫
有案前飭廳營設法擒拏今據悔過投誠願交納
貢馬且將從前一切搶過各案照依番規賠服完結

自宜仰體

皇上懷柔至意寬其已往予以自新查向定章程番子
三百戶設千戶一名一百戶設百戶一名五十戶
設百總一名十戶設十總一名該番目土夫旦現
既悔罪投誠並據甘結再不敢為匪滋事似應援
照舊章酌給百戶頂戴管束番衆期收以番制番
之效除給予執照剴切曉諭土夫旦約束族番恪
遵

功令外並令該番目揀選向遵

王化明白懂事之老民在於該管地方官處給發執照
充補百總十總遞加管束安分游牧並咨部存案
謹

奏

同日會同西寧辦事大臣恒公敬

奏為黃河迤南番族糾眾搶劫飭派文武員弁酌帶
兵前往捕獲賊賊各緣由恭摺奏

聞事竊查循化貴德境內生熟各番性類犬羊習慣搶

奪年來沿河一帶嚴密巡防各番尚知畏懼惟河
南地方間有七八人或十數人偷竊搶劫之案均
經隨時飭派該管文武緝拏究辦在案上年沿邊
地方收成就薄貴德卡外思昂拉千戶所管八十
族數千餘戶漫散住牧在循化卡外地面內楊弄
古弄 录弄鐵哇 合爾哇 東什當 水乃
害各番竟敢聚集多人騎馬持械各路強劫撒拉
回民馱販糧食牲畜甚至傷人屢有報案臣等查

該番相距營汛較遠離循貴各城三百餘里距保
安營八十餘里該番賊等膽敢糾約多人行劫若
不示以兵威使知畏懼必致賊勢梟張釀成巨案
但愚蠢番族不值大辦而搶案屢報又不能不加
以懲創是以臣即飭署循化同知州判夏曰瑚保
安營都司甯顯文帶領撒拉回民一千名漢土弁
兵三百名前往彈壓一面先派通丁馳赴該處宣
諭兵威詎該番等目無

王章膽敢聚衆抗拒鎗斃撒拉回民二名經該署同知
等督率漢土官兵奮勇直前開鎗轟擊登時打斃
番賊六名燒燬房屋數十間該番賊等始行畏懼
逃竄入山經撒拉回民就近搜捕殺斃番賊十五
名帶傷逃跑者十餘名時已日暮未便冒險深入
隨即撤回將鎗斃之撒拉回民二名捐賞飭屬領
埋外當將殺斃番賊首級解送前來臣等思此等
野番罔知

法紀業經派兵往捕尚敢抗敵雖殺斃二十餘人而未
獲之賊尚多自應設法緝辦以靖邊隅復飭署同
知州判夏曰瑚遊擊史臣守備馬進祿等務即趕
緊緝獲報解去後嗣據該文武稟稱前往附近該
番族之康家寨駐劄即派土千總楊萬士通丁馬
魁喇嘛尖水錯等設法喚出該族總管千戶觀木
卻合曉諭利害宣示

恩威飭令拏獻正賊旋據獻出積匪並拒敵番賊二十

名該千戶帶領頭目二十餘人親身解送來城詢
據該千戶供稱伊祖輩自雍正年間蒙賞千戶迄
今百十餘年居住山僻曠野之地從未見過地方
文武各官所以古弄等族番民不知

王化今見官兵捕捉實知畏懼情愿帶同頭目人等自
行赴轅請罪出具永不為匪搶劫甘結等情察看
該千戶暨各頭目等悚畏情形現於詞色尚屬至
誠似應寬其一綫予以自新之路查各番半係土

考番民當此播種之際未便使其失所另滋事端
是以剴切曉諭令其歸族仍安住牧外其縛獻番
賊二十名內有抗拒官兵番賊十二名實屬法所
難容且身帶重傷未便稍稽顯戮致逃法網當即
正法發回梟示其四十轄拉等六犯尤屬助惡法
無可貸慢朶等二犯僅止行竊分別另行辦理至
此次漢土官兵及撒拉回民應需口食為數無幾
業經臣等捐賞外所有文武各員弁均能鎮靜從

事辦理得宜既未驚擾別族又未糜費錢糧尚屬
奮勉出力臣將文武職分較大者存記酌量鼓勵
其弁兵不避艱險迅速集事稍有微勞亦記名分
別獎拔至土千總楊萬士通丁馬魁尤為出力且
歷次查辦番案始終已結可否

賞給楊萬士五品頂戴馬魁六品頂戴之處出自

皇上格外恩施謹

奏

御覽

謹將河南賊番偷渡河北糾眾強劫拒捕傷人並
抗拒官兵賊犯繕具簡明清單恭呈

計開

四十轄拉

什吉喀麻

丁四十九

多爾吉

連住古

只格立

以上六犯均係夥衆偷渡河北竊劫蒙古及
民人等牲畜殺傷事主並敢抗拒官兵實
屬愆不畏法應請照歷次辦過偷渡章程
並白日邀劫道路例即行正法梟首示衆

慢尔

加洛

以上二犯訊無強劫偷渡情事疊經行竊應
照蒙古例擬請遣發

奉

上諭楊

奏請鼓勵查辦番案之土千總等一摺土

千總楊萬士通丁馬魁查辦番案始終出力楊萬士

著賞給五品頂戴馬魁著賞給六品頂戴以示獎勵

欽此

二十九日

奏為會擬陝甘兩省滿營紅白賞銀章程恭摺奏
聞事竊查陝甘兩省滿營兵丁每歲紅白賞卹銀兩前
經臣奏請自道光八年為始由將軍等核實散給
統俟三年後酌中定額另行會議具

奏奉

旨允准當即移行遵照在案嗣因三年屆滿咨商各滿
營正在會議間適准戶部來咨奏定章程嗣後各
省駐防滿營兵丁每年紅白事件賞項各按該省

例定銀數分為四季支領一季之內事件較少即照例賞銀數支給餘剩銀兩留為下季支用倘遇閏月或事件較多亦即儘此一季銀兩酌定成數均勻支放於季底按名給領自道光十二年為始悉照新定章程酌盈劑虛妥為辦理總不得額外再請添撥等因復經臣移咨陝甘各滿營去後茲據先後議覆並行司核詳前來臣覆查陝甘兩省滿營每年兵丁紅白賞項現今議定西安滿營原

額銀四千八百兩甘肅各滿營原額銀五千兩內
寧夏滿營歲攤銀二千九百四十兩涼州滿營歲
攤銀一千三百四十六兩莊浪滿營歲攤銀七百
一十四兩均作為定額此後再不得有增添其按
季支放章程自應悉照部議辦理惟查兵丁每季
所出紅白事件多寡無定若分季計數分別支給
則兵丁所獲即有多寡之殊轉不足以昭公允應
請嗣後滿營每季應領額定銀數於季首支領遇

有兵丁紅白事件照例定銀數十中留二先為支
放統俟年終核計如有餘剩各按出事之兵均勻
找領倘有不敷亦按出事之兵名下攤補總不得
逾於額定銀數以符限制如此量為變通雖與部
定章程稍有未符第該兵丁等遇事可以隨時支
用而一年所領之項亦無多寡不均之分且仍不
出額定銀數之內似與部議樽節勻辦之意亦相
脗合臣與西安將軍臣徐錕寧夏將軍臣特依順

保涼州副都統臣壽昌莊浪城守尉臣喜福往返
核商意見均屬相同謹恭摺具奏請

旨遵行謹

奏奉

硃批該部議奏欽此

六月初九日

奏為據實覆奏事竊臣接准軍機大臣字寄道光十
二年五月初十日奉

上諭昨據楊 等奏貴德卡外思昂拉千戶所管八
大族住牧循化卡外地面內有楊弄古弄录弄鐵哇
合爾哇東什當水乃害各番聚集多人騎馬持械各
路強劫當即飭委署循化同知州判夏曰瑚等帶領
撒拉回民一千名漢土弁兵三百名前往彈壓該番
等膽敢抗拒鎗斃撒拉回民二命該署同知等督率
漢土官兵開鎗轟擊打斃番賊六名燒燬房屋數十
間番賊等逃竄入山經撒拉回民就近搜捕殺斃番

賊十五名帶傷逃跑者十餘名經該文武各員派委
土千總楊萬士等喚出該族總管千戶觀木却合諭
令獻出積匪並拒敵番賊二十名出具永不為匪擔
劫甘結等語朕聞撒拉回民賦性獷悍時常械鬪素
非安靜之徒從未派令前往拒敵誠以用其力而不
稍示以恩必生怨望若遽加以獎勵而若輩自恃為
國出力其恣肆又有不可勝言者且回性貪婪恐未
易滿其覬覦之意倘此端一開將來該回番等互相

尋隙讎殺尤不成事流弊所滋不可不防之於始此案事屬既往姑勿深究至此次派用撒拉回民是否係恒敬一人主見抑曾與該督往返札商著楊

確察情形有無滋弊及究係何人主見之處據實明白覆奏將此諭令知之欽此臣跪讀之下仰見

皇上制取番回防微杜弊之至意曷勝欽服查撒拉回民素性獷悍誠非安靜之徒向來原不派用惟此案前據恒敬來信因思昂拉族番在於各路搶劫

撒拉回民馱販糧食牲畜甚至傷人屢據報案不能不加懲創當經恒敬飭派廳營文武帶領漢土弁兵三百名前往查拏賊賊復因所劫係撒拉回民之物所傷又係撒拉回民之人是以酌令隨同官兵嚮導路徑認指賊賊並以藉助聲威期於速獲完案原非派往勦辦迨至該處該番等膽敢恃衆抗拒鎗斃回民隨經該員等督率兵回直前勦捕始行畏懼逃竄該官兵即赴康家寨地方設法

緝辦以冀善為集事此臣前者接信始知恒敬酌
派兵回前往查辦番賊之原委也臣於得信後因
該賊番等始而結夥搶劫繼又抗拒查拏殊屬強
頑不法自應趕緊緝辦以靖邊隅既經恒敬業已
酌派官兵並率同回民前往指拏賊賊隨飛札諄
囑恒敬轉飭該員等務即設法妥辦切弗張皇致
滋事端去後嗣復接恒敬報稱業經該文武等設
法喚出該番族總管千戶觀木却合曉諭利害已

據獻出積匪並拒捕番賊押送西寧經恒敬訊明
分別辦理並據該千戶出具永不為匪甘結存案
飭令仍回原族住牧去訖此又辦理完案經臣循
例會同具奏之緣由也竊查卡外族番本與撒拉
回民毘連而處素不相能回民尚有生業猶不致
尋擾族番惟番衆性逞而貪往往不免有搶劫回
民之事雖經地方文武設法查辦無如遠在卡外
又係生番勢非禁令所能遙制此次該番等屢屢

搶劫回民並敢傷人本係釁由自肇該回民遵例
報官未敢私相報復尚屬知法倘將來該族番再
有尋隙劫殺等事當曉諭回民仍行報官查辦總
不准擅自相讎如違一併究懲似不致別滋流弊
至恒敬辦理此案酌令回民隨同官兵前往原係
引導路徑指認贓賊並藉以稍助聲威起見亦屬
就案辦案並非無故派遣惟臣接信在後雖未先
事咨商第向來番案事件例本該大臣就近辦理

咨報到日再行分別奏咨會銜辦理謹

奏奉

上諭前據楊

等奏貴德卡外思昂拉番族搶劫派

用撒拉回民彈壓搜捕朕思撒拉回民賦性獷悍向

來卡外小有不靖從未派令前往拒敵當降旨令楊

將此次派用撒拉回民究係何人主見據實覆

奏茲據奏恒敬酌派兵回前往後始行札知該督是

此次派用撒拉回民自係恒敬一人主見不知事體

之輕重實屬冒昧著傳旨申飭嗣後卡外如有搶劫
等案不得派用回民仍令報官查辦以杜流弊將此
各諭令知之欽此

十一日會同

欽命揚威將軍大學士長公齡

奏為遵

旨會同悉心籌議據實奏

聞事竊臣等承准軍機大臣字寄道光十二年二月二

十八日奉

上諭據御史達鏞奏新疆換防章程宜籌經久請飭加
變通一摺係因更換防兵糜費酌請變通以為經久
之計是否可行著長齡楊體察情形悉心籌議
據實具奏等因欽此臣長齡當將俟與臣楊

面時遵

旨悉心妥議再行覆奏附摺陳明在案茲於六月初八
日臣長齡行抵蘭州與臣楊面為商確竊以

新疆情形南北不同北路平定準夷殲除殆盡沃
野千里足任開屯始能滿漢並移迄今視為樂土
南路於平定之初只殲頭目其餘回衆仍令各安
本業當日設立防兵不過藉資彈壓定賦徵糧以
供兵食至今七十餘年如果可改駐防前人必有
議及此者且現在回疆八城統計滿漢防兵一萬
數千名若如所請盡改駐防是但知目下移改駐
防以免輪派之繁而不知改駐防實非因地制宜

之道除原奏內所稱軍興出力民勇充足一節查
該民勇等事竣蒙

恩釋回早經咨送歸籍毋庸置議外其餘謹就臣等管
見所及詳為我

皇上陳之

一原奏伊犁滿州營生齒日繁新例駐防餘丁准
挑綠營若將伊犁鎮屬抽撥一兩前往南路駐
防以旂人挑補空缺等語

查伊犁為新疆根本之地外控諸夷時患民少
兵單現在滿營生齒日繁綠營亦生齒日繁焉
有空缺若挑補滿營餘丁抽撥南疆無論滿漢
多則本境空虛少則無濟於事且一經移駐即
永為南疆之人攜眷赴防拋離鄉井長途跋涉
已懷安土重遷而立業成家所費復鉅官不能
逐一經理轉致失所堪虞合計一二營兵數又
不能滿抵防額未免徒事更張

一原奏目下防兵征兵內擇其年壯技嫻現無老親及家有次丁者派充駐防等語

查此次添調換防兵丁今春臣等往返札商原欲就征兵內挑留惟據各營將弁稟稱各兵丁以前歲匆匆赴援置辦衣履悉由借貸抵營以後又已年餘回疆食用倍昂所得鹽菜銀兩尚不敷用若再留防未免累益增累是以停止今若於防兵征兵內擇其年壯技嫻者強為抑勒

其家無老親難保必有次丁照應廬墓其家有次丁者無不樂依父母安肯拋離若紛紛查詢轉致有所藉口徒事周張

一原奏該兵家屬官為資送到防數年之後各有室家一切差操勇於自衛其得力必倍於客兵等語

查向來防兵皆係單身赴防若改為駐防官為資送家屬各該營相距回疆遠則萬里近則數

千里長途戈壁其受累亦必難堪而到防後以錢糧而論防兵歲支鹽菜較內地馬兵歲支十六兩之數雖屬有贏惟回疆食物昂貴以一兵所得供一兵所用自可省儉敷衍一經移眷則須養贍全家斷不足用又安能按其家屬名口從而增益之以房屋而論向來防所按兵建蓋計五兵共駐一間若令攜眷則一兵須駐兩間兵房即加九倍現在各城亦無許多隙地可以

添蓋而眷兵更不便於城外散處以柴薪而論
回疆素不產煤如喀什噶爾英吉沙爾葉爾羌
等城所需柴薪皆從百餘里外採取而五兵同
爨尚可輪流馱運若改為眷兵只能各顧一家
一人所採未必敷一家之用豈能復事差操以
調遣而論防兵無家室之累隨調即可隨發若
改為駐防既有內顧之憂但能自守疆圉必不
能多派分援是駐防兵丁實不如換防之得力

一原奏善後事竣西路無用多兵該處地饒土廣
不難散遣歸農等語

查回疆雖屬遼濶可耕之地盡是回人本業其
餘非沙漠即田高水低不能引溉現在屯田之
議原期寓兵於農只有喀什噶爾附城喀拉赫
依地畝一段係以叛產互換始能分撥認種其
大河拐毛拉巴什賽克三等處尚須俟招集民
人多寡分地試種力移歸內地即與罪遣無異

此則斷不可行應毋庸議

以上各情形皆臣等所素悉茲復悉心體察該御史所奏均屬窒礙難行至上次及此次所添兵數陝甘兩省換防往來鹽菜口糧軍裝等費較從前雖有所增然現准浩罕通商如一二年後卡外相安即可將兵數陸續減撤經費大可節省而陝甘各營亦可次第歸伍回疆防兵仍請按年輪換以循舊制而免紛更理合據實具

奏再臣長齡於拜摺後即起程回京覆

命合併陳明謹

奏奉

上諭長齡等議駁御史達鋪新疆換防章程請加變通
一摺前據該御史奏更換防兵糜費請為經久之計
朕即覺其不可行茲據長齡等指駁四條朕詳加披
閱所議俱是該御史所奏著毋庸議長齡現已自蘭
州起程著於路過山西時將交審案件訊明即行來

京覆命將此諭知長齡並諭楊

知之欽此

七月二十八日會同烏魯木齊都統成公格

奏為巴里坤等處馬廠孳生漸多不能容牧酌擬變
價留牧章程以充兵餉而疏馬政恭摺奏

聞事竊照巴里坤古城濟木薩三處孳生馬廠初設之
時每廠各設牧兵一百二十名每兵一名牧馬
二十四匹共牧馬二千九百餘匹迨後孳生蕃息
地不加廣而馬數日增遂有馬多廠窄照料難週

之患節經歷任都統及前督臣先後具奏籌議疏
通或因馬數挑變過多或因定價交限未宜均經
部臣議駁臣成格到任適值古城馬廠又有虧缺
四千餘匹之案奉

命就近查辦未幾巴里坤廠亦有因災報倒情事其在
歷任廠員固屬經牧不善而究其所以虧短之由
實緣馬多廠窄不能容牧之所致則是孳生愈多
倒傷愈甚一經虧額動輒數千餘匹迨至議賠議

罰而無力武弁俱各極口稱累若欲免其著追不
但馬與價銀悉歸烏有且恐厥員不知畏懼致啓
牟利營私之漸其流弊有不可勝言者查濟木薩
一廠前因移牧未久尚可勉力及額近年以來亦
聞有漸不可支之勢自非亟議疏通竊恐不數年
間三廠同歸一轍虧缺纍纍不識伊於胡底以有
用之兵力牧此不堪乘騎之劣馬空有孳生之名
而無濟用之實糜餉曠操兼貽賠罰通盤籌思百

無一可是以臣成格前奏虧案摺內業將必須會
商督臣另議章程之處據實聲明仰蒙

聖恩勅部核議在案嗣准部咨內稱查歷屆虧缺案內
率皆以馬多厰窄致被虧損為詞所議章程務須
將稱為馬多厰窄者必如何辦理方不至擁擠傷
殘稱為照料難週者必如何辦理方足敷牧放之
處總期永遠不致虧短實與厰牧有裨行令悉心
妥議具奏前來臣成格當將接到部覆移咨臣楊

會商妥辦臣楊

查道光九年三月間曾

經會同前任都統臣英惠具奏一次議將該三處
馬廠共留馬一萬七千六百匹永遠作為定額餘
馬盡行變價充公部議以牧廠取孳正期多多益
善何得定以額限咨令仍照六年批變一次每百
匹准批六匹之例辦理餘俱議駁不准旋因回疆
軍務復興未及覆議具奏迄今又閱三年廠馬愈
形擁擠在部臣律以孳生名義原期以多為貴不

宜限定額數第以原牧二千九百餘匹之厰地而欲使現牧一萬數千之馬有飽騰而無餓損其勢固有所不能矧再多孳豈能容牧臣等受

恩極重深知馬厰之弊已及二十餘年幾成積重難返理應隨時制宜據實陳奏萬不敢因前奏業經部駁稍存瞻徇迴護之見茲已往返商榷悉心妥議姑就原設厰地之寬狹酌以現牧馬數之多寡其應循例取孳者仍請照舊辦理其應隨時變價者

亦請量為疏通至於留牧之數不敢過少亦無取
乎過多庶牧兵不須再為增添而照料可期週到
水草務使足敷牧放而永遠可杜損虧總期兵無
虛糜馬皆騰壯實與厥務餉項兩有裨益敬擬各
條分晰另繕清單恭呈

御覽候奉

俞允再由臣成格就近妥員前往挑驗分晰飭造清冊
送部查核謹

奏

謹將酌擬變價留牧各條逐一另繕清單恭呈

御覽

一 廠地不敷牧放宜量為疏通以防擁擠也查孳
生馬廠三處截至道光十一年六月底印烙後
止巴里坤廠共牧大小兒騾馬一萬二千七
百九十七匹古城廠共牧八千一百五十六匹
濟木薩廠共牧一萬五千九百二匹三廠實共

牧大小兒騾馬三萬六千八百五十五匹每
廠較之原牧二千九百餘匹實增至四五倍不
等廠地窄狹實難容牧節經前任都統委員另
覓草廠據報均被戶民開犁殆盡實無隙地可
遷是以歷年以來惟有議請減額庶免擁擠損
傷俱因格於部議未奉准行遷延日久百弊叢
生亟宜另議章程妥為辦理今臣等察照從前
奏案叅以現在時宜悉心商榷請於每廠各選

壯健大兒騾馬六千匹留廠取孳作為正牧又
於巴里坤廠帶牧四歲馬駒九百六十一匹三
歲馬駒七百九十三匹二歲馬駒八百七匹備
撥驢馬二百九十五匹共酌留大小兒騾驢馬
八千八百五十六匹擬挑變口老殘廢碎小馬
三千九百四十一匹又於古城廠帶牧四歲馬
駒三百六十七匹三歲馬駒六百五十一匹二
歲馬駒六百九十四匹備撥罰賠驢馬一百五

十三匹共酌留大小兒騾驢馬七千八百六十
五匹擬挑變口老殘廢碎小馬二百九十一匹
又於濟木薩廠帶牧四歲馬駒一千二百三十
九匹三歲馬駒一千三百一匹二歲馬駒一千
三百五十三匹罰賠驢馬一十一匹共酌留大
小兒騾驢馬九千九百四匹擬挑變口老殘廢
碎小馬五千九百九十八匹以上三廠共酌留
大小兒騾驢馬二萬六千六百二十五匹擬挑

變口老殘廢碎小馬一萬二百三十匹如蒙
俞允再行就近委員赴廠查驗分別等次造冊咨部立
案以備查核庶廠地漸就寬裕馬數亦得疏通
而公用並可稍增矣

一收兵不敷照料宜毋庸添設以節虛糜也查每
廠各設牧兵一百二十二名除各按馬步兵丁
應關季餉支領外每名月支鹽菜銀六錢小建
扣銀二分勒鞋銀三錢不除小建一共歲支銀

一千三百餘兩三廠共歲支鹽菜鞞鞋銀三千九百餘兩照依每廠現牧馬八千餘匹至一萬五千餘匹計算每兵一名合牧馬六七十匹至一百二十餘匹不等較之原額實增數倍按例每馬二十四匹應添牧兵一名共添牧兵一千一百六十餘名則營伍必至空虛不特邊防重地恐悞差操更恐鹽菜鞞鞋歲須加增銀一萬二千六百餘兩

國家支用有常豈宜如此糜費今臣等酌議每廠各
留取孳大兒騾馬六千匹請即在於原設牧兵
名下均勻攤牧每兵一名合牧馬四十九匹有
奇此項馬匹作為正牧不許再有虧短其帶牧
兒騾馬駒分年印烙多寡不一三廠亦難一律
不過經牧四年即應歸入大馬羣內至於出羣
驕馬亦不過暫牧一時旋即撥用均不必算入
正數之內應請毋庸另添牧兵致曠操防如此

辦理雖較原牧馬數不無加增而視現牧之馬
實屬減去不少庶照料可期周到而經費亦可
節省矣

一定價無取過重以紓民力也溯查乾隆五十一
年前督臣福 奏准巴里坤古城木壘三廠共
挑出不堪孳生兒騾馬一千五百七十一匹內
頭等馬三百六十匹每匹作價銀四兩議令撥
屯耕作毋庸交價二等馬三百九十四匹每匹

定作價銀三兩交戶民領買三等馬四百八十八匹每匹作價銀二兩交地方官變價四等馬三百二十九匹若照委員所稟每匹作價銀一兩五錢為數過少應每匹作價銀二兩著落經牧不善之廠員賠補以儆將來久經辦理在案迨至嘉慶十三年前督臣長麟因古城濟木薩二廠共有馬二萬二千餘匹擁擠傷損每廠擬留兒騾馬五千五百匹餘馬欲就騰壯時盡行

變價莫可多得價值請照內地馬價酌減一兩
二等馬變價七兩三等馬變價六兩只因定價
過重戶民不肯領買復經前督臣那彥成議以
三等馬每匹五兩四等馬每匹四兩奏准通行
惟有巴里坤一廠仍照乾隆五十一七等年三
四等均以二兩作價舊章辦理以致輕重不均
實與地方未便嗣於道光九年臣楊 伏查
口外同一產馬之區其價本賤三廠價值不應

如此懸殊曾與前任都統臣英惠往返札商酌
中定價無論三四等馬每匹變價四兩奏請畫
一辦理旋經部臣議駁尚未另行議奏今臣成
格覆查此次請變馬匹實緣自嘉慶九年以後
孳馬愈多水草愈乏迄今二十餘年屢議屢駁
仍無定局或因擁擠以致傷殘或因餓凍而成
虧損是以議請挑變其有頭二等腴壯大馬俱
已選入留廠取孳六千匹數內此外均係挑而

又挑下剩口老殘廢碎小之馬若仍照五兩四兩定價委難出售况經兩次軍需之後元氣未復塞外貧民生計甚屬拮据即照前議一律四兩之價責令承買民力尚有不逮今昔情形本有不同臣楊亦不敢迴護前奏茲臣等公同商酌應請於此項口老殘廢碎小馬內飭令廠員再加挑選其稍强者作為三等每匹價銀三兩其餘作為四等每匹價銀二兩如有不足

二兩亦不便抑勒戶民領買應令廠員賠補足數俾經牧不善者亦知有所做戒如斯辦理庶馬價得其平允三廠亦歸畫一民力可期稍紓矣

一交價不可過遲以重餉項也查從前變價成案如乾隆五十一七等年三四等之馬均以二兩作價戶民樂於承買本無蒂欠及至嘉慶十三年以後定以三等馬由地方官變價五兩四等

馬由廠員變價四兩皆因定價過重不願領買
其由地方官變價者必須多方勸諭始肯具領
而無力小民又一時措辦不出是以有先領馬
匹後繳價銀之事以致拖欠累累一限再限經
年不完其由廠員變價者雖不能抑勒戶民而
一時承變不出亦間有潛以劣馬抵變好馬之
事則是定價一重弊端百出勢難保其必無殊
非核實辦公之道今三廠均請以三兩二兩定

價既已得其中平馬匹不難出售文官無須抑
勒戶民厥員亦不准抵換好馬應請嗣後不論
三等四等馬價均聽戶民自便持價赴官領買
隨買隨交不准拖欠變獲價銀刻即解交鎮迪
道庫報撥充餉實與公項有益且與馬政亦無
妨礙

一口老碎小之馬宜按年頂替出廠以資整頓也
查例載孳生騾馬四歲產駒兒馬五歲割鬃八

歲以上之驃馬撥補營缺二十歲以上之騾馬
及口老碎小之兒馬交地方官分別估變等語
今擬於孳生大兒騾馬之外酌留三年馬駒緣
至次年又有新產馬駒隨羣帶牧則前留四歲
之駒已及五歲應照十騾一兒算入大馬羣內
按年取孳下剩兒馬亦應割驃出羣以備撥補
營卡等用而大馬羣內二十歲以上之騾馬及
口老碎小之兒馬自應如數頂替出廠分別估

變始足以疏壅滯若俟三年均齊六年挑變期
內再為出售誠恐留牧日久不惟徒占厰地水
草有礙別項馬匹兼恐遇有損傷轉成無價可
變殊覺可惜今以每厰酌留六千匹大兒騾馬
計之每年例取馬駒六百六十餘匹雖產獲兒
騾若干不能預定然約畧計算不過十數年間
足可得馬六千匹即除割鬪兒馬另行備撥外
其餘配駒兒騾亦不過二十年内足敷頂替大

兜騾馬六千匹一輪之數所有頂出口老碎小
之馬除挑選撥備屯工缺額外餘馬即照新定
三等四等馬價分別估變如遇是年驃馬不敷
撥補營卡等用即照內地價值請在此項變價
銀內如數動用買補勿庸遠赴內地請領以省
往返守候之煩餘剩價銀仍解道庫充餉如斯
逸年頂替輪轉則不待二十年而廠馬悉成壯
健矣實足以收厥牧之效

一取孳大兒騾馬不准以馬駒抵補以杜弊端也
查馬廠向辦舊章如遇原牧孳生大兒騾馬數
內有缺准以續得孳生馬駒通融抵補又道光
三年新例內載如於原牧數內缺少者牧副草
退牧兵廂責八十棍牧長斥革除照頭等罰分
賠外所缺原牧馬匹仍請著落牧長賠補二成
提督總兵遊擊分賠八成賠交馬匹仍歸原羣
扣限取孳各等因歷經遵照辦理在案第查近

年以來厰馬過多倒傷益甚一厰之內有將取
孳大兒騾馬虧額至數千匹者若盡將續得馬
駒抵補虧額數內則至次年產駒之期尚未及
歲憑何取孳如此遞年抵補必至馬駒與大馬
俱虧厰務之壞實由於此是以臣成格前於巡
閱營伍時順到馬厰查點馬數目覩口老殘廢
之馬尚屬有限其碎小口稚之駒為數實多在
積弊之日厰員顧惜處分為一時避重就輕之

計固屬不得不然迨至相沿愈久其害愈烈終
須叅賠而後已此次批變留牧之後自宜量為
更正應請嗣後以每廠酌留大兒騾馬六千匹
作為原牧之數如有數內缺少者即責成經管
廠牧之員仍賠大馬歸廠取孳不准以續得馬
駒抵補前數如一年限內賠足免其糾叅倘有
再以馬駒抵補及當時隱諱不報致被查出者
即行指名糾叅從重究辦其餘產駒多寡及帶

牧騎馬馬駒能否如額均請仍照舊章分釐成
數俟均齊考成時再為辦理如斯更定新章則
大馬永無虧損而馬駒亦可及額矣實足以去
厥牧之害

以上六條俱係臣等通盤籌畫妥議章程
以期牧政餉項操防耕屯均有裨益不
致顧此失彼是以不能盡照從前成例
辦理合併聲明

奉

硃批兵部議奏欽此

八月二十日

奏為遵

旨查明新疆等處商販茶斤以及青海蒙番易茶各舊
章與官引均無窒礙緣由恭摺履

奏事竊臣接准都察院來咨道光十二年三月十九

日奉

旨此素甘肅茶商畢新興呈控各處私販採買湖茶含糊納稅由別途運入陝甘新疆售賣又西海蒙古地方嚴禁暢賣茶封以致引滯課絀等情控關私販病商必應嚴行緝禁至所稱新疆裁革私茶收稅可以增引裕課並西海蒙古地方禁賣茶封於民食官引均有滯碍是否係實在情形著楊 確切查明辦理茶商畢新興該部照例解往備質欽此咨行前來
臣遵即督率藩司方載豫署臬司圖明額署蘭州

道張應銓親提該商畢新興到案公同研訊緣畢
新興即畢延清係陝西涇陽縣回民報捐監生向
充甘省茶務散商承引銷茶嗣復點充總商甘肅
省西寧莊浪甘州三茶司原額茶引二萬八千九
百九十六道額銷茶二百一十餘萬斤納課銀一
十二萬七千兩零應納課銀於每年奏銷前儘數
清款倘有蒂欠照例鎖禁比追其茶斤向由商人
自赴湖南安化縣採買運至河南陝州驗引由陝

西潼關廳秤盤截角運甘行銷該商畢新興點充
總商後因陝西省之西安鳳翔同州漢中四府舊
係引茶地面康熙年間因陝民素食本省紫陽茶
將額引一百三十二道改撥甘商行銷今陝省民
人亦赴湖南買茶由商州龍駒寨納稅在陝省境
內售賣該商以陝甘接壤恐陝民所賣湖茶闖入
甘境有碍引茶欲將撥甘茶引仍復改歸陝省行
銷禁止陝民販賣湖茶又新疆各城原為甘商行

茶地面道光六年議准北商所販白毫武彝等項
雜茶由殺虎口歸化城前赴南北兩路在於古城
納稅分運行銷該商畢新興因甘商不得獨擅其
利又風聞北商有將湖茶改易名色納稅行銷之
事希冀裁撤稅局禁止北商販茶赴新疆售賣又
西寧蒙番地方行銷西司引茶自道光三年辦理
番案議定章程凡蒙番易買糧食均由西寧辦事
大臣給票赴內地置買每糧一石配茶二封或止

買茶葉每票亦不得過三封其附近蒙番之丹噶爾貴德大通永安等處卡隘恐漢奸販茶出卡接濟野番由該地方文武派差兵役不分卡內卡外一體嚴密稽查至民間買食茶斤仍聽自行售賣該商卑新興慮及西司引茶不能暢銷遂藉稱現行各章有碍引課前後在臣及蘭州道衙門具稟經臣查明該商所請或事涉紛更或有碍邊防未便准行均經議飭循舊辦理在案茲該商復以前

情赴都察院衙門呈訴奏奉

諭旨解回查辦此該商畢新興京控之實在原委也臣
復督同司道檢查甘省行茶歷定舊章恭以現在
地方情形並該商呈訴各條逐加確核如所呈陝
西無引私販前赴湖南採茶改裝式樣運入甘境
有害引課請嚴禁陝省民人興販湖茶一條查陝
西省從前原額引一百三十二道康熙年間因陝
民多食價廉之紫陽茶商茶本重值昂以致引積

課懸爰照通融告改之例改歸甘莊二司行銷是
陝西引茶既改撥甘省陝省西安等四府即屬無
引地面民人零星赴湖販茶在陝納稅售賣自不
在應禁之例且自改撥茶引以後迄今百有餘年
相安已久既不應禁陝省販賣湖茶即不便限令
民間僅食紫陽茶一種從前甘商亦從無仍將原
引改歸陝地行銷之議况陝引原額僅一百三十
二道每歲計納課銀五百餘兩甘省行茶地面甚

寬斷無積滯之虞今該商畢新興請將前項茶引
改歸陝省行銷並禁陝民販賣湖茶在該商引不
加增而銷地加廣固為得計但以百年無弊之舊
章一旦遽事紛更不免擾累閭閻應請毋庸置議
如有奸商將無引湖茶闖入甘境售銷即屬私販
向本責成陝甘接壤處所地方文武巡緝應再嚴
飭實力稽查以杜潛入之弊又所呈陝民因有無
引湖茶買食將本地所產之紫陽茶改裝式樣假

名雜貨運入甘省引地以致引課積滯請嚴飭陝
省產茶即在陝售賣接濟民食不准運甘一條查
陝省所產紫陽茶向來止准在陝地行銷原不准
運入甘境因恐奸民偷帶私售歷經責令地方文
武查拏本在例禁應請仍照舊章飭屬一體緝捕
以絕私販又所呈北販每年赴湖採茶由北口運
至新疆古城假名雜茶分運新疆南北各城售賣
茶多稅少請裁革新疆茶稅該商等量地增引一

條查新疆地方幅頓遼濶從前原准北商販茶赴
南北兩路售銷道光元年曾禁止北商不准在新
疆賣茶嗣經原任伊犁將軍慶祥查明北商隨營
貿易相安已久仍請准北商行銷雜茶經戶部議
奏交臣會同前任伊犁將軍長齡等妥議經臣等
查明新疆地方自乾隆年間通商以來北商運販
雜茶已歷多年未便率更成例隨即議定在於古
城增設茶稅祇准北商興販白毫武彝等項雜茶

如有影射夾帶附茶以私茶論罪所征稅銀以抵引課之不足

奏奉

諭旨遵行迄今數載夷民買食稱便且分別茶色界限判然如北商私帶附茶無難按例懲辦自不致有改裝影射之弊若照該商所控裁撤茶稅禁止北商運販固遂甘肅壟斷之私恐貽邊徼食貴之虞事屬格碍難行又所呈西寧蒙古地方禁賣茶封

官引積滯之缺食茶請准西海蒙古暢賣茶封一條查西寧蒙番請票易買糧茶於控制邊夷行銷商茶原屬並行不悖自道光三年嚴定章程禁止蒙番私買糧茶以來青海地方近年甚覺安靜今若遽弛成禁准令該商與蒙番自相交易暢賣茶封難保蒙番及內地奸民不故^智慮復萌多販出卡致啓接濟野番之漸應請照舊章分別卡內卡外嚴行稽查以靖邊隅至西寧所屬民間買食引茶

原聽商人自行售賣並未概行查禁與民食亦無
滯碍以上各條逐加詰訊該商畢新興惟俯首自
認冒昧別無置喙應即擬結此案監生畢新興即
畢延清充膺茶務總商承引辦課因恐陝省私茶
闖入甘境北商夾帶附茶赴新疆售賣並青海蒙
番易茶章程綦嚴慮及引茶不能暢銷輒欲變更
舊章以格碍難行之事赴京撫砌呈訴實屬謬妄
惟核其所呈究為疏通引茶起見與捏情告人者

有間應請將該商畢新興照不應重律擬杖八十
係多事好訟照例斥革監生折責發落惟該商尚
有經手未完課項若即革退總商轉得置身事外
應仍留充總商責成行茶辦課倘有拖欠情弊隨
時從嚴懲辦以肅茶法而重

國課謹

奏奉

上諭楊

奏新疆等處販茶易茶舊章與官引均無

窒礙一摺此案監生畢新興即畢延清前以私販病
商等情赴都察院具控當降旨交楊 確查茲據

查明畢新興充當茶務總商承引辦課因恐陝省私
茶闖入甘境北商夾帶附茶赴新疆售賣並青海蒙
番易茶章程綦嚴慮及引茶不能暢銷輒欲變更舊
章赴京控訴實屬謬妄念其所呈各款究為疏通引
茶起見與捏情告人者有間畢新興著杖八十革去
監生仍留充總商責成行茶辦課該督務當隨時稽

查倘有拖欠情弊即行從嚴懲辦以肅茶法而重國課欽此

二十二日

奏為遵

旨查訊明確據實覆奏事竊臣承准軍機大臣字寄道

光十二年三月二十一日奉

上諭據庫倫辦事大臣倫布多爾濟等奏有被張逆擄出卡外之民人朱田趙李盛榮田關馬添喜吳二啓

劉起鳳年登喜等七名逃往俄羅斯經俄羅斯送至庫倫已有旨諭倫布多爾濟等解至甘肅省城交楊

審訊矣楊

侯朱田趙等到省即詳細詢問

該民人等於道光六年經張逆擄至浩罕後拘囚何處曾給回子使喚係何名姓係張逆何項親屬該民人等是否從逆至道光七年緣何逃回浩罕曾否遣人來追此兩年間該民人等在浩罕定知該處一切情形是否尚有該逆餘黨意圖窺伺該督當諭令毋

稍畏懼將實情供吐詢明後詳晰據實具奏候旨辨
理將此諭令知之欽此欽遵在案茲於六月初八日
前途將該民人等派員押解到蘭臣遵即督同藩
司方載豫署臬司圖明額提集該民人等隔別詳
細詢問緣朱田趙即朱添照籍隸山西祁縣因習
天主教案內擬遣發往喀什噶爾為奴恭逢嘉慶
二十五年八月二十七日

恩詔詢明該犯不願出教照舊安置李盛榮田關馬添

喜吳二啓劉起鳳年登喜籍各不同均係內地回
民先後出口至喀什噶爾地方貿易營生道光六
年六月逆回張格爾入卡滋事圍困喀什噶爾原
任叅贊大臣慶祥派令該民人等隨同官兵守城
打仗俱各帶有鎗傷八月二十五日城破先後被
賊擄去割辮圍禁逼脅隨順因該民人等俱未允
從張逆當將年登喜分給伯克回子鄂吉米拉呼
使喚嗣該民人乘間欲逃復被安集延回子拿住

賣給布噶爾王子巴吐爾罕為奴餘俱送至浩罕
經浩罕伯克將劉起鳳吳二啓二人送給布噶爾
王子伍瑪爾罕為奴伍瑪爾罕復分給伯克明巴
什皮皮和卓處服役嗣伍瑪爾罕與其族人巴吐
爾罕打仗被巴吐爾罕逐去自立為罕將該民人
等喚去使用欲與配給回婦該民人等未允時被
折磨打罵其朱田趙田關李盛榮馬添喜四名亦
經浩罕伯克分給安集延回子巴拉第依散伯克

呢雅攷明巴什四人為奴李盛榮旋被呢雅攷轉
賣與塔什幹撒底滿服役該民人等因不懂回子
言語時被凌辱思念家鄉皆欲乘便逃回因詢知
自浩罕向東行走到處有坐卡回子防守嚴緊拿
獲逃回難民均即殺壞其巴達克山一帶雖亦有
通中國路徑但無好水食之多致病死唯自浩罕
迤西俱係外夷無人盤詰朱田趙李盛榮馬添喜
田關四人分為二起先後乘間逸出向西行走沿

途在各回莊乞食行至浩罕布噶爾交界邊卡該處守卡回子因該民人等俱穿纏頭衣服未經盤問該民人等混出卡外至布噶爾屬之烏魯幹赤地方會遇自布噶爾逃出之年登喜因聞該處往俄羅斯貿易回子言稱俄羅斯有通中國路徑遂跟隨貿易回子行走至馬依箭噶爾地方適劉起鳳吳二啓亦自布噶爾逃出踵至七人結伴同行沿途代回子拉駝抬貨乞食度用迨至俄羅斯屬

之哦林布格爾邊界該民人等向俄羅斯守卡夷
目討票該夷目以朱田趙等七人既係中國民人
須回明該國王子方能給票送回隨撥派夷人將
該民人等用車送至依里古斯地方交給俄羅斯
毛拉該夷目因該民人等衣不蔽體進城回明俄
羅斯王子給與衣服盤費正在護送起身間因該
處北海水發難以行走將該民人等復留住管顧
飲食並另給錢文使用嗣海水結凍始派夷人由

恰克圖送至庫倫經庫倫辦事大臣審明具
奏轉解來甘此該民人等被擄出卡及乘機逃回之
實在原委也臣以該民人等在外夷數年之久該
處一切情形自必知之甚悉當以該民人等係被
難擄去既未從賊又能自行逃回本屬無罪之人
諭令毋懷疑懼據實供吐隨據朱田趙等供稱伊
等在浩罕時經浩罕將伊等分給之回子是否張
逆親屬因不懂回子言語又無處可問實不知其

三下共三下
詳細至張逆生有一子現在浩罕伊等亦曾聽聞
並未見過又浩罕人雖高大作事蠢鈍該處出產
棉布米糧甚賤唯缺乏銀錢道光十年浩罕復進
卡滋事伊等相離甚遠並未聽聞伊等逃後浩罕
回子想未料及伊等向西行走所以未見有人來
追並據劉起鳳吳二啓供稱布噶爾所屬比浩罕
人多浩罕平素甚為敬服伊等在布噶爾時曾聞
浩罕因恐大兵出卡征勦遣人向布噶爾借兵布

噶爾以不敢輕惹

天朝之言回覆未經借給又據僉供伊等自俄羅斯起
身後在路聽聞浩罕遣人與俄羅斯進象一隻未
經收受其因何進象並不收之故伊等無從知悉
等情供吐如繪臣恐尚有隱諱情弊復再三開導
詳細詰問該民人等堅供實係被擄逃回委無降
順張逆拒敵官兵及招娶回婦情事矢口不移似
無道飾查驗該民人等身帶鎊傷屬實其朱田趙

等六名髮長三四寸不等惟劉起鳳髮長尺許供

在布噶爾時私行蓄長其餘係在俄羅斯續留是以參差不齊等語臣查該民人等當張逆變亂之時曾隨官兵守城打仗帶有鎗傷旋因城破被擄出卡因不降順分給回子為奴所供未經從逆之處似尚可信現將該民人等分別禁管聽候諭旨遵辦再朱田趙一犯因習天主教擬遣發回城為奴現據該犯供稱仍不願出教合併陳明謹

奏奉

硃批刑部議奏欽此

二十七日會同西寧辦事大臣恒公敬

奏為賊番偷渡搶劫拒傷官兵現在設法查辦情形

恭摺奏

聞事竊照本年七月二十三日據輔國公珠爾默特圖

布坦策鄂旂下蒙古赴防所具報有番賊百餘人

將附近各旂牧放牲畜搶去稟請查辦等情當經

駐防都司甯顯文帶領弁兵數十名馳往追捕遇
賊接仗不意該都司竟帶數傷陣亡兵七名帶傷
兵二十四名並未拏獲一賊臣恒敬得信後即飛
飭循化貴德二廳營速為密訪是否河南番賊偷
渡係屬何族查明稟報一面酌帶馬步兵三百名
親赴防所督飭追緝並知會臣楊核商辦理
旋據統領防兵之永安營遊擊冉貴稟報於月之
二十八日帶兵在卡巡查至河透溝口地方遇見

賊番接仗殺斃數賊奪獲牛羊三十餘隻現在飭
派兵弁分路搜緝又據河南循貴二廳營稟報查
得噶布古僻靜河沿地方有拆毀木筏形迹訪係
加咱等四族番賊偷渡業已回巢各等情查河南
生熟各番近年以來頗覺安靜此次加咱等四族
賊番膽敢於僻靜河沿紮筏偷渡肆行搶掠並拒
傷官兵實屬不法亟應趕緊搜捕嚴辦以免另滋
事端臣等現已會飭署河州鎮總兵副將馬鳴謙

帶兵五百名督同循貴二廳營著落該管千百戶
勒限正賊務期按名弋獲盡法懲治俾靖邊隅俟
該官兵等查捕如何情形稟報到日再行具

奏至遊擊冉貴係統領防兵之員於河南番賊偷渡
失於防範未能先事覺察都司甯顯文帶兵往捕
不知慎重致傷官兵均有應得之咎相應將該二
員請

旨一併交部議處仍責令帶兵上緊搜捕一俟完案再

同失察之該管千百戶及傷亡官兵另為分別辨
理謹

奏奉

上諭楊 等奏賊番偷渡搶劫拒傷官兵現設法查
辦一摺此次河南賊番加咱等四族膽敢於噶布古
僻靜河沿地方紮筏偷渡將附近各旂牧放牲畜肆
行搶掠當經駐防都司甯顯文帶兵往捕致被拒傷
官兵適統領防兵永安營遊擊冉貴帶兵在卡巡查

遇賊接仗殺斃數賊奪獲牛羊三千餘隻現飭兵弁
四路搜緝遊擊冉貴係統領防兵之員於賊番偷渡
失於防範未能先事覺察都司甯顯文帶兵往捕不
知慎重致傷官兵均有應得之咎著一併交部議處
該督等即飭署河州鎮總兵副將馬鳴謙帶兵五百
名督同循化貴德二廳營酌帶馬步兵三百名親赴
防所督飭追緝並著落該管千百戶勒限正賊將搶
掠牲畜悉數呈繳所有拒捕賊番務期按名弋獲盡

法懲治毋使漏網再貴甯顯文仍責令帶兵上緊搜捕俟完案後再同失察之該管千百戶及傷亡官兵另行分別辦理欽此

閏九月十九日

奏為懃陳感悚下忱恭摺奏

聞事竊臣接准部咨道光十二年八月十二日欽奉

上諭楊國楨奏知縣人地未宜酌請對調一摺據稱中牟縣知縣黃元柱年逾六旬於河工脩守事務不甚

相宜請與嵩縣知縣秦時中對調又湯陰縣知縣黃
樹烈年逾六十才具未能開展請與宜陽縣知縣施
熙對調黃元柱等如果未能稱職即當據實叅劾何
得以人地未宜僅予調簡試思簡缺亦有刑名錢穀
之責治理雖為較易豈衰庸之員所能勝任况黃元
柱任內有經徵未完降罰三案施熙歷俸未滿三年
秦時中任內有承緝命案三叅處分均與調補之例
不符該撫無非見好屬員為此遷就之舉所請著不

准行又前降旨令各督撫於所屬保舉數員各省俱
未奏到自係為慎重遴才起見該撫首先保奏至十
員之多所保各員內即有朕所稔知未必堪膺是舉
者可見所保亦未盡公允該撫久任河南於屬員有
舉無劾沽名釣譽全不認真豈實心任事之道著通
諭各督撫嗣後於屬員內如有才不稱職年力衰庸
者即當據實叅劾不得以人地未宜藉詞對調至所
保人員必實有操守廉潔才猷卓著素為民情愛戴

一登薦牘衆論翕然方為不負所舉倘該省人員祇能循分供職並非殊尤出衆不妨據實直陳斷不准濫竽充數用副朕求賢佐治循名責實至意欽此仰

見

皇上訓飭臣工於察吏薦賢之道

申誠精詳跪讀之下欽佩欽感俯念臣次子國楨渥受殊恩畀以河南巡撫重任宜如何殫竭悃忱實心實力

以冀稍酬

高厚隆施乃於所屬中牟等縣黃元柱等以繁調簡未
經詳核例案率行奏請又於奉

旨飭保賢員首先保奏至十人之多實屬冒昧糊塗幸
荷

聖恩寬大不加嚴譴並蒙

訓諭周詳感激之下倍深悚惕竊思臣父子叨沐

厚恩均膺疆寄涓埃未効愧悚難名現已寄信臣次子

國楨責令時加儆勉於應辦一切公事務當恪遵

恩訓矢以實心勉圖稱職臣亦惟有祇遵
諭旨嚴察屬員認真舉劾事事期於核實以仰副
皇上勤求治理諄諄訓誡之至意謹

奏

十月初九日

奏為遵

旨酌定百名裁二兵丁及所節經費數目恭摺覆奏事
竊臣前准軍機大臣字寄道光十一年十月二十

九日奉

上諭前據長齡等奏籌辦回疆善後事宜請將各省綠營兵額各按馬步守兵分別均勻於每百名內暫裁二名將裁缺所節經費交甘肅藩庫自道光十二年為始歸入回疆經費項下搭運前往以資支發當交該部查明具奏茲據奏各直省地方險易異宜兵數多寡不一且額兵有存城分汛之別存城者以備差操分汛者以專汛守人數較少自應由各省查明核

辦著各該省督撫各按全省兵數以每百名暫裁二
名核計共裁馬步守兵若干名於所屬標營內詳察
繁簡多寡情形遇有拔補開革事務所出之缺應陸
續分別扣除及所裁餉銀糧折馬乾並紅白卹賞銀
兩應酌定裁減數目一併迅速查明各行據實覆奏
將此各諭令知之欽此臣遵即檄飭陝西甘肅兩藩
司移查遵辦去後茲據陝西布政使揚名飭甘肅
布政使方載豫各詳賚陝甘提鎮標協各營裁減

兵丁馬匹節省餉乾糧料草束等項冊籍前來臣
覆查陝省各營裁減兵馬除陝西撫標應裁馬兵
五名步兵十五名守兵二名馬五匹每年節省銀
兩已准陝西撫臣史譜來咨業經自行專摺具

奏外其餘陝省固原西安延綏漢中陝安等提鎮標
協各營原額馬步守兵二萬七千四百八十名內
馬兵七千二百九十六名步兵一萬一千四百一
十五名守兵八千七百六十九名按百名酌裁二

名共應裁馬兵一百四十七名步兵二百二十八
名守兵一百七十五名馬一百四十七匹每年共
應節省餉乾糧料草折公費紅白等項銀一萬二
千五百五十二兩三錢三分九釐本色糧料六百
八十八石四斗過閏應多節省銀一千一十五兩
九錢三釐本色糧料二十二石一斗五升二合廿
省督標並烏魯木齊甘肅固原三提督暨涼州寧
夏西寧肅州河州巴里坤六鎮所屬各營原額馬

步守兵七萬一百三十一名內馬兵二萬六千二百
十六名步兵二萬八千八十七名守兵一萬六千
一十八名按百名酌裁二名共裁馬兵四百八十
八名步兵五百六十六名守兵三百四十六名按
馬兵一名裁馬一匹應裁馬四百八十八匹內除
烏魯木齊巴里坤肅州各提鎮屬營原設馬匹本
係不足一兵一馬之額兼之各營路當孔道地方
遼濶差操巡緝在在必須馬力請在各該營摘缺

緩補無馬馬兵內抵裁馬一百二十九匹又除固
原提標五營向在陝省估撥之四分留廠馬一十
四匹外止實應裁馬三百四十五匹每年應節省
餉乾糧料草折公費紅白等銀三萬四百八十三
兩四錢三分三釐九毫本色糧料七千八百四十
八石一斗一升三合九勺本色草一萬八千九百
三十八束過閏應多節省銀二千四百三兩一錢
七分四釐八毫八絲本色糧料四百五十八石一

斗一升三合以上陝甘二省通共應裁馬步守兵
一千九百五十名馬四百九十二匹每年共應節
省餉乾糧料草折公費紅白等項銀兩四萬三千
三十五兩七錢七分二釐九毫本色糧料八千五
百三十六石五斗一升三合九勺本色草一萬八
千九百三十八束遇閏應多節省銀三千四百一
十九兩七分七釐八毫八絲本色糧料四百八十
石二斗六升五合所節銀兩自當遵奉

論旨撥補回疆新增防兵經費之用至各提鎮協營裁
汰兵馬按百分之二核計有多裁少裁之處係按
各該處營制情形酌覈辦理現將總散細冊送部
查核謹

奏奉

硃批兵部知道欽此

同日片

奏再臣現准部咨奏奉

諭旨飭將此案兵額應如何暫裁之處迅速具奏等因
欽此伏查陝甘三提十鎮西達新疆營路紛繁兵
額較廣必須各按地方營制情形分別酌裁方臻
核實只因相距道路遙遠其各營議裁兵丁以及
應節錢糧等項數目多有不協之處往返查更有
需時日節經臣札飭嚴催始得彙齊定案是以具
奏稍遲合附陳明謹

奏奉

硃批覽欽此

同日

奏為勘明秋成歉薄地方懇請緩征錢糧以紓民力

恭摺奏

聞事竊查本年皋蘭等七州縣間有被雹被水之區前
經

奏明統俟秋成再行勘辦在案嗣又據渭源金縣隴
西安定環縣張掖平番靈州平羅秦州禮縣兩當

鎮原十三州縣秋禾偏被雹水霜雪亦即委員一併勘辦去後茲據藩司方載豫督飭印委各員先後查勘明確分晰議詳前來臣查本年夏間被災各地方原奏勘辦者七處又續報被災者一十三處共計二十處內除安定會寧西和環縣清水兩當等六縣夏秋禾苗備被災傷僅係一隅中之一隅收成不致甚歉民力尚可支持毋庸另議外惟被災較重之皋蘭渭源金縣隴西平番寧夏寧朔

靈州平羅涇州鎮原等一十一處並此外尚有秋
收歉薄兼辦兵差較重之固原州民力均屬拮据所
有應征本年新舊正借銀糧草束合無仰懇

聖恩准其緩至明歲秋後征收以抒民力其餘被災之
張掖秦州禮縣等三州縣雖受傷稍輕若新舊征
收民力實有不逮除將本年額賦錢糧照常征收
外其歷年舊欠正借銀糧並請緩征俾資調劑如
蒙

恩允俟奉到

諭旨即當敬刊謄黃徧行張掛以廣

皇仁而杜欺冒謹

奏奉

上諭揚

奏秋成歉薄地方請旨緩征一摺本年甘

肅夏間被災各地方共計二十處據該督查明安定
會寧西和環縣清水兩當等六縣尚不成災所有被
災較重之皋蘭渭源金縣隴西平番寧夏寧朔靈州

平羅涇州鎮原等一十一處及秋收歉薄兼辦兵差較重之固原州民力均屬拮据應征本年新舊正借銀糧草束著加恩准其緩至明歲秋後征收以抒民力其被災稍輕之張掖秦州禮縣等三州縣若將新舊征收民力亦有不逮除本年額賦錢糧照常征收外其歷年舊欠正借錢糧並著緩征俾資調劑該督即刊刻謄黃徧行曉諭務令實惠及民毋令吏胥滋弊以廣恩施而杜欺冒該部知道欽此

十一月初九日

奏為口外軍需正案報銷完竣恭摺奏

聞事竊查喀什噶爾軍需撤台後所有阿克蘇迤西各
城及大營報銷因各營官兵行駐無常支領糧餉
非僅一處其中起止月日參差不齊必須照依上
屆成案彙核查辦方免歧異當經揚威將軍大學
士長齡伊犁將軍玉麟叅贊大臣哈豐阿奏派總
辦糧務陝西潼商道慶祿帶同各糧員攜帶冊檔

回至蘭州會同藩司方載豫彙核查辦當經責令
原派各台糧員分司其事一面咨調各營官兵花
名前來飭令該司道等督率各員悉心稽核逐款
據實查造毋許稍涉浮冒嗣據該道慶祿按照例
案及部議章程彙為三案分晰造具總散各冊七
十一本由管理蘭州總局藩司方載豫等覆加確
核詳經臣次第

題銷在案計阿克蘇烏什葉爾羌和闐並喀什噶爾

大營自十年八月軍興起至十一年十一月底撤
台止先後收到蘭肅二局並各城及牛羊駝隻變
價扣收餘平等項共銀三百七十三萬四千一百
餘兩零各處撥運並採買共京斗小麥粟米馬料
二十一萬九千四百餘石零白麵一千三百五十
四萬七千八百餘斤零供支滿漢官兵民勇民遣
共二萬餘名按例報銷除官兵例支俸賞行裝鹽
菜夫駝車馬價銀安設軍台採買糧料價值脩理

橋道製造帳房口袋支發銀兩均係實用實銷惟
運送軍火糧餉道路延長需費較多經揚威將軍
長齡伊犁將軍玉麟叅贊大臣哈豐阿楊芳隨時
稽查諭令有可節省者照依前次據實開報經總
理阿克蘇軍需局和闐領隊大臣誠端阿克蘇辦
事大臣長清經理大營糧務陝西潼商道慶祿因
各城情形不同早遲催價不一易涉牽混當經查
照運糧數目及道路遠近統以七成給發節省三

成除由草地進兵罰賠銀三萬六千九百兩零係屬追繳還款之項外所有大營暨阿克蘇各城核計共應例銷銀三百五十三萬一千餘兩零除節省銀五十三萬六千餘兩零共計實用軍需銀三百萬零三百餘兩其餘糧料麵斤項下動用糧料一十一萬九千一百九十七石零白麵一千一百二十九萬一千一百六十斤零此外撥交各城糧餉局餉銀四十八萬二千七百兩零糧料三萬四

三
言
其
事
去
年
三
月
三
日

千二百八十一石零移交糧員同知馬佑龍接收

支發留駐征兵餉銀二千一萬四千二百兩糧料

六萬五千九百八十四石零白麵二百二十五萬

六千六百八十六斤零歸於各城並大營尾案另

行分別造報謹將收支銀糧開具清單恭呈

御覽並另造細數清冊咨送戶部聽候查核謹

奏奉

硃批戶部知道欽此

十五日

奏為恭謝

天恩事竊臣昨奉

恩頒

欽定平定回疆勦擒逆夷方畧一部當即望

闕叩頭祇領欽惟我

皇上堯文式煥

軒武遐敷

鴻功丕震四城

駿烈迅除三孽

握神算而西疆耆定迪維

前光集大勛而北面獻俘昭茲來許

丹毫端秉彌勞

宵旰於

深宮

琳籍遙頒儼守編羅於荒服巨行間執殍未効涓埃

天上賜書永珍什寵繹

帝歌之勅命八十卷有典有謨拜

皇極之敷言億萬年是獎是訓臣感激下忱恭繕摺叩

謝

天恩謹

奏奉

硃批覽欽此

十二月初二日會同委署西寧辦事大臣西寧鎮

總兵舒公通阿

奏為搜捕偷渡賊番事竣撤兵歸伍並將孥獲正賊
審明辦理各緣由恭摺奏

聞事竊查本年七月間有黃河迤南加咱等族野番偷
渡河北搶劫蒙古牲畜並拒傷追捕官兵竄逸回
巢當經臣揚會同前任西寧辦事大臣恒敬
奏明派令署河州鎮總兵馬鳴謙帶領官兵前往
河南搜捕懲辦旋因河北地方恐尚有潛匿賊匪

復派臣舒通阿酌帶官兵馳赴防所督率防河員弁分途偵緝旋據遊擊冉貴稟報在於空刁年沙地面兩次追及賊番約有七八十人該賊匪一見官兵即行奔竄官兵奮力追擊先後鎔斃賊匪二十餘人奪獲牛羊馬匹千餘餘賊逃至河沿踣淺曷渡又經守備馬進祿帶兵在於黃河南岸設伏阻截乘其半渡迎面兜擊復傷斃賊匪五六名落水死者八九名奪獲牛馬三十餘匹餘賊十數名

俱覓水逸去河北地方再無潛匿餘匪等情又據
署總兵馬鳴謙具報帶領弁兵馳抵河南傳集加
哨等各族千百戶等示以兵威曉以利害勒限縛
獻贓賊該千百戶等伏地認罪情愿依限拏賊自
効隨據陸續擒獲正賊十三名割獻帶傷賊匪首
級三顆搜繳原贓馬牛羊一千餘匹隻先後呈解
到營並據該千百戶等結稱此次偷渡賊番雖有
一百餘人但伊等所管加哨等四族為匪者實只

七十餘人餘賊係勾結四川所屬果落克番子現在加咱等四族賊番除殲斃及擒獻外尚有十數名逃匿他所未經回巢懇求寬限上緊躡緝交獻不敢隱匿延宕各等情先後具報前來臣等查河壯地方屢次搜查既無賊蹤而河南各族賊番僅有十數名未獲時值大雪封山官兵未便久駐番地徒滋糜費除嚴飭統領駐防遊擊冉貴等督率防河官兵並把守渡口之千百戶等加意稽巡並

偵緝未獲餘賊外隨即將前後所派官兵撤回歸
伍一面將現獲賊番加洛等十三名發交署西寧
府知府趙宜暄等訊詳去後茲據署府等審擬解
勘前來臣舒通阿隨親提各犯隔別研訊據現獲
賊番加洛 哈他勒依希 他什果 完的他爾
羊本 旦巴 札爾加 朶卜藏 完的丹巴
什朶洛 古录加等十二犯僉供實係河南加
咱 隆務 葉什羣 阿乃亥等族番子本年七

月間起意偷渡擄劫隨分投糾結各本族並果落
克番子約共一百餘人由噶布古僻靜河沿用樹
枝紮成木筏渡過河北在於巴燕諾後靠哩等地
方先後擄得不知姓名蒙古牧放牲畜約計四千
有餘共相俵分先後分起趕回途中及河岸屢遇
官兵追截放鎗抵敵致傷官兵旋拒旋逃踣淺過
河後潛回各族隨被拏獲解審又據奴科一犯供
係河北阿里克番子早年因貧逃往加咱族謀生

與尔卜藏熟識當尔卜藏渡水回巢時該犯見尔
卜藏被水冲蕩將其打撈上岸尔卜藏感伊救護
分給該犯贓羊八隻作為酬謝亦經加咱族千戶
一併拏解嚴詰委無隨同偷渡夥搶情事各等情
供吐如繪臣等查道光三年理藩院奏准嗣後青
海蒙古地方無論蒙古番子民人凡有執持弓矢
軍器白日邀劫道路及有殺人重情者即照刑律
不分首從皆斬立決仍於犯事地方梟首示衆又

歷次辦過偷渡成案凡河南野番偷渡河北者無論有無為匪均於審明後即行正法梟首河干各等因在案此案賊番加洛等十二犯起意糾結各番偷渡肆掠復敢拒捕致傷官兵贓供確鑿均屬罪無可逃臣舒通阿於審明後即派委文武員弁將該賊番加洛等十二犯一併押赴市曹立即處斬仍將首級梟示河干以昭炯戒其奴科一犯訊無偷渡搶劫重情其事後得受贓物係屬無知愚

番應從寬照不應重律杖八十加枷號兩月鞭責
發落押交該犯本族令該管千百戶等嚴行管束
已獲贓畜分給各事主具領未獲各犯及果落克
賊番臣等已嚴飭防河官兵並咨四川督臣一體
嚴緝獲日另結至失察偷渡之各該族千百戶等
均有應得之咎惟該千百戶等一聞官兵搜捕即
將逃回各賊實力擒獻尚知懼勉應請從寬免其
置議仍責令查緝餘賊務獲呈辦其前次都司甯

顯文追捕賊番傷亡兵丁容另咨部覈辦再此次
所派官兵應需口糧馱腳等項為數無多業經臣
等自行籌酌捐辦毋庸另請開銷以重

帑項謹

奏奉

硃批依議欽此

同日片

奏再統領防兵永安營遊擊冉貴前因番賊過河未

能先事防範以及駐防保安營都司甯顯文帶兵

追捕不知慎重致傷官兵當經臣楊會同前

任西寧辦事大臣恒敬叅奏奉

旨交部議處仍責令帶兵搜捕俟完案後再行辦理等

因欽此嗣准部咨各議以降二級調用暫停開缺

復經臣楊嚴飭該員等遵照趕緊設法搜捕

正賊以贖前愆去後茲查該員等自叅處以後隨

同臣舒通河及署總兵馬鳴謙在於黃河南北分

投查緝或追捕接仗節次殺賊奪獲牲畜或督同
番族千百戶等拏獻凶賊勒交贓物現在案內正
賊已獲多名原搶牛羊馬匹亦俱搜繳尚屬愧憤
出力且該員等夙昔屢次出征帶兵打仗均頗勇
往著績兼之久任邊營於防河事宜及番蒙情形
亦甚熟悉現值冰橋結凍巡防最要之時可否仰
懇

天恩俯准照該員等所降之級從寬予以留任俾令照

舊督率官兵加意稽巡認真防守用靖邊隅而資
熟手出自

皇上格外慈施謹

奏奉

上諭楊

等奏營員被叅愧奮出力請從寬留任等

語西寧統領防兵永安營遊擊冉貴前因番賊過河
未能先事防範駐防保安營都司甯顯文因帶兵追
捕不知慎重致傷官兵經楊
等奏叅部議各降

二級調用暫停開缺該員等自叅處以後在黃河南
北分枝查緝或追捕接仗節次殺賊或督同蕃族拏
獻凶賊勒交贓物現在正賊已獲多名原搶牛羊馬
匹亦俱搜繳尚知愧奮出力該員等屢次出征打仗
勇往久任邊營於防河亭宜及蒙古番子情形頗為
熟悉再貴甯顯文著加恩照所降之級從寬留任該
部知道欽此

是年四孫所生國楨出

道光十三年癸巳七十四歲

正月十二日

奏為懇請入覲

天顏以申戀悃恭摺奏

聞事竊臣荷蒙

高厚畀任陝甘自道光八年春間入京

陛見回任後扣至十一年春季已屆三年例應請覲因

維時正值回疆善後章程未定並辦蘭局報銷事

宜奏奉

諭旨俟善後大局已定內地報銷各案辦竣後彼時再
行奏請候旨遵行等因欽此欽遵在案茲查回疆一
切事宜均經辦定口內口外報銷正案亦已

題報全完所餘尾案凱兵甫經撤回各屬截數造報
一時尚未能到齊現在別無應辦要件自應遵
旨奏請合無仰懇

聖恩准念臣犬馬戀忱久而益摯准令入都

陞見叩覲

天顏恭聆

訓誨少申颺拜之誠藉遂就瞻之願如蒙

俞允查甘肅藩司方載豫業已赴京展覲署藩司色卜

星額到甘日淺一切情形尚未熟諳應請俟方載
豫回任後臣即行束裝北上為此恭摺奏請

訓示謹

奏奉

上諭楊 奏請入覲一摺現在回疆一切事宜均經
辦定口內口外報銷正案亦已題報全完惟本年係
應補查陝西甘肅營伍之期前經降旨派楊 查
閱藩司方載豫現因年老休致新任藩司光聰諧到
任尚需時日伊於甘肅一切情形素未熟諳楊
著暫緩來京陞見俟明年冬間再行奏請候旨遵行
將此諭令知之欽此

二十三日會同烏魯木齊都統成公格

奏為孳馬無地容牧部議既不准定額又不准多為
批變仍於現在牧政無益謹再覆議奏

聞事竊照臣等前因巴里坤等處孳馬日多廠地不能
容牧謹酌擬變價留牧章程繕列清單恭摺奏

聞奉

旨勅部核議在案嗣准部咨以臣等所奏馬多廠窄情
形事所必有但每廠只留大兒騾馬六千匹請將
所孳兒騾馬駒按年頂替出羣估變是廠名孳生

而馬匹永無贏餘似於牧政殊有關碍業經逐條酌核分別准駁奏奉

諭旨飭令嗣後每三年均齊挑變一次每百匹仍不得過六匹並以此次請挑變馬一萬二百三十匹幾及三分之一為數過多議駁不准咨覆遵辦前來臣等伏查自乾隆年間設立巴里坤孳生馬廠以來一廠止合牧馬二千九百餘匹此後每遇孳生蕃息即為分廠牧放迨至乾隆四十年分廠為三

至今已歷五十餘年每廠計牧馬一萬餘匹不等較前增至數倍又無再可設廠之處是以歷任總督都統等節次奏請疏通除定額挑變之外別無良法第念挑變不過暫濟於一時而定額實足以垂經久二者如俱不准則目前已不免擁擠損傷將來廠馬徒有孳生之名而無孳生之實不但不日有贏餘並恐正額亦漸虧缺蓋緣廠地窄狹水草不敷良劣擁擠倒斃損傷勢所不免即將經

牧之員嚴行叅處究於厰政無益臣等所以奏請
三厰共酌留大小兒騾馬二萬六千六百餘匹
及挑變殘廢碎小兒騾馬一萬二百餘匹之原委
也今部議堅稱孳生例議不宜定以額限即查向
辦成案亦從無挑變如許之多援例斥駁固為取
孳贏餘起見而當數十年積弊之後若再拘泥例
案似於因時制宜之道未見其可茲臣等公同悉
心籌議除原奏款單內業經議准各條毋庸再議

外如前奏三廠共酌留大小兒騾馬二萬六千六百二十五匹擬挑變口老殘廢碎小兒騾馬一萬二百三十匹一條部議檢查該牧廠歷次奏請疏通成案均不過於牧馬內挑變十分之一二此次該三廠現牧馬三萬六千八百五十五匹內請挑變馬一萬二百三十匹幾及三分之一與歷次奏請疏通成案不符為數過多碍難核准應令該督等派委公正大員赴廠詳慎揀選將實在不堪

留牧馬匹據實奏請挑變以杜浮濫並稱甘肅口
內口外各牧廠向係六年兩次均齊後每百匹准
挑變六匹嗣於嘉慶二十四年口內各廠請改三
年均齊挑變一次奏准在案今口外各廠事同一
律自應援照口內成案准其嗣後每三年均齊挑
變一次每百匹仍不得過六匹各等語臣等覆查
前奏請以每廠酌留大兒騾馬六千匹取孳作為
正牧並酌留帶牧未及歲兒騾馬駒及備撥驢馬

各數千餘匹不等原為限於廠地惟有酌定馬額
以杜日後損虧今部駁既稱廠取孳生原期日有
贏餘不得定以額限臣等亦何敢固執已見再以
定額瀆請自應遵照部議辦理以期永臻蓄息惟
原請三廠共挑變馬一萬二百三十匹業經委員
挑而又挑實係口老殘廢碎小不堪適用之馬若
不如數變價則廠地水草不敷牧放且使此種劣
馬擁擠其間並恐壯健之馬亦俱因餓致損殊於

牧務大有關碍惟有仰懇

聖恩仍准照原議一萬二百三十匹如數挑變庶廠地
不致過形窄狹而孳馬亦可漸得飽騰矣至部議
所稱嗣後每三年均齊援照口內成業挑變一次
每百匹仍不得過六匹一節伏思臣等前奏請將
口老碎小之馬按照每年所孳馬駒如數頂替出
羣估變原擬馬數酌定如此輪轉不過二十年内
廠馬悉成腴壯俾免擁擠損傷之虞今既不准定

額則按年所取馬駒日漸增多不能如數頂替若
竟遵照部議每百匹祇變六匹仍復不免擁擠未
幾又蹈前轍應請嗣後每屆三年均齊將挑變殘
馬之數畧為加增按照每百匹准其挑變十匹則
十數年間尚不至十分擁擠倘此後贏餘之馬又
復積多不能容牧再由督臣等隨時酌看情形另
議具奏如斯辦理雖不能如前奏永遠定額可以
經久無弊亦可以暫救目前之急而每年既有贏

餘實於厰取孳生及部臣不應限定額數之議均屬相符且自此次大為挑變以後以馬數核計原設牧兵尚敷經牧並可毋庸議添以重操防而節糜費實於現在厰牧有裨謹

奏奉

硃批兵部議奏欽此

八月十四日

奏為勘明甘肅各屬^地方_地夏秋田禾被雹被水並受

旱生蟲輕重情形分別辦理恭摺奏

聞事竊查靜寧等二十八廳州縣縣丞州判地方夏秋禾苗前於五月內據報有偏被雹水並受旱生蟲之處當將飭司查辦緣由節經

奏明在案茲據藩司色卜星額將被災各處先後督飭印委各員會同勘明分別辦理詳請具

奏前來臣覆查靜寧岷州固原寧州等四處現經勘明受傷甚輕不致成災毋庸查辦外其皋蘭金縣

靖遠華亭鹽茶環縣靈台鎮原同續報之崇信等
九廳縣被旱被水被雹被蟲之區亦據正委各員
勘明均係一隅中之一隅或因續得雨澤或因節
氣尚早改種晚秋均不成災應請統俟秋成體察
情形如有應需接濟之處另為辦理此外尚有前
已具奏之河州沙泥寧遠西和平涼張掖東樂武
威平番寧夏寧朔靈州中衛平羅兩當同續報之
安定會寧秦州等一十八州縣縣丞州判等處均

經委員往勘尚未覆到統俟查報至日一併歸入
秋成案內彙核辦理惟夏禾被雹較重之西寧縣
現據正委各員勘報該處地氣寒冷歲止一收收
成歉薄民力不無拮据所有本年應納新舊錢糧
合無仰懇

天恩俯准緩至來年麥後征收以抒民力俟奉
恩旨臣當謹刊謄黃飭發張挂以彰

皇仁而杜欺冒謹

奏奉

上諭楊

奏夏禾被雹地方較重之西寧縣懇請緩

征一摺本年甘省各屬田禾被雹據該督查明西寧縣情形較重收成歉薄自應量予施恩著加恩照所請所有西寧縣本年應納新舊錢糧著緩至來年麥後征收以紓民力該督卽刊刻謄黃遍行曉諭務使實惠及民毋任吏胥滋弊用副朕加惠災黎至意該部知道欽此

二十日

奏為遵

旨停止年班伯克進京並暫留額貢緣由恭摺奏

聞事竊臣接准葉爾羌叅贊大臣長清等來咨本年年

班喀什噶爾輪派四品商伯克密爾哈色木葉爾

羌輪派五品伯克呢雅斯等進京朝覲

天顏並將前經封貯喀什噶爾道光十年暨應進本年

額

貢葉爾羌應進本年額

貢給該伯克等祇領解運起程業經該大臣等具奏
令臣照例委員護送等因臣查本年七月曾准理
藩院清字咨開道光十三年六月初十日奉

上諭孝慎皇后大事明歲正月未過一週所有御前行
走蒙古王公等並年班應來內外札薩克乾清門行
走蒙古王貝勒貝子公台吉塔布囊回子伯克等一
概皆停止進京等因欽此行知前來業經飛咨新疆

口外各城大臣轉飭一體遵照在案今喀什噶爾
葉爾羌二城年班伯克密爾哈色木等起程赴京
朝覲並帶

貢物自係該處具奏之時尚未奉文自應遵照前

旨飭令停止飛咨口外各城大臣查明該伯克等行抵

何處即將前奉

諭旨明白曉諭令各回原處並將所解額

貢帶回留俟明年年班伯克進京時再行帶解呈進

謹

奏

同日

奏為查閱督標蘭州城守營官兵並起程前赴西路

校伍日期恭摺奏

聞事竊臣前准兵部咨開奉

上諭本年應補查陝西甘肅營伍著即派楊 逐一

查閱務各認真簡校如查有訓練不精軍實不齊者

即將廢弛之將弁據實叅劾毋得視為具文欽此仰
見

皇上脩明武備整飭戎行之至意伏查陝西甘肅營伍
本應道光十一年舉行查閱祇以官兵大半調赴

回疆軍營奉

旨暫行停緩今該官兵已經凱撤歸伍自應恪遵
聖訓實力簡校以重

大典茲臣先將督標五營並蘭州城守營官兵傳集教

場親加校閱軍械旂幟堅銳鮮明馬匹賡壯試演
九進聯環聲勢聯絡步伐整齊過堂排鎬馬步技
藝以及速戰陣式各俱精熟弓箭烏鎬準頭每兵
十名中靶俱在三十箭二十鎬以上弓力在六力
八力十力不等間有十二力者兵丁亦皆壯健臣
擇其材技出衆者酌量獎賞稍覺平庸者當場責
懲其各營將備馬步弓箭均各合式穩當足資訓
練惟經制外委丁登元技藝欠嫻候補守備雲騎

尉世職呂英恩騎尉魏福傅世顯久病不愈當此
整飭營伍之際未便稍事姑容相應請

旨將營騎尉世職呂英恩騎尉魏福傅世顯勒令休致
所遺世職另行照例查辦其經制外委丁登元降
改步兵以觀後效仍飭護中軍副將馬輔相督同
各營將備勤加操練臣不時校閱講求務使有勇
知方庶以仰副

委任至此外陝甘各營伍臣現因省城並無要務即於

八月二十一日起程先赴涼州甘州肅州一帶將
滿漢提鎮各營逐一查閱隨時再行具奏臣衙門
日行事件已飭委藩司色卜星額代拆代行遇有
緊要之事仍卽封馳遞臣行署辦理謹

奏奉

上諭楊 奏甄別營伍一摺甘肅候補守備雲騎尉
世職呂英恩騎尉魏福傅世顯久病未愈均著勒令
休致所遺世職照例查辦經制外委丁登元技藝未

嫻著降改步兵以觀後效該部知道欽此

二十九日

奏為查閱莊浪涼州滿漢營情形恭摺奏

聞事竊臣於八月二十一日自省起程前赴涼州甘州

一帶查閱營伍業經

奏明在案嗣臣道過平番即將該處駐劄之莊浪滿營官兵詳加校閱排演陣式步伐整齊連環鎗礮及馬步技藝均屬熟捷鎗箭中靶亦敷分數現署

該營城守尉八十四訓練甚為得法當即優加獎
勵堪列一等隨復起程於八月二十七日行抵涼
州先赴滿營查閱旂幟軍器鮮明銳利馬匹腴壯
足額試以九進連環及五子過堂烏鎗進退聯絡
一應技藝趨提嫻熟每兵十名鎗箭中靶俱在二
十鎗三十箭以上該營副都統壽昌尚有親自教
練之吉林式樣烏鎗二百桿演用靈便及遠有準
足稱利器並查知壽昌在任數載籌畫兵丁生計

設立義學以是閱營鼓舞奮興倍加振作協領佐
領等官弓馬均各合式穩當軍容整肅紀律嚴明
較之從前出色改觀洵堪列為優等次日即往綠
營較場校閱涼州鎮標及調集協路各營官兵排
列大陣演打鎗礮起止齊捷進退合法跳舞藤牌
暨對刀長矛各技一律純熟鎗箭中靶足數分數
弓力俱在六力以上用十力十二力者亦多軍實
馬匹點驗無缺堪列一等臣擇其官兵中材技出

衆者從優獎賞間涉平庸者亦即責懲惟有涼州
鎮標前營經制外委馬成貴莊浪協屬岔口營經
制外委李萬選二員據該署鎮總兵伍魁英稟稱
前經考驗因該弁等弓馬生疏勒限練習迄今尚
未送考實屬任意怠惰且俱年逾五旬呈請核辦
自應即與斥革以肅戎行除另行咨部外臣仍諄
囑該署總兵伍魁英督飭所屬各營將備務須時
勤訓練益勵精強庶以仰副

聖主整飭營伍捍衛邊陲之至意臣現於拜摺後即起程前往甘州肅州等處次第查閱容另奏

聞再臣沿途經過地方察看秋禾已將次收穫雖夏秋間有偏被雹水蟲傷之處查詢情形尚不甚歉民情恬謐堪以上慰

聖懷合併陳明謹

奏奉

硃批覽奏均悉欽此

同日

奏為營員規避防差不遂輒行捏款具稟意圖挾制
恭摺奏

聞事竊臣前於本年二月間接准烏什辦事大臣來咨
該處換防都司札勒杭阿扣至本年九月班滿請
派員前往更替等因當經咨准甘肅提督胡超將
甘省各營正任都司開單請派前來臣查單開各
都司非征防甫經撤回即另已派有差委惟梨園

營都司葉昌泰兩次回疆軍需均未出征現亦別無差事隨經派定飭令依期赴防去後乃該員並不遵照前往旋即來省以前經保列卓異稟請給咨赴部臣因該員已派換防應於六月內出關九月內抵防若再給咨入京核計往返程限須於七月下旬回甘如沿途再有耽擱必致遲誤防差是以飭令回營趕緊依期赴防俟將來班滿換回再行給咨赴部詎料該員因規避防差未遂其意輒

以臣派差辦事不公捏款具稟途間馳遞到臣接
閱之下殊堪詫異伏念臣受

恩深重忝任封圻凡遇地方營務無不矢慎矢公力圖
整飭從不敢稍涉偏私有辜

委寄故每於接見屬寮總告以辦事居心可以對天方
可以報

主乃該員由未弁擢至都司且又保列卓異今於應派
防差不思出力報効反因規避未遂竟爾捏款砌

詞意圖挾制若不奏請究辦匪特關係官方且恐
此後遇有差派營員相率效尤當復成何政體惟
該員現既具稟臣自應迴避謹將逐款原辦緣由
據實另具清單並將該員原稟一併恭呈

御覽伏候

聖明派員查辦或將該員截回同欵內案卷解送刑部
查訊辦理之處並候

命下祇遵謹

奏

謹將都司葉昌泰稟內各款原辦緣由據實分晰
開具清單恭呈

御覽

一都司葉昌泰派赴烏什換防一節查本年二月
內准烏什辦事大臣來文該處換防都司札勒杭
阿扣至本年九月班滿請派員更換等因當經咨
准甘肅提督胡超將甘省各營正任都司開單請

派前來查單開甘省一提四鎮共設都司三十五員內除現在各處駐防並病故新陞未到任者十一員外在營都司二十四員內都司馬奉三多伸布羅應鼇袁貴常殿熊楊作舟韓國彥徐慶元田大武楊兆麟張作友汪大成王大才楊福增王瑗十五員係曾經口外出征並二次出征及換防甫經撤回之員未便遠派又永固協都司綽哈德涼州後營都司托恩棟阿到甘未久不諳情形安西

協都司李冲由世職題補歷練尚淺橋灣營都司
楊萬春甫經掣陞尚未到任亦未接劄岔口營都
司慶隆派管甘州孳生馬廠未便更易生手以上
五員不便派防又金塔協都司阿爾精阿業已另
派塔爾巴哈台換防又西寧城守營都司楊儒業
已勒休此外祇有橫城營都司張洪洲該都司葉
昌泰二員張洪洲曾在烏什換防一次惟該都司
葉昌泰從未出口是以飭派又該都司葉昌泰請

咨入都一節查本年三月內准甘肅提督咨送都
司葉昌泰在卓異案內請咨並聲明該員奉文派
定烏什換防應於六月內出關九月內到防今請
咨北上趕五月內旋回再令赴防等因前來查自
省至京往返程限共需一百二十日如該員途次
並無耽擱依限旋回已在七月下旬若再有滯延
必致貽誤防差是以牌飭回營依期赴防將來班
滿換回再行給咨赴部並移覆甘肅提督在案該

員稟辭來見隨諭以兩次口外軍需均未出征此次應派防差不得推諉辦事居心總要可以對天方可以報

主該員俯首無辭叩辭而去又涇州營都司陳貴西安鎮標右營守備姜得智改派換防一節查道光八年吐魯番調換都司守備各一員八年三月臣回總督任後業經署督臣鄂山飭派涇州營都司陳貴西安鎮標右營守備姜得智前往又庫車調換

守備一員亦經鄂山飭派西寧鎮標右營守備袁鎮前往各在案臣復加酌核因涇州地方係入甘首站正值凱撤征兵陸續進關並護送逆酋過境之際該營都司陳貴照料兵差彈壓一切均屬熟諳妥協若令卸事赴防另易生手恐有貽誤是以將鹽茶營都司李映洲改派前往至庫車換防之兵向係督撫兩標派換姜得智由督標末弁陞補西安鎮標守備督撫兩標官兵均所熟悉派令帶

領最為合宜而吐魯番所調屯田係陝甘各營之
兵守備袁鎮管帶亦可得力是以將袁鎮姜得智
互相改派赴防並無遊擊姜得仁為伊弟體胖懇
求改派之事如果稍有偏袒庫車較之吐魯番更
遠二十餘站又豈有將偏袒之人轉派遠處之理
况維時督標中軍副將係竇德並非朱兆元且亦
無朱兆元其人至遊擊張文魁彼時正在固原提
標署理中軍參將並未離任都司海進祿先因引

見隨臣赴京於二月內行抵河南即將該員奏留該省
操兵至今尚未回甘是海進祿離甘在先姜得智
派防在後何能赴陝道達其姜得仁張文魁二員
又均已物故無從質證又姜得智預保一節查道
光九年冬間准固原提督楊芳以守備姜得智年
力精壯弓馬可觀出征著績保薦前來臣復加考
驗屬實始准預保具題送部引

見是姜得智由本管提督保薦經臣考驗辦理與前派

換防之事何涉又姜得智免其防差一節查道光
八年姜得智派定庫車換防由陝起程前往行至
安定地方偶患痢疾一時醫藥弗愈動履維艱准
前任固原提督何 咨報並經委驗屬實因防差
限期已迫移請另派前來適值

欽差大臣那 增添防兵案內將烏什舊額駐防守備
二員奏減一員而舊額守備二員先因已屆班滿
業經飭派固原城守營守備施占科紅德城營守

備馬鶴齡前往更替早已出關在途是以即將施
占科一員改派庫車令其就近赴防以免往返沿
途供支嗣姜得知復於本年春間派吐魯番換防
並未免其防差又姜得知與多伸布互相調缺一
節查道光十二年五月准軍營翼長甘肅提督胡
超咨稱軍營奏陞西安鎮標右營都司多伸布由
甘肅水泉堡守備陞補該員於甘省營伍素為練
習移請酌調甘省以資熟手等因臣隨查有新陞

甘肅峽口營都司姜得智由西安守備掣陞堪以
互調俾各相宜有裨營伍是以題請對調並非為
姜得智起見至於缺分潤瘠查營員專事操防兵
馬不容短少而糧餉則按季支領隨時散放營中
存款又各有歸著為數亦屬無多是養廉俸薪而
外別無應得之項何所謂之肥瘠又葉昌泰射中
四矢未得預保一節查道光十一年九月准甘肅
提督以都司葉昌泰年力壯健弓馬可觀曾經西

寧河南出征保薦前來臣復加考驗該員雖中四
矢惟查該員前於道光五年十一月經署督臣鄂
山題陞守備六年五月領受劄付七年六月復經
鄂山奏升都司因前俸未滿先請陞署九年五月
俸滿題請實授十年正月換領實授劄付以實授
之日起至十一年九月計俸未滿三年核與預保
之例不符且該員陞擢都司之時正值回疆用兵
之際出征辛苦者尚未升轉而在營供職者業已

升官計俸未滿又請保薦是以飭駁未准又未中
箭之守備王肇琳不遵迴避姑表之千總徐應魁
均列預保一節查道光十一年九月准甘肅提督
以守備王肇琳年力精壯弓馬優嫻營伍諳練曾
經出征口外打仗著績又准固原提督以千總徐
應魁年力精壯弓馬純熟營伍可靠出征著績保
送前來臣復加考驗王肇琳射中二矢徐應魁射
中四矢該二員年力俱壯人材亦好前在口外隨

臣帶兵打仗均屬奮勇得力且歷俸已深是以列入預保具題在案再查徐應魁籍隸四川與臣微有瓜葛並非嫡親姑表不應迴避又曩在固原深積愆尤以及不過因公相左一節查嘉慶十九年臣在固原提督任內該員係瓦亭汛千總因人地不甚合宜曾經札商前督臣先福將該員調補蘭州城守營千總道光六年臣曾委該員署理蘭州城守營守備並兼護叅將事務該員升補都司後

因辦理營務熟練道光十二年保列卓異是相待
該員均係公事公心並無相忌相逼如果臣懷有
嫌隙何肯疊次委署又舉卓異又永昌營都司袁
貴等挑署美缺並升官之都司原非換防之員一
節查都司袁貴羅應鼇楊作舟三員俱係兩次回
疆出征軍營奏陞都司撤回未久不便復行派防
現係按品委署遊擊至張洪洲一員前曾派赴烏
什換防一次現由都司因俸深奉部推升江西遊

擊並非由外題升再查此次口外軍營撤回如都
司袁貴等共有二十餘員俱係例應入都引

見無如萬里初旋頗多負累一時資斧不繼難以即行
北上是以酌量或先令到任或委署空缺俾得從
容部署後再令請咨就道並無挑缺之事又未經
出兵又未換防之永固營都司綽哈德等向隅不
派一節查都司綽哈德由前鋒揀補永固協都司
道光十一年七月到任托恩棟阿由委護軍叅領

揀補涼州後營都司道光十一年十一月到任該
二員來甘未久一切情形尚未深悉岔口營都司
慶隆派管孳生馬廠一時乏員更替赤金營都司
汪大成曾經出征口外現署肅州鎮屬要缺都司
以上四員未便即行派防應俟下屆再為派往並
非不派又葉昌泰甫於十一年四月從察漢托洛
亥班滿換回復派烏什實覺偏苦不公一節查察
漢托洛亥防河相距西寧僅止數站較之回疆戈

壁長途迥不相同且防河一年一班回疆屯防五年三年一班是班期長短各別遠近亦異豈能相提並論况該員道光十年三月派赴察漢托洛亥防河十一年四月班滿回營至今業已兩載茲派烏什何為偏苦又此次飭回各提鎮營千把等官二十餘員偏留千總李尚俸等升官署缺一節查臣標下本有陝甘各營千把總二十餘員均係隨臣出征打仗得力之人因各標路營操練速戰陣

式連環抬礮以及馬隊鎗箭均係仿照督標成式
是以前留該弁等隨同督標官兵操演學習進退
步伐臣復不時面加講論行陣機宜使其手熟胆
壯心領神會再令各回原營轉相教練近因該弁
等業已習熟隨於本年七月飭令回營惟有千總
李尚俸羅文聰胡萬方三員尤為向來出力可靠
且馬上烏鎗長矛精熟勝衆現在督標挑就官兵
馬隊四百餘名速戰步隊二千餘名派委該弁等

逐日隨同本管將備教習操練是以尚未遽令回
營李尚俸現署督標守備羅文聰胡萬方二員並
未署缺

沐恩葉昌泰謹稟恩憲大人閣下敬稟者季春昌
泰赴省請咨入都不容仰見霽顏隨蒙牌示該員
已派烏什換防若經給咨何能趕赴防所仰即仍
回原營依期帶兵赴防遵奉之下自揣曩在固原
深積愆尤此次疊派防差實所分當是以在省三

月五中報然未敢冒叩光輝昨於叩辭之際復奉
傳見當蒙訓諭昌泰兩次回疆均未出兵應宜派
防伏思昌泰於六年回疆初叛之際昌泰數番告
請出征鈞懷恐其昌泰邀恩陞官不肯准行及至
十年復叛昌泰值派察漢托洛亥防所均非昌泰
畏縮不前又曰大人凡於辦公派差公道均可對
天昌泰躬承之下於道途思維竊將大人公道歷
事之處直陳道光八年春值吐魯番換防之期署

督憲鄂山檄派涇州營都司陳貴西安鎮標左營
守備姜得智依期赴防遊擊姜得仁以伊弟體胖
地熱恐其水土不服具函署中協朱兆元面求大
人改派庫車當蒙吩諭此係前任派定本部堂未
便更章後旋將陳貴改派鹽茶營都司李映洲替
往姜得仁心難自甘即具稟憲察不惟大人不肯
深究稟情即函致姜得仁復差遊擊張文魁都司
海進祿赴陝道達並許以姜得智列入道光九年

預保免其防差此情豈但昌泰一人知之陝西一
提五鎮莫不共知共聞迨後姜得智推補甘肅鞏
口營都司多伸布由軍營陞補西安鎮右營都司
蒙大人以陝甘都司缺分潤瘠異形具題互相兌
對以沾慰姜氏兄弟歿存之感何其恩遇之隆至
於斯極此大人公道心可對天者一也如昌泰十
一年秋投考預保射中五矢不能入保以未中箭
之守備王肇琳不遵迴避姑表之漢中城守營千

總徐應魁均列預保此大人公道心可對天者二
也如昌泰前隸宇下冰兢從事自揣毫無負德亦
不過因公相左上干憲忌自持節陝甘以來每事
相逼是以思微末之員何能當泰山勢壓相機引
退不敢希莫官途復蒙胡提台至再培植咨考卓
異復中四夫或邀入保將來部掣一缺山南海北
就食他方藉此遠避風波雖蒙卓異何期仍罹憲
算復派烏什真令昌泰銘諸肺腑此大人公道心

可對天者三也如永昌營都司袁貴涼州前營都
司羅應鼇張義營都司楊作舟橫城營都司張洪
洲等此皆挑署美缺並陞官之都司原非換防之
員其有未經出兵又未換防之永固營都司綽哈
德涼州後營都司托恩棟阿岔口營都司慶隆文
未經換防之赤金營都司汪大成而大人向隅不
派仍以昌泰甫於十一年四月內從察漢托洛亥
班滿換回復派烏什實覺偏苦不公此大人公道

心可對天者四也如此次飭回各提鎮營千把總
等官二十餘員而仍偏留督標供差外營千總李
尚俸羅文聰胡萬方陞官署缺此大人公道心可
對天者五也昌泰揣分本不當冒瀆實緣威逼太
急茲不避斧鉞直陳願大人其熟察焉謹稟

奉


硃批卿公忠為國實朕之心脅股肱之臣斷不可因此
無知妄為之徒心生氣忿有傷氣體朕甚懸注卿其

諒之另有旨諭欽此

奉

上諭楊 奏營員規避防差不遂輒捏款具稟意圖
挾制請旨查辦一摺甘肅梨園營都司葉昌泰兩次
回疆軍需均未出征該督派往烏什換防該員並不
前往輒敢到省請咨赴部已屬規避迨飭令趕緊赴
防仍敢於途次以派差辦事不公捏款具稟楊
公忠為國實心脅股肱之臣朕所深信該都司意存

挾制無知妄為可惡已極葉昌泰著先行草職現在
行抵何處即著楊 截回派委妥員同款內案卷
一併解交刑部嚴行審訊定擬具奏欽此



道光十三年癸巳


十月十四日

奏為遵

旨審明定擬恭摺覆奏事竊 臣接准戶部清字咨開道

光十三年四月二十一日奉

上諭多爾濟拉布坦等奏俄羅斯固弼爾納托爾送來
從前張格爾滋事由喀什噶爾被擒逃出班吉布等
三員審訊抄供或照前辦理交楊 細審或解交



原處收管等情請旨，^一紹多爾濟拉布坦等卽差官
由彼將班吉布等三人解至甘肅省交楊 審辦
至俄羅斯固弼爾納托爾將此三逃人查出卽幫給
衣物照料好生送來甚屬恭順固弼爾納托爾仍照
前獎賞此項買物借銀三百五十兩由口北道衙門
庫內動用欽此行知到 臣 旋於八月十八日准前途
將班吉布等派員咨解到蘭 臣 因前赴甘涼一帶
查閱營伍隨飭委藩司色卜星額署臬司圖明額

會同審辦去後茲據該司等詳稱遵卽提集班吉
布等到案隔別逐一研訊緣班吉布卽班濟布係
伊犁巴燕岱城滿洲正白旗德楞額佐領下馬甲
道光三年派往喀什噶爾換防李成係甘肅高台
縣漢民趕車營生道光三年由肅州攬運客貨前
赴喀什噶爾交卸後卽在該處傭趕度日張保柱
卽張二候籍隸直隸清河縣因逆犯馬進忠傳教
謀逆案內該犯聽從脅教審依邪教為從例發遣

和闐給回子為奴道光四年冬間到戍六年六月
逆回張格爾入卡滋事圍困喀什噶爾班吉布李
成奉派隨同官兵守城八月二十五日城破官兵
與賊打仗班吉布李成各帶鎗傷被賊擄去圈禁
張保柱卽張二侯跟隨和闐葛干總防守南卡在
偏馬川遇賊打仗手足俱被鎗傷昏暈倒地亦被
擄去先後送至浩罕分給不知姓名回子為奴逼
脅服役班吉布等因傷未平復又不懂回子言語

常被凌責班吉布等因被折磨難堪思念家鄉皆
欲乘間逃回迨傷處痊愈卽各先後逸出中途會
遇因聞浩罕逃東到處有坐卡回子防守嚴密拿
獲逃回難民均卽殺壞惟逃西界連俄羅斯有通
中國道路沿途皆係外夷班吉布等又俱着回子
衣冠無人盤詰遂向西行走因不識路徑繞道乞
食潛逸旋因路遇俄羅斯貿易夷人班吉布等卽
跟隨同走途中為薜蔑人服役求食迨至俄羅斯

邊界經該處吏目詢知班吉布等係中國難民回
明該國王子資給衣食由恰克圖送至庫倫經庫
倫辦事大臣審明具

奏轉解來甘 臣 飭委藩臬兩司逐細研訊據班吉布
等僉供實係被擄逃回委無降順張逆拒敵官兵
及招娶回婦情事復詰以現在浩罕情形亦俱不
能供吐查驗班吉布等身帶鎗傷疤痕顯著其為
受傷被擄並未從逆似尚可信應卽擬結查例載

被擄從賊不忘故土乘間來歸者俱着免罪等語
又道光十二年七月初一日奉

上諭伊犁錫伯營馬甲沙特洪阿前因遇賊受傷被縛
出卡乘間逃回與甘心從逆者不同准免治罪仍着
遞回伊犁交該旂嚴加管束不准再挑差使所有具
報陣亡賞恤銀兩卽向追繳嗣後有如此投回之兵
民如查有別情應行奏明辦理倘無別故卽照此次
成案辦理欽此又道光十二年甘省審辦遣犯朱田

趙等七人被擄出卡乘間逃回一案經刑部議令將遣犯朱田趙仍發回城為奴民人李榮盛等六犯照被擄來歸免罪之例免其治罪遞回原籍管束各在案此案班吉布即班濟布係伊犁馬甲派往喀什噶爾換防張保柱即張二侯係習教匪犯發遣和闐為奴李成係內地漢民俱因送回張格爾入卡滋事隨同官兵守城打仗各帶鎗傷先後被擄出卡乘間逃回在途會遇結伴同行至俄羅

斯邊界經該國王子送回訊無降賊從逆拒敵官
兵招娶回婦情事核與馬甲沙特洪阿遣犯朱田
趙等各案情節相同應請照被擄來歸免罪之例
免其治罪將馬甲班吉布卽班濟布解回伊犁巴
燕岱城交該旂嚴加管束不准再挑差使並查明
從前有無領過賞卹銀兩另行核辦遣犯張保柱
卽張二侯仍發和闐為奴交伊主嚴加管束民人
李成遞回原籍交屬管領不准再行出外等情由

該司等審明定擬詳請具

奏前來臣覆核無異除供招咨部外將遵

旨審辦緣由恭摺謹

奏

二十五日

奏為勘明秋成歉薄地方懇請緩徵錢糧以紓民力
事竊查本年阜蘭等二十七廳州縣縣丞州判間
有被雹被水並受旱生蟲之區前經

奏明統俟秋成再行勘辦在案嗣又據狄道渭源隴
西伏羗隆德清水文縣成縣涇州等九州縣暨隴
西縣丞具報秋禾偏被雹水霜蟲亦卽委員一併
勘辦去後茲據藩司色卜星額督飭印委各員先
後查勘明確分晰議詳前來臣查本年夏間被災
各地方原奏勘辦者二十七處又續報被災者十
處共計三十七處內除河州狄道渭源伏羗西和
隴西縣丞隆德華亭環縣清水文縣等一十一州

縣縣丞夏秋禾苗偏被災傷僅係一隅中之一隅
收成不致甚歉民力尚可支持毋庸另議外惟被
災較重之皋蘭金縣靖遠沙泥隴西寧遠安定會
寧平涼葭茶張掖東樂武威平番寧夏寧朔靈州
中衛平羅秦州兩當成縣涇州崇信靈台鎮原等
二十六處並此外尚有秋收歉薄之固原寧州安
化等三處民力均屬拮据所有應徵本年新舊正
借銀糧草束合無仰懇

聖主天恩准其緩至明歲秋後徵收以抒民力如蒙
恩允俟奉到

諭旨卽當敬刊謄黃遍行張掛以廣

皇仁而杜敷冒謹

奏奉

上諭楊

奏查明秋成歉薄地方懇請緩徵一摺本

年甘肅省皋蘭等各廳州縣間有被雹被水並受旱
生蟲之區經該督查明各該廳州縣均因被災秋成

敷薄若將新舊錢糧照例徵收民力實有未逮加恩
着照所請所有被災較重之臯蘭金縣靖遠沙泥隴
西寧遠安定會寧平涼葭茶張掖東樂武威平番寧
夏寧朔靈州中衛平羅秦州西甯成縣涇州崇信靈
台鎮原等二十六處並秋收敷薄之固原寧州安化
等三處應徵本年新舊正借銀糧草束准其緩至來
歲秋後徵收以紓民力該督卽行刊刻謄黃徧行曉
諭務使實惠及民毋令吏胥舞弊用副朕廑念邊氓

至意該部知道欽此

同日

奏為瀝陳感悃叩謝

天恩事竊臣前因甘肅梨園營都司葉昌泰規避口外
防差未遂輒行捏款具稟意圖挾制經臣據實具

奏請

旨查辦奉到

硃批卿公忠為國實朕之心膂股肱之臣斷不可因此

無知妄為之徒心生氣忿有傷氣體朕甚懸注卿其諒之另有旨諭又奉

上諭葉昌泰着先行革職現在行抵何處卽着楊

蔭回派委妥員同欵內案卷一併解交刑部嚴行審

訊定擬具奉等因欽此臣跪讀之下感激涕零莫能

名狀除將葉昌泰換防差缺另派都司汪大成前

往更替並飛咨口外各城查明葉昌泰現抵何處

卽行截解回省另委妥員同欵內案卷一併解交

刑部收審外第念臣一介庸愚毫無才識渥蒙

聖主恩施曠格畀以封疆重任自問敷宣吏治旣學術
之多疎卽思整飭戎行亦韶鈐之愧淺撫躬循省
百無一長是以夙夜兢兢凡遇應辦事務無不慎
重籌維力求公允以冀仰圖報効俯恤人言詎意
該都司葉昌泰因避差不遂之私輒為捏款挾持
之舉雖其無知妄作難逃

聖鑒之中而臣率屬無方亦有難辭之咎方且捫心內

訟愧悚交深又何敢氣忿稍存轉障自護乃蒙

皇上垂鑒愚誠不但不加

訓責并荷

溫言獎慰

眷注優加臣自顧何人沐斯

寵遇五中感戴捐糜難酬惟有仰體

慈厘益自葆衛辨理庶務倍矢慎勤不敢稍涉偏私亦不敢稍避嫌怨總期實心實力藉補天分才力所

不及度以勉報

高厚生成於萬一為此瀝陳感悃恭摺叩謝

天恩謹

奏

十一月二十九日

奏為遵

旨查明甘省被災歛收地方來春請借籽種口糧以資

接濟事竊臣承准軍機大臣字寄道光十三年十

月初三日奉

上諭甘肅西寧縣被雹皋蘭等二十三廳州縣崇信等
九廳縣安定會寧秦州等十八州縣被旱被雹被水
被蟲已據該督奏明辦理來春應否接濟之處查明
於封印前奏到等因欽此仰見

皇上軫念民瘼

恩加無已實深欽感臣遵卽行司確查去後茲據藩司
色卜星額詳稱查得本年被災之各廳州縣或已

請緩徵或被災無幾察看民力尚可支持毋庸再
於來春借給籽種口糧外惟被災較重之皋蘭伏
羗平涼隆德秦州兩當成縣益茶及秋收歉薄之
寧州等九廳州縣地方瘠苦民力未免拮据應請
酌借皋蘭縣來春正二兩月口糧本色倉斗糧一
萬石籽種本色倉斗糧五千石伏羗縣來春正二
兩月口糧本色倉斗糧一千五百石平涼縣來春
正二兩月口糧本色倉斗糧三千石隆德縣來春

正二兩月口糧本色倉斗糧二千石鹽茶廳來春
正二兩月口糧本色倉斗糧二千石籽種本色倉
斗糧一千石寧州來春正二兩月口糧本色倉斗
糧四千石籽種本色倉斗糧二千石秦州來春籽
種本色倉斗糧六千五百石兩當縣來春正二兩
月口糧本色倉斗糧一千石成縣來春籽種本色
倉斗糧二千石所借糧石請在各該處倉貯額徵
糧內動用如額徵不敷散放動用常平倉糧以資

接濟等情詳請具

奏前來臣覆查無異自應仰體

鴻慈覈實奏請恭候

皇上新正加恩俟屆時奉到

諭旨卽當敬刊謄黃轉行張掛仍責成該管道府委員

會同該廳州縣等按戶散放並嚴察吏胥不使從

中滋弊俾窮黎均沾實惠以仰副

聖主惠愛元元有加無已之至意謹

奏

十二月初八日

奏為陝省南山地方連年籌辦撫卹現在兵民安輯
情形事竊臣接准軍機大臣字寄道光十三年十
一月初九日奉

上諭有人奏陝省南山地方緊要連歲歉收請飭豫為
防範一招據奏陝西省漢中興安二府界連川楚其
山田半係外來游民開墾又有木廂紙廂各商販聚

衆尤多卽官兵素稱勁旅其沾染鄉勇新兵習氣不安本分者恒十數人結為兄弟倚勢欺虐居民遇有兵民交涉事件地方官動行掣肘嘉慶十一年有新兵滋事之案十八年又有饑民滋事之案皆因年歲荒歉所致上年南山一帶包穀歉收本年秋雨過多收成歉薄南山五方雜處最易藏奸請飭豫為防範等語陝省南山地方緊要前據該撫以災歉情形奏請緩徵當卽降旨允准惟念該府廳所屬災歉頻仍

百姓待哺嗷嗷必應加意撫卹其漢中陝安等鎮支
放兵糧尤恐胥吏作奸或因米色撓和斗面尅扣卽
難保無匪徒聚眾藉端滋事着該督等嚴查密訪遇
有此等情弊必應分別重懲至兵民交涉事件務飭
該鎮道等和衷商辦兩無袒護倘辦理不得其宜致
滋事端惟該督等是問凜之慎之將此各諭令知之

欽此遵

旨寄信前來臣跪讀之下仰見

皇上垂念巖疆撫戢軍民之至意曷勝欽感欽服伏查
陝省南山地方山深林密五方雜處最易藏奸連
年歲事歉收恐有遊匪災民藉端滋事節經 臣 札
飭該鎮道等妥為撫卹加意稽防並商之調任撫
臣 史譜設法調劑業已奏荷

天恩借糶兼施分別緩徵災黎得所安謐如常前值陝
安漢中二鎮冬季會哨之期 臣 復密飭周歷巡查
細心體察據稟山內地方以及川楚邊界民情均

極靜貼廂廠商販人等亦俱照舊安業並無游匪
潛擾情事該鎮等隨處撫綏察看情形尚無他慮
業經 臣 另摺奏

聞在案至於山內官兵從前節次軍興原有鄉勇新兵
收入營伍每致恃強滋事業已隨案懲辦現在承
平日久訓練有年入伍者咸知自顧身家俱各安
分守法已無曩時氣習其每年支放兵糧漢中陝
安等鎮向來俱用折色不支本色是以胥吏人等

亦無撓和尅扣等弊惟是南山素為要區兵民自應并重況現在正值積歉之後更須加意撫綏以免借端滋事茲蒙

聖訓諄諄而臣與提臣楊芳又俱素稔南山一切情形惟有隨事隨時會商妥辦應調劑者必當仰懇

恩施應查辦者亦即嚴加整剔不敢因現時無事稍存疎懈之心並飭該鎮道等查看輿情時時稟報遇有兵民交涉事件務須和衷商辦切弗涉袒護

致放事端有干重譴總期軍民相洽境圉永安庶
以上抒

厘注謹

奏

二十一日

奏為遵

旨籌補缺額鉛觔事竊查甘省各營歲需操演鉛觔前
於道光二年經前督臣長齡題准在於安西州所

屬之普城山定限六年採鉛五十萬觔以供領用嗣因限滿未能足額節經臣催據該州報稱實緣洞老山空難以採足復經通飭各屬招商勘採未據報有產鉛之地隨又咨商川陝楚三省酌議採買尚未覆到而各營以近年操演均動營中備貯之鉛紛紛催領行據藩司議請先將督標哈密等營庫舊存軍需案內用剩鉛觔分別動撥應用其節年未領之鉛俟採辦有數或隣省購到再行給

發還欵咨准兵工二部奏駁奉

旨勒限半年全數籌足其軍需剩鉛着永遠存貯不准

動撥欵此 臣隨與藩司色卜星額復又再三籌畫設

法商辦查安西州鉛廠自道光二年開採起至十

二年底止計採獲鉛三十萬三千九百九十一觔

未採鉛一十九萬六千九觔節次查明該廠鉛洞

實因年久殘敗苗斷砂微不堪再採委員查勘尚

未晒出新工其別屬近來雖間有據報產鉛之區

而試採需時盈虛莫必半年之期萬難歸補前次
咨查隣省現據陸續覆到除川陝兩省均難採買
外惟湖北省覆稱該處商販黑鉛每百觔需庫平
色銀六兩六分七厘二毫時價長落不定並以楚
省節次被災錢糧蠲緩無項墊辦令甘省自行委
員攜帶銀兩分年採買等因查動缺鉛觔現已欽
奉

諭旨勒限歸補未便分年採買因查貴州省每年向有

運交湖北漢陽官局鉛觔存貯頗多價無長落可否賣給甘省五十萬觔以資營用又經咨商去後茲准湖北覆稱貴州每年額解漢陽局白鉛二百六十餘萬觔係供售各省鼓鑄之用均屬白鉛不能製作鉛彈其黑鉛一項每年只額解漢局五萬觔現在尚存鉛五十二萬四千一百餘觔能否賣給甘省營用仍由黔省照數補運來漢供售之處湖北碍難定議已咨貴州巡撫轉飭查明經咨甘

省查辦等因迄今未准貴州咨覆溯查甘省未開鉛廠以前本係採買楚鉛由湖北解至西安轉解甘省分撥各營領用正價運脚每觔需銀一錢至一錢二三分不等係在該二省耗羨項下動用今湖北既因節次被災錢糧竭緩無項墊辦若由甘委員攜帶銀兩赴楚採買而商販之鉛多寡難定仍恐緩不濟急似莫若竟由黔省產鉛之區照數代辦較為穩妥現據藩司詳請具奏前來相應請

旨勅下貴州撫臣轉飭代辦黑鉛五十萬觔搭附來年額解運送湖北漢陽官局抑或即將存局黑鉛先行照數撥給咨明甘省委員赴楚領運以補動缺而供營用庶於要需有濟仍一面嚴飭安西州並再通飭各屬通行躋勘如有鉛苗旺盛之地卽當題請招商採辦以省採買運脚之費再查督標及南路各營存貯川楚軍需案內下剩鉛觔係嘉慶十年經軍機大臣議奏凱撤官兵事宜案內議令撥

歸就近營分陸續操演抵銷歷年以來河東各營
歲需操演鉛觔俱係動用此項其哈密官庫存貯
軍需下剩鉛觔亦係口外各滿營按年操演動用
各年俱有奏銷並非營中備貯急需不准動用之
項將來歸補之後仍請遵照原議按年動用抵銷
合併陳明謹

奏奉

上諭楊

奏甘省各營歲需操演鉛觔俱係動用川

楚軍需案內存貯剩鉛其哈密官庫存貯軍需剩鉛亦係口外各滿洲營按年操演動用等語此項動用存貯鉛筋既係各年俱有奏銷並非永遠備貯不准動用之項着將此項鉛筋歸補之後將來按年動用抵銷仍着查照成案辦理該部知道欽此

道光十四年甲午七十五歲

正月二十五日准軍機大臣字寄道光十四年正月十二日奉

上諭揚

奏籌補缺額鉛筋一摺據稱甘肅省各營
歲需鉛筋前經奏准在於安西州所屬之晉城山定
限六年採鉛五十萬筋以供領用嗣因限滿未能足
額所有動缺鉛筋現經奉旨勒限歸補未便分年採
買請由黔省產鉛之區照數代辦黑鉛五十萬筋搭
附來年額解運送湖北漢陽官局即將存局黑鉛先
行照數撥給咨明甘肅省委員赴楚領運以補動缺
一面嚴飭安西州並通飭各屬徧行跼勘如有鉛苗

旺盛之地卽奏請招商採辦等語甘肅省近年採演均動營中備貯之鉛所有動缺鉛觔前經降旨勒限半年全數籌足現據該督設法籌辦試採需時刻難歸補請由黔省產鉛之區照數代辦着訥爾經額尹濟源裕泰體察情形是否可行悉心詳查妥議據實具奏其甘肅省應行採買各鉛觔仍着該督嚴飭安西州並通飭各屬踴勘鉛苗暢旺之處卽行招商採辦俾省採買運脚之費以濟要需而供營用將此各

諭令知之欽此

二月二十四日

奏為恭謝

天恩事竊臣接准部咨欽奉

硃諭本年京察陝甘總督楊

中外宣勞功勳懋著

着加恩交部議叙等因欽此當卽望

闕碰頭感愧莫能名狀伏念臣材同樗櫟質類駑駘

夙歷戎行曾乏六韜之勳今膺疆寄尤慚三事之

能報未効夫涓埃心日深於兢惕詎意三年考績
復蒙

甄叙優加中外服勞本屬臣子應為之職任功勳莫奏
轉邀

聖主溢分之褒榮溯自受任封圻閱十載而兩叨
曠典何幸綴名耆舊繼八臣而同拜

殊綸

恩重如天感深無地臣惟有勉竭血誠力圖報効策未

衰之犬馬倍殷奮勵之忱冀收效於桑榆稍答
生成之德臣感激愧惶下忱恭繕摺叩謝

天恩謹

奏

同日

奏再臣之子楊國楨前因母病請假仰荷

慈俞得以來甘省視

天恩高厚銜感難名茲已住甘旬日臣之妻田氏病已

日就痊減臣之子國禎身任封疆應辦地方營伍
事宜均闕緊要自不容在甘久留致曠職守現已
飭令於二月二十四日起身趕緊兼程回豫並嚴
切訓勵嗣後益當倍矢慎勤殫心圖報以副

委任而荅

殊施謹

奏

三月初五日

奏為援案銷賠軍需退回駝隻以歸核實事竊查回疆二次軍需蘭州報銷局正案第十案報銷冊造共辦解口外各處駝一萬三千四百七十八隻又由涼州肅州因口外駝隻數用退回變價駝一千一百六十五隻一共駝一萬四千六百四十三隻內除委員管解口外各處並撥給各營官兵順帶阿克蘇以及交給各處變價沿途倒斃共駝九千二百九十九隻外實在未交駝五千三百四十四

隻前因糧運停止全行退回當將原領駝戶發交
各地方官飭令呈交去後茲據各該駝戶懇稱從
前承領官駝因糧運停止飭令退回彼時駝隻率
多疲乏隨將尚堪出售者陸續變價在於大營共
交過銀八千四百二十九兩零庫車共交過銀五
千二百六十八兩零肅州軍需局共交過銀一萬
一千六百四十九兩零通共交過銀二萬五千三
百四十七兩零餘駝均因自嘉峪關出口道遠站

長晝夜趨行不能緩歇嗣因糧運停止仍復退回
往返戈壁水草惡劣疲瘦倒傷兼之軍務告竣閒
駝壅滯卽健壯者乏人承買疲瘦者更難銷變以
致遷延日久率皆損傷稟懇豁免等情前來伏查
烏魯木齊此次軍需存剩並內地委員解交變價
駝隻前經烏魯木齊都統成格奏奉

諭旨協濟駝隻准以四分報銷六分着賠又准照依採
買官駝例價酌減十分之三每隻應變銀十二兩

六錢概令一律估變在案今前項未交駝隻據稱
疲瘦倒傷尚屬實情若全數着賠該駝戶等均係
無業貧民力不能完勢必

帑項久懸徒追無益似應援照辦理以昭平允合無
仰懇

聖恩俯准將前項未交駝五千三百四十四隻亦照烏
魯木齊奏准之案准以四分報銷六分着賠俾得
早為清結如蒙

俞允共計應賠駝三千二百七隻每隻以十二兩六錢
着賠共應交銀四萬四百八兩零除前已交過銀
二萬五千三百四十七兩零核與各該處報銷冊
造收過銀數相符尚該應交銀一萬五千六十兩
零卽行勒限追繳不准稍有短絀俟追獲後卽為
報撥現據甘肅報銷登覆所司道造冊詳請具

奏前來臣現將清冊送部查核恭摺奏請

旨勅部核覆施行謹

奏

四月十三日

奏為委員採買楚鉛以資補額事竊查甘省安西州鉛廠殘敗各營常年操演動及備貯鉛筋前奉

上諭勒限半年歸補足額經臣奏請

勅下貴州巡撫代辦黑鉛五十萬筋搭解湖北漢陽官

局咨明甘省委員前往領買在案茲准貴州撫臣
高溥咨覆該省廠衰額短自顧不暇不能代為採

辦等因前來隨與藩司色卜星額再三籌畫查甘
省採鉛現未晒定新工而隣近之川陝等省又早
經咨商均稱不能採辦惟有委員赴楚採買商販
黑鉛方可歸補缺額查前准湖北來文甘省需鉛
五十萬觔為數既多難以尅期猝辦如分作四五
年買運不致貽誤並稱商販多少不定時價早晚
不同一經定價誠恐商販裹足反致缺乏等語自
應分起委員前往照依該省時價採買每起以一

十萬觔為率設過委員到彼正值商販雲集黑鉛較多應令儘數收買所帶鉛價不敷准委員指定所需實價由湖北藩庫暫為借墊交下起委員帶解還款如此相機辦理則各營動缺鉛觔約計一二年間當可如數歸補至委員跟役往返應夫口食騎騾以及鉛價運脚請照陝西赴漢口買鉛之例支銷其自西安至甘肅省城卽照運送餉鞘之例動用沿站所車如有未經設立所車之處以及

所車不敷准其雇覓民車再查陝西委員漢口買鉛例限五十日買齊因所買係官局之鉛不難尅期竣事現在甘省所買係商販黑鉛商販多火不定似難限以時日應令趕緊買竣卽回其往返水陸程限仍照陝西買鉛之例辦理所需鉛價運腳襍費先在司庫候撥兵餉款內借動俟買運到蘭按起攤定每觔費銀實數卽於領鉛營分額設公費銀內扣收還款一面仍通飭各屬上緊趲勘如

有鉛苗旺盛之地卽當

題請招商採辦以省採買運脚之費現據司詳請
奏前來是否有當恭摺奏請

訓示遵行謹

奏

六月初四日

奏為查明甘肅滿漢各營每歲應支兵糧實有不得
不請採買情形事竊臣前准戶部議覆御史那斯

洪阿條陳國用事宜節省支款銀兩一摺咨開甘肅省採買兵糧近年每歲用銀十餘萬兩至二十餘萬兩不等節年奏請於鄰省撥給茲查道光十一年甘肅省額徵冊報實存糧一百餘萬石雖駐兵較多徵糧較少之區與駐兵較少徵糧較多之區不無彼贏此絀或供夫兵糧均用上色存糧間有下色不敷支放惟思存糧不用久恐紅朽動帑採買實滋糜費應請先將盤查案內應買還倉之

糧無論原虧上色下色均折買上色分年買足儘
駐兵較多之處撥貯以備兵糧不敷搭配估放其
駐兵較少之處兵糧無虞不敷即可毋庸撥貯計
足供夫六七年六七年後存糧自益充裕再察看
各州縣地方情形酌量贏絀互易則彼糶此買以
贏補絀其積存下色糧石均糶易上色以供兵糶
如此通融辦理永不准動款採買每年可節省銀
二十餘萬兩又陝西省採買常平倉缺額穀石前

經行令將支剩兵糧彼糶此買撥補在案嗣後常
平倉穀石如有動缺應令遵照前咨辦理毋庸動
項採買每年節省銀數千兩又甘肅省安西州採
買草束用銀一千餘兩至六千餘兩不等查該省
新草變價項下除津貼河東各州縣公費並武威
縣採買草束外每年餘銀二千餘兩例載留為災
賑之用嗣後安西州遇有採買草束亦令在於新
草變價項下動支可節省銀一二千兩又陝甘兩

省兵丁紅白賞卹銀兩在於地丁項下並協甘兵餉案內動撥嗣後陝西省紅白賞卹銀七千五百兩甘肅省滿營兵丁紅白賞卹銀五千兩均改於例不報撥之扣存朋合項下動支每年可節省銀一萬餘兩等因奏奉

諭旨依議欽此行遵前來除陝省買補常平及兵丁紅白等款應由陝省核辦其甘省滿營紅白動用朋合安西州採買草束動用新草變價皆可照依部

議遵辦外惟查甘省滿漢各營歲支兵糧實有不
得不請採買之處緣甘省山高地瘠歲多旱澇霜
雹之災所有額徵上色糧二十九萬餘石每年不
過收至七八分偶遇偏災較重缺額更多而且兵
多之區產糧偏少兵少之處產糧偏多足食足兵
輕重又有偏畸是以定例甘肅額設常平京倉斗
糧共四百四十七萬石每隔數年買補一次迨嘉
慶二年川楚軍興常平停買而兵糧係按日計口

之需不能不為添辦此採買之所自始也今部議以盤查案內倉糧分年買足儘駐兵較多之處撥貯協濟原可挹彼注茲然通省細籌河西則鎮番可以運武威平羅可以運寧夏寧朔高台可以運肅州河東則秦州西和可以運伏羌隴西兩當徽縣清水其間卽有車道不通須用馱載之處而皋蘭平番固原階州等地方附近四面則皆無糧可撥如於千里之外籌運所費腳價較之採買轉為

多糜若令兵少糧多地方與兵多糧少州縣彼糶
此買而糧多之區其價必賤糧少之區其價必昂
一出一入求其銀糧數目相等勢所不能若糶出
兩石僅供一石之用或糶出三石僅供兩石之用
其事更有所不值從前嘉慶年間曾經部議令將
糧多州縣糶價已充採買之用亦因不合所算未
能遵辦且甘省為新疆門戶即內地所屬多與蒙
番接壤漢回襟居險要之勢迥與他省不同而陶

復陶穴之民向來又鮮葢藏尋常年歲籽口尚賴
官糧設遇災荒有事之時而各屬糧石均經撥糶
無餘無糧以應尤屬大有關係是以臣與藩司色
卜星額再三籌酌實有難以照辨情形查盤查案
內糧價已據各屬買還糧五萬二千餘石尚有陸
續請領未經報買之處當與其餘未領糧價一體
上緊勒買並令將原虧下色折買上色俾供兵糈
惟是買補之後以之估撥本地兵糧及協濟隣近

誠可節省採買而遠道撥運腳價較多是節用而轉以糜用似不相宜應請嗣後估撥兵糧祇有減省採買力求樽節其非採買莫可籌估之處應仍循照舊章辦理庶於帑項倉儲兩無偪碍似較有益謹

奏

同日

奏再安西州採買草束現已遵照部示自道光十四

年為始在於新草變價款內動支第查新草變價
一欵如果經徵草束按年掃數全完除支涼州莊
浪二滿營採買馬草價銀及津貼河東州縣公費
之外每年原可剩銀二千餘兩無如甘省土瘠民
貧水旱徭炎又所時有往往徵不足數以致變解
銀兩除咨滿營採買馬草價銀之外尚不敷津貼
河東各州縣公費之用盤查以前各處未領津貼
因新草變價本欵支絀曾經奏明在於舊草變價

款內撥補銀三萬四千餘兩盤查以後各處應領
津貼係照一年變解實數均勻攤發本無餘銀堪
以添支安西州採買草價惟是津貼公費究係額
外幫助並非列支正項本款既不充裕理應先儘
正用應請自道光十四年為始將皋蘭金縣安定
會寧靜寧隆德固原平涼涇州等九州縣每年應
支津貼公費銀一萬一千八百兩全數裁除以備
支發安西州採買草價之用其各處十三年以前

未領津貼仍准陸續支領至督撫兩筆帖式兼俸
不敷每年津貼公費銀一千二百兩西寧府屬循
化貴德巴燕戎格三廳犒賞番目每年津貼公費
銀一千八百兩應循其舊以資辦公謹

奏

七月十二日

奏為糶借倉糧以濟民食而平市價事竊查甘省本
年入夏以來雨澤愆期夏禾多有被旱之處前據

各屬稟報當卽委員分往查勘俟覆齊另行核辦
並將民食告艱地方飭司體察情形酌量借糶倉
糧以資接濟曾經奏

聞在案茲據藩司色卜星額查明詳報皋蘭縣請糶倉
糧三千石照依時價小麥每倉石價銀二兩二錢
三分五厘減銀二錢狄道州請糶倉糧二萬五千
石照依時價小麥每倉石價銀一兩五錢六分莞
豆每倉石價銀一兩五錢五分各減銀二錢五分

靖遠縣請糶義倉糧五千五百五十石零照依時
價粟米小麥每倉石價銀一兩八錢七分七厘減
銀二錢益茶廳請借給義倉糧三千八百石零西
寧縣請借給義倉糧二千二百石碾伯縣請借給
義倉糧三千石均於秋後徵收還倉等情詳請具
奏前來 臣查平糶倉糧若歉歲米價昂貴例准核實

酌減奏

聞發糶總不得過三錢又查甘省義倉

奏定章程如遇荒歉應卽借糶接濟今皋蘭狄道靖
遠益茶西寧碾伯等六處旣因夏禾被旱糧少價
昂貧民買食維艱自應准其分別借糶俾平市價
而慰輿情除已飭司轉飭該廳州縣等速卽開倉
糶借完竣之日造具冊結彙奏咨部並將糶借提
存司庫俟糧價平減發令買補借出之糧秋後照
數徵還以重倉貯仍令該廳州縣等認真辦理稽
查弗使胥役奸商從中侵漁買國務期實濟在民

以仰副

聖主子愛元元不使一夫失所之至意謹

奏奉

硃批依議妥辦該部知道欽此

同日

奏再臣前因酌辦各屬借糶事宜一時未能出省校閱營伍曾經奏明緩俟秋成再行察看前往現在各屬業已連得透雨秋禾長發暢茂卽夏田被旱

之處亦多補種晚秋且經借糶倉糧民情悉臻安
貼辰下相距秋成尚早省城亦無應辦要件查固
原提屬營伍離省均不甚遠 臣擬於本月十三日
起程前往校閱並藉便沿途查看地方歲事情形
另行具奏閱畢仍卽回省其東路西安等處營伍
彼時正值陝省辦理文闈鄉試揭曉後又應接辦
武場事宜容俟隨後再行往閱謹

奏

八月初三日

奏為查閱固原提屬各營官兵情形事竊 臣於七月
十三日自省起程前赴固原查閱營伍業經繕摺
奏

聞在案嗣 臣行抵固原隨將提標及所屬各營官兵逐
加校閱旂幟鮮明器械銳利馬匹康壯足額試演
各陣馬步整齊聲勢聯絡鎗箭中靶按例足數分
數弓力多係八力十力間有十二力者馬上步下

技藝亦皆嫻熟堪列優等臣擇其材技出衆者當
場獎賞稍涉平庸者分別責懲勒限練習其中惟
靖遠協營經制外委劉萬榮會寧營額外外委侯
祿靖遠協營武舉雒對揚俱已年衰有疾不能騎
射先經提臣胡超移請核辦經臣考驗屬實未便
姑容應卽一併斥革另行咨部辦理以肅戎行臣
仍囑提臣胡超督飭各營將脩務須訓練不懈精
益求精仰副

聖主修明武備之至意至沿途各屬地方秋禾得雨甚
足長發粒為暢茂詢之農民僉稱遠近相同此後
暘雨應時秋成可臻豐稔民情亦皆恬謐堪以上

慰

聖懷 臣卽於八月初一日回省合併陳明謹

奏

十三日

奏為恭謝

天恩事竊 臣接得 臣之子國楨來稟據云因伊母久病
不愈心神懸系恐致悞公業經瀝情奏懇開缺欽
奉

上諭楊國楨奏懇恩開缺一摺前因楊國楨母病特經
賞假省視茲據奏母病仍未痊愈瀝情籲懇楊國楨
着准其開缺侍奉伊母所有河南巡撫印務着栗毓
美護理欽此聞信之下感悚交并伏念 臣父子封圻

受

恩最渥前因國楨之母患病仰蒙

賞假來甘省視己邀

高厚殊施實為人臣罕遇回任後自當益加奮勵勉効

涓埃茲以母病未愈輒又冒昧陳請雖

聖主恩推錫類無不許達之下情而臣子公爾忘私詎

有屢邀之

曠典乃蒙

皇上不加飭責俯遂烏私開缺以釋其仔肩奉母俾盡

夫子職

鴻慈逾格淪浹難名熬蕪全家捐糜莫報臣惟有俟國
損來署朝夕嚴切訓勵令其上緊調治伊母病症
一經痊愈卽飭馳詣

閱廷求

賞差使再圖報効萬不容稽遲瞻顧上負

生成臣感悚微忱恭繕摺叩謝

天恩謹

奏

十月初三日

奏為甘省秋收歉薄地方請借冬月口糧以資接濟
事竊查甘省各屬本年夏秋禾苗間有被旱被雹
被水之處前經

奏明俟秋成體察情形如有應需接濟之處另為辦
理在案茲據藩司色卜星額詳據皋蘭縣等八州
縣會同委員勘明各該處秋收均屬歉薄民力不

無拮据必須酌借冬月口糧俾資接濟等情前來

臣當與該司詳加察核應請酌借皋蘭縣本色倉

斗糧六千石折色銀六千兩金縣本色倉斗糧二

千五百石安定縣折色銀二千兩會寧縣本色倉

斗糧一千石折色銀一千兩固原州本色倉斗糧

三千石折色銀三千兩安化縣本色倉斗糧三千

石涇州本色倉斗糧四千石折色銀四千兩靈台

縣本色倉斗糧三千石以上共酌借口糧本色倉

斗糧二萬二千五百石折色銀一萬六千兩其所
借本色糧石在於倉貯額徵常平糧內動用折色
銀兩在於司庫舊寄貯糧價款內借給散放如蒙
允准俟奉到

恩旨卽敬刊謄黃道行張掛一面責成該管道府委員
會同該地方官按戶監放弗任胥役人等從中滋
弊務使實惠及民以仰副

聖主怙冒邊黎之至意再查冬月口糧應於九月內具

奏因甘省節氣較遲必俟秋禾登塢察看情形始
能核辦是以稍遲合併陳明謹

奏奉

上諭楊 奏秋收歉薄地方請借冬月口糧一招本
年甘肅省各屬間有被旱被雹被水之處茲據該督
查明皋蘭等八州縣秋收均屬歉薄民力不無拮据
自應酌借口糧以資接濟加恩着照所請准其借給
皋蘭縣本色倉斗糧六千石折色銀六千兩金縣本

色倉斗糧二千五百石安定縣折色銀二千兩會寧
縣本色倉斗糧一千石折色銀一千兩固原州本色
倉斗糧三千石折色銀三千兩安化縣本色倉斗糧
三千石涇州本色倉斗糧四千石折色銀四千兩靈
台縣本色倉斗糧三千石所借糧石准其在於倉貯
額徵常平糧內動用折色銀兩准於司庫舊寄貯糧
價款內借給散放該督卽刊刻謄黃徧行曉諭並責
成該管道府委員會同該地方官按戶監放勿任吏

胥舞弊務使實惠及民用副朕軫念邊黎之至意該部知道欽此

二十日

奏為勘明秋成歉薄地方懇請緩徵錢糧以抒民力事竊查本年皋蘭等二十八廳州縣州判間有被雹被水被旱之區前經

奏明統俟秋成再行勘辦在案嗣又據金縣寧夏寧朔西寧大通等五縣具報秋禾被雹被水亦即委

員一併勘辦去後茲據藩司色卜星額督飭印委各員先後查勘明確分晰議詳前來臣查本年夏間被災各地方原奏勘辦者二十八處又續報被災者五處內除安化寧州正寧西寧清水等五州縣夏秋禾苗徧被災傷僅係一隅中之一隅收成不致甚歉民力尚可支持毋庸另議外惟被災較重之皋蘭河州狄道渭源金縣靖遠沙泥安定會寧平涼靜寧隆德固原蓋茶張掖武威平番寧夏

寧朔靈州中衛平羅磧伯大通秦州涇州靈台鎮
原等廳州縣州判並此外尚有秋收殷薄之禮縣
共二十九處民力均屬拮据所有應徵本年新舊
正借銀糧草束合無仰懇

聖主天恩准其緩至明歲秋後徵收以紓民力如蒙
恩允俟奉到

諭旨卽當敬刊謄黃遍行張掛以廣

皇仁而杜欺冒謹

奏奉

上諭楊

奏勘明秋成歉薄地方懇請緩徵一摺本年皋蘭等屬間有被雹被水被旱之區若將本年新舊正借銀糧等款同時併徵民力未免拮据加恩着照所請所有皋蘭河州狄道渭源金縣靖遠沙泥安定會寧平涼靜寧隆德固原盩厔張掖武威平番寧夏寧朔靈州中衛平羅碾伯大通秦州涇州靈台鎮原等廳州縣州判及秋收歉薄之禮縣共二十九處

應徵本年新舊正借銀糧草束均着緩至明歲秋後
徵收以紓民力該督卽刊刻謄黃徧行曉諭務期實
惠及民毋任吏胥舞弊用副朕軫念殷區至意該部
知道欽此

十一月十二日

奏為省城匪徒滋事現已全數拏獲督審大概供情

恭摺奏

聞事竊照本年十一月初六日三更後突有匪徒百餘

人在臣署大門持械放火撲嚷滋鬧臣當卽帶同
巡捕兵役及家丁等出外查看據守門人役稟據
皋蘭縣役報稱現有民人陸棕法赴該縣黃環處
首報有鄭三弟兄糾衆滋事並呈繳分給鋤刀一
把該縣親來稟知等情維時該匪徒等見署門闕
鎖嚴密難以撲入已向東跑去臣隨飭傳就近堆
舖官兵趕緊跟拿該匪徒等先在大街遇見臣標
中營都司素貴查夜前來當向查問該匪徒等恃

衆抗拒已將該都司袁貴砍傷頭臂落馬經跟役
搶起背跑該匪徒等於臣署大門放火後卽往袁
貴公寓破門擁入肆行搶掠見袁貴未經回寓遂
於內室放火焚燒復折至臣署箭道門首吶喊意
欲奪門而入其時臣已分派弁兵防守大門藩司
色卜星額等聞鬧亦先後帶役趨至救火護門臣
卽親赴箭道查看門垣因匪徒聲勢頗衆所帶弁
兵僅止數人未便開門出拿隨令放鎗轟擊經巡

捕守備吳珍把守柵門外委陳芝桂用鎗於門隙
打出立斃一賊卽聞匪衆嚷稱鄭三已被打倒內
有準備我們快走臣復大聲傳令放鎗開門追拿
適臣標將備富與阿等均已聞信帶兵馳至該匪
徒等畏^懼拒逃逸竄赴東門殺傷守門兵丁打落門
鎖擁出臣隨派令官兵跟踪追拿一面查看鎗斃
賊屍頭戴黃紙硃符身穿號衣背負烏鎗一杆旁
遺蠻刀一把懷內搜出鎗子一包旋據派出官兵

在於東關追獲賊匪馬壯懷等二十餘人並獲有
紅紬小旗五杆一寫帥字餘寫令字上俱鈐有墨
印圖記認係天海篆文二字當交藩臬兩司先行
審訊滋事緣由其時天已黎明火俱撲熄復經官
兵差役陸續追拿並搜獲賊匪到案連日隨獲隨
審業將供出首夥正賊暨累脅窮民全行拿獲臣
督同司道委員等隔別逐加研審據為首之鄭曼
年卽鄭大供稱皋蘭人向與伊弟鄭曼得卽鄭三

充當城守營兵丁道光十年辭伍本年八月鄭曼
得聲稱中營都司袁貴將伊攬做軍火麻繩另給
他人製辦並斥伊為人不好又稱總督裁汰老兵
並充補四川人糧缺心懷氣忿起意糾同該犯鄭
曼年並朱金鎗狗兒文玉馬逢樂等商謀造反該
犯先未允從嗣伊弟鄭曼得又遇賣卦之佛大善
即馬壯懷諸習奇門六壬又有一熟識之劉永慶
像是紫微星臨凡已同佛大善朱金鎗狗兒相約

輔助商令該犯鄭曼年幫同起事該犯亦因前在
回疆軍營曾經打仗未得好處並憶及降調都司
葉昌泰平日待伊有恩今被叅降級俱可藉此報
仇遂與鄭曼得商定互相糾人該犯曾向葉昌泰
提及有人肯替報仇葉昌泰查問何人該犯謊稱
不知姓名葉昌泰答以此事萬不可做如有人知
情就說未曾見我而散從此該犯鄭曼年與鄭曼
得佛大善朱金鎗狗兒等時相聚會商議十月內

馬逢樂由河州來省鄭曼得邀與佛大善同住令
擇起手日期馬逢樂擇定十一月十一日旋即潛
回河州鄭曼得心疑復令佛大善另擇十一月初
六日亥時早為舉事遂租賃城內僻靜地方之斗
母宮廟內間房鄭曼得與佛大善移往居住暗製
令旗符帖並預藏器械等物至初六日該犯鄭曼
年因無利械知葉昌泰素有好刀隨往見聲稱有
人不惜重價要買好刀一把葉昌泰因乏用度即

將腰刀一把交給售賣該犯携赴鄭曼得廟中維
時朱金鎗狗兒約來晏尙黑子陳棋娃子鄭曼得
約來文玉張二詹學思尹繩匠與佛大善共係十
人鄭曼得又借捉賭誘來在街負苦貧民廿年子
等十一人另圈空房三更時鄭曼得等焚香禱祀
各飲符酒並散符帖鄭曼得將貧民廿年子等放
出告以幫同謀反如有不從先行殺死該貧民等
畏懼勉從佛大善手持帥字旗一杆令字旗四杆

餘俱分携刀矛鞭棍等械鄭曼得在先率領朱金鎗狗兒押後先赴北門殺傷守門官兵砸開門鎖擁入向住貧民乞丐店內勸令盡數跟隨助勢隨齊赴督標軍裝庫打門闖進殺傷守門兵丁搶出號衣器械分給衆人穿帶裝作兵丁鬧事希圖惑亂衆心撲往大街路遇都司袁貴乘馬巡夜見而喝問鄭曼年等卽用刀亂砍受傷落馬被跟役搶去鄭曼得等卽至總督衙署用火燒然大門因闢

鎖嚴密不能撲入順赴都司袁貴公寓放火搶奪
後復折至總督箭道門外吶喊攻撲聽見門內鎗
響鄭曼得受傷倒地該犯等見有准備卽招衆逃
跑打開東門分投竄散等語又據佛大善卽馬壯
懷供稱係陝西長武縣逃徒本年八月來蘭賣卦
營生九月間鄭曼得向伊言稱都司袁貴不令攬
做軍火麻繩及總督裁汰老兵補給四川人糧缺
心懷不平又言河州人馬逢樂竒門甚高並朱金

鎗狗兒等武藝俱好現有劉永慶是紫微星臨凡
意欲輔助舉事藉報私忿將伊作為軍師卜算吉
凶該犯允從後時相商議嗣為擇期十一月初六
日亥時起手暗製令旗符帖等物屆日該犯手持
帥令各旗五杆隨同鄭曼得等放火殺人攻撲總
督箭道門滋事當因鄭曼得被鎗打斃同衆逃出
東門卽被官兵追獲至旗上所用係鄭曼得圖記
不識篆刻何字現藏何處亦不知悉餘與鄭曼年

所供無異又據劉永慶供稱年二十歲皋蘭縣人
向以報喜營生本年四月遇見素識之鄭曼得邀
伊吃飯結拜弟兄託詞未允八月鄭曼得因其父
向設車櫃約令劉永慶在櫃記賬議給勞金次日
該犯劉永慶前往鄭曼得家內款留吃飯飲酒間
鄭曼得聲稱伊會觀星象紫微星已落在西方今
相劉永慶面貌大約就是紫微現今總督裁汰老
兵袁都司又不令其攬做火繩心懷不平起意舉

事輔助紫微該犯劉永慶答以萬不敢當一分兵糧尚不能食焉有紫微之命隨即辭歸鄭曼得囑令不可散出風聲倘人知覺定不干休劉永慶回家後將鄭曼得所言向其同居繼父劉伏太告述斥其交人不正該犯劉永慶意欲出首又思鄭曼得係屬空言並無指証出首後恐其不認轉致受累是以隱忍嗣後即與疎遠十月十四日該犯劉永慶隨劉伏太並李姓張姓前赴靖遠縣與新中

武舉滕姓等家報喜直至十一月初八日始行回家卽有差役前來稱有鄭姓將伊控府隨經伊母告以本月初二三等日曾有鄭姓到門找尋數次現蒙嚴審實無同謀情事復提訊各犯所供鄭曼得等糾衆謀反各情亦與鄭曼年佛大善等供詞大畧相同 臣伏查營伍兵丁如有年老力衰之人例應隨時裁退另募壯丁補額前因 臣標應退老兵多有曾經出征著勞之輩一經離伍恐致無以

為生是以先選該老兵之子弟及其可依親屬但
得人材力量堪以入伍者均令頂補所退糧缺以
供差操藉資養贍從未聞老兵等退有怨言即現
在滋事衆犯亦并無老兵一人在內其為鄭曼得
等借詞惑衆似可概見又川省民人充補兵丁一
層緣回疆兩次軍需均經調派川兵出口征剿凱
撤後其所隨餘丁夫役留滯甘省及西路甘涼一
帶者頗多遇有兵缺往往應募經該管將備挑選

入伍現查臣標籍隸川省之兵僅有六十餘名，此外尚有山陝及河南等省之人，其甘涼固原各提鎮營兵丁內亦均有籍隸川省者，祇因向來募補兵丁但選材勇及無過犯之人，并無分別籍貫之例，是外來入伍者不僅四川一省亦非臣標一營。今鄭曼得等以之藉口倡亂，殊出情理之外。至降調都司葉昌泰，臣與其素無嫌怨，上年秋間因其規避防差，具稟挾制，經臣據實陳奏奉

旨解部審明議以降三級調用該員回甘後始則自稱
業經開復原官而又不戴用頂戴繼於接准部議
行知後又稱不足為憑臣屢次傳見欲加開導均
經託病不至正在查辦不意鄭曼年此次滋事曾
向該員告知有人為其報仇之語現雖質訊該員
據稱委不知情第鄭曼年斷非無端供吐且稱該
員由京旋蘭後鄭曼年時往伺候其滋事時所持
腰刀又稱係該員之物矧聚泉之斗母宮查與該

員住家處所相距近在咫尺豈竟毫無聞見其間情形種種可疑該員現係職官倘竟知謀不舉致令是夜釀成大患臣身固不敢惜特於

國體民生大有關係似不得不求水落石出以別虛實相應請

旨將該員葉昌泰革職先行收禁庶便飭令藩臬兩司切實質究期無枉縱至案內為首各犯均係糾結謀反製有令帥等旗剗掠軍庫放火傷官並殺傷

兵丁民人實屬罪大惡極除首先造謀之鄭曼得業經槍斃照例戮屍梟示外共同謀之鄭曼年等犯現供恐尚有不實不盡之處以及此外是否別無餘黨容再逐細審究酌留數犯俾與葉昌泰脩質其餘共謀暨脅從各犯俟審定後卽當分別按律辦理另行具

奏再省垣重地竟有謀反重案臣未能預先覺察以致乘夜滋事實屬罪無可辭惟有仰懇

聖恩先將臣嚴加議處以徹疎庸現在省垣兵民咸知
犯已全獲且是夜別無擾害之家臣復出示曉諭
均各安堵如常堪以上慰

重厘謹

奏奉

硃批此等匪徒殊堪髮指倉卒之間幸不致有傷大體
但葉昌泰必應細心嚴鞫不可輕脫另有旨諭欽此
奉

上諭楊

奏匪徒滋事拿獲審辦一摺此案甘肅皋

蘭縣匪徒鄭曼年等膽敢糾約百餘人在督署大門
持械放火撲嚷滋鬧並將查夜之都司袁貴砍傷落
馬復將該員內室焚燒經外委陳芝桂鎗斃一賊該
匪徒等畏懼逃赴東門殺傷守門兵丁蜂擁竄出旋
經官兵差役陸續追拿搜獲訊據鄭曼得供稱係挾
都司袁貴不准攬作軍火麻繩之嫌又因裁汰老兵
心懷氣忿起意糾同鄭曼年等起事復憶及都司葉

昌泰待伊有恩俱可藉此報仇訊之葉昌泰堅供委
不知情等語此等匪徒殊堪髮指倉卒之間幸不致
有傷大體但葉昌泰上年因規避防差具稟挾制部
議降調回至甘肅後經該督屢次傳見託病不至且
鄭曼年曾向該員告知有人為其報仇之語卽不得
諉為不知且鄭曼年所持腰刀又係該員之物聚眾
之斗母宮復與該員住處相近是鄭曼年斷非無端
供吐種種可疑自應徹底根究以期水落石出葉昌

奏着卽草職先行收禁交該督督同臬司伍長華親
提全案犯証與葉昌泰質對明確細心嚴鞫不可輕
脫按律定擬具奏至該督自請交部嚴議之處着候
諭旨欽此

十二月初一日

奏為遵

旨查明甘省被災勘收地方來春請借籽種口糧以資
接濟事竊臣承准軍機大臣字寄道光十四年十

月初三日奉

上諭甘肅皋蘭等二十九廳州縣被雹被水被旱已據
該督奏明辦理來奏應否接濟之處查明於封印前
奏到等因欽此仰見

皇上軫念民瘼

恩加無已實深欽感臣遵卽行司確查去後茲據藩司
色卜星額詳稱查得本年被災之各廳州縣或已
緩徵或並借冬月口糧察看民力尚可支持毋庸

再於來春借給籽種口糧外惟被災較重之靖遠
平涼隆德鹽茶秦州鎮原等六廳州縣地方瘠苦
民力未免拮据應請酌借靖遠縣來春正二兩月
口糧本色倉斗糧二千石籽種本色倉斗糧一千
石平涼縣來春正二兩月口糧折色銀一千五百
兩本色倉斗糧一千五百石隆德縣來春正二兩
月口糧本色倉斗糧三千石鹽茶廳來春正二兩
月口糧本色倉斗糧三千石秦州來春籽種本色

倉斗糧四千石鎮原縣來春正二兩月口糧本色
倉斗糧二千石所借糧石請在各該處倉貯額徵
糧內動用如額徵不敷動用常平其折色銀兩在
於司庫舊寄貯糧價款內借給散放以資接濟等
情詳請具

奏前來 臣覆查無異自應仰體

鴻慈核實奏請恭候

皇上新正加恩俟屆時奉到

諭旨卽當敬刊謄黃道行張掛仍責成該管道府委員
會同該廳州縣按戶散放並嚴察吏胥不使從中
滋弊俾貧黎均沾實惠以仰副

聖主惠愛元元有加無已之至意謹

奏

同日

奏為特參厭馬被搶疎於防緝各員請

旨分別革職議處事竊臣前接肅州鎮總兵官竇德稟

報該標孳生並收放營馬各廠俱在州屬討賴川
駐牧本年九月二十日據管理馬廠之守備岳成
等稟稱十九日夜三更時突有賊匪四五十人騎
馬持械闖入廠內將孳生並收放營馬五百八十
六匹肆搶赶走經該守備岳成等督率經牧弁兵
跟踪追捕沿途陸續追獲原馬四百零二匹尚有
未獲馬一百八十四匹內孳馬一百五十四匹右
營牧馬十二匹左營牧馬十八匹該賊匪係番子

裝束現已遠颺無踪等情轉稟到臣伏查討賴川
地方遼濶蒙番錯處該經收弁兵如果小心防範
何致厥馬被搶數百匹之多隨經批令該鎮嚴飭
守備岳成等督率弁兵勒限分投偵緝並確查究
係何處賊番及屢催去後迄今兩月有餘未據報
獲一賊且於賊番之往來出沒以及附近蒙古漢
民有無假借番子名目勾結肆搶各情亦未查明
確覆所有總理孳厥之守備岳成並管理牧放營

馬之守備、達冲阿等既不能預為防守又不能認真緝捕致賊不全獲賊匪遠颺實非尋常疎懈可比若僅照例查叅疎防殊不足以示懲儆除將該處馬厰另行遴員經理未獲賊馬先行着落該員等按成分賠足數補額一面再行限緝贓賊務獲懲辦並將經收弁兵分別責革另行咨部外據甘肅提督臣齊慎揭報前來相應請

旨將總理驛廠之平川堡守備岳成卽行革職管理牧

放營馬之肅州鎮標右營守備達冲阿署左營守
備趙永伏交部議處以儆泄玩再肅州鎮總兵官
竇德係統轄之員於所屬馬厰被搶未能迅速督
緝獲犯亦難辭咎並請

勅部一併察議用肅馬政謹

奏奉

上諭楊 奏叅厰馬被搶請將疎於防緝各員分別

革職議處一摺肅州鎮標孳生牧放營馬各厰突被

番裝賊匪肆搶雖經該守備岳成等督率弁兵跟蹤
追獲尚有未獲馬一百八十四匹迄今兩月有餘未
據報獲一賊且於賊番肆搶及有無附近民人假借
番子名目勾結各情亦未查明確覆實非尋常疎懈
可比總理孳廠之平川堡守備岳成着卽革職管理
牧放營馬之肅州鎮標右營守備達冲阿署左營守
備趙永伏俱着交部議處肅州鎮總兵竇德於所屬
馬廠被搶未能迅速督緝亦難辭咎着一併交部察

議以示懲儆所有該處馬厰着該督另行遴員經理
其未獲贓馬先行着落該員等按成分賠足數補額
仍勒限緝拿贓賊務獲懲辦毋稍疎縱該部知道欽
此

是年五孫烜生國楨出

道光十五年乙未七十六歲

正月初六日

奏為遵

旨覆審定擬事竊照上年十一月初六日夜甘肅省城
突有匪徒鄭曼年等糾結謀反放火傷官滋事經
臣標外委陳芝桂將首犯鄭曼得立時鎔斃復經
臣督飭地方文武將首從各犯全行拏獲訊明大
概供情據實具

奏於十二月二十一日奉

硃批此等匪徒殊堪髮指倉猝之間幸不致有傷大體
但葉昌泰必應細心嚴鞫不可輕脫另有旨諭欽此

同日奉到道光十四年十二月初三日內閣奉

上諭楊 奏匪徒滋事掣獲審辦一摺此案甘肅皋

蘭縣匪徒鄭曼年等膽敢糾約百餘人在督署大門
持械放火撲嚷滋鬧並將查夜之都司袁貴砍傷落
馬復將該員內室焚燒經外委陳芝桂鎗斃一賊該

匪徒等畏懼逃赴東門殺傷守門兵丁蜂擁竄出旋經官兵差役陸續追拏搜獲訊據鄭曼得供稱係挾都司袁貴不准攬作軍火麻繩之嫌又因裁汰老兵心懷氣忿起意糾同鄭曼年等起事復憶及都司葉昌泰待伊有恩俱可借此報仇訊之葉昌泰堅供委不知情等語此等匪徒殊堪髮指倉猝之間幸不致有傷大體但葉昌泰上年因規避防差具稟挾制部議降調回至甘肅後經該督屢次傳見託病不至且

鄭曼年曾向該員告知有人為其報仇之語即不得
諉為不知且鄭曼年所持腰刀又係該員之物聚眾
之斗母宮復與該員住處相近是鄭曼年斷非無端
供吐種種可疑自應澈底根究以期水落石出葉昌
泰著即革職先行收禁交該督督同臬司伍長華親
提全案犯證與葉昌泰質對明確細心嚴鞫不可輕
脫按律定擬具奏至該督自請交部嚴議之處著候
諭旨欽此臣伏查此案前經臣派委藩司色卜星額

新任臬司伍長華督率委員蘭州府知府陳士楨等嚴密根究據實妄擬解勘去後茲據該司等詳稱查勘得鄭曼年等聚會之斗母宮地甚幽僻人跡罕至已革降調都司葉昌泰住家處所緊靠廟門東牆距鄭曼得等賃住廟房約百餘步連日隔別研審據首犯鄭曼年堅供實因伊弟鄭曼得勾結造反憶及葉昌泰待伊兄弟有恩被叅降級可借報仇於八月間向葉昌泰告知有人願替報仇

葉昌泰向阻而散質之從犯佛大善等亦俱知鄭
曼年告知葉昌泰報仇未允之事而該叅員葉昌
泰僅止供認鄭曼年曾向誑買腰刀其於鄭曼年
向告欲代報仇之語反覆推鞠狡不吐實經該司
等分別定擬詳勘前來並聲明鄭曼年等五犯情
罪重大回應決不待時惟藉詞報仇關涉臣署請
俟恭奉

諭旨再行正法等情據此臣隨提犯親加研訊緣鄭曼

年籍隸皋蘭縣與業經鎔斃之鄭曼得係同胞弟
兄向俱充當蘭州城守營馬兵鄭曼年曾於道光
六年奉派出征回疆因未得保舉心懷怨望旋於
道光十年七月內因差操未到革退名糧鄭曼得
平日攬造各營軍火麻繩借沾餘利十四年七月
間鄭曼得赴督標中營攬繩講價每斤需錢一百
五十文經該營都司袁貴同承辦之千總徐椿等
嫌價昂貴鄭曼得不服爭辯袁貴斥其為人桀驁

隨另換繩匠民人牟維信言定每斤價錢一百一十五文交該民人製辦鄭曼得自此懷忿又因各營召募兵丁向原不拘土著外籍均准投充近年甘省各營將備過有兵缺間以兩次回疆軍需川省留甘餘丁夫役中應募之人揀選充補又因臣曾飭各標營將年老兵丁隨時簡汰另補壯丁該犯鄭曼得遂藉稱裁汰老兵及川民充食兵糧係佔蘭民生路起意殺官造反藉報私仇八月初旬

先向其兄鄭曼年告述並稱已邀素好之朱金鎔
狗兒文玉馬逢樂幫助鄭曼年以其言語虛浮先
未允從鄭曼得旋邀朱金鎔狗兒及劉永慶即李
永慶至家飲酒鄭曼得捏稱善觀星象紫微星已
落在西方今相劉永慶面貌約是紫微伊願輔助
舉事之言煽惑劉永慶劉永慶答以萬不敢當一
分兵糧尚不能食焉有紫微之命隨即辭歸鄭曼
得囑令不可散出風聲倘人知覺定不干休劉永

慶曾向其同居繼父劉伏太告述意欲出首因鄭
曼得係屬空言恐其不認轉致受累是以隱忍馬
壯懷即馬義方先因寄籍陝西私雕假印犯案擬
徒發配長武縣安置於道光十四年四月內在配
脫逃捏名佛大善於八月內逃至蘭州因素曉奇
門六壬賣卦營生與鄭曼得遇談投機遂相交好
朱金鎬狗兒素習拳棒文玉向在鄭曼得之父鄭
悃賓車店幫駁馬逢樂係河南人亦解奇門六壬

先於道光十三年四月間充食蘭州城守營兵糧
與鄭曼得同營識好十四年正月馬逢樂在營告
假回籍旋因逾假革退仍回原籍河州貿易為生
九月間鄭曼得密向佛大善告知殺官謀反藉報
私忿情由並稱現有劉永慶係紫微星臨凡意欲
輔助舉事令佛大善作為軍師卜算吉凶佛大善
允從鄭曼得復糾允朱金鎔狗兒幫助遂引佛大
善朱金鎔狗兒與其兄鄭曼年見面鄭曼得誇稱

佛大善朱金鎗狗兒武藝俱好商同起事鄭曼年
因在軍營打仗未得好處以致草伍受苦並憶及
從前拔補馬兵係降調都司葉昌泰任內超拔待
伊有恩葉昌泰現被叅降級俱可借此報復遂與
鄭曼得等商定互相糾人八月內鄭曼年即以有
人欲代報仇之言向葉昌泰告述葉昌泰查問何
人鄭曼年謊稱不知葉昌泰答以此事萬不可做
如有人知情就說未曾見我而散鄭曼年復將葉

昌泰未允之語向鄭曼得佛大善等達知從此鄭
曼得鄭曼年佛大善朱金鎗狗兒時相聚會商議
鄭曼得又先後向素好之文玉張順告知反謀糾
允相助因事關重大不敢輕易吐露未能多糾黨
羽十月內鄭曼得將馬逢樂誘至省城邀與佛大
善同往告知謀反殺官情由令其入夥囑擇起手
日期馬逢樂畏懼不允鄭曼得再三相脅馬逢樂
懼禍勉擇十一月十一日夜間起手鄭曼得遂設

謀是日夜間先囊脅貧民搶劫軍庫裝作兵丁造
反放火將總督衙門燒然乘機殺官誣賴救火兵
丁殺害官長在伍之人俱無生理誘脅衆兵隨順
再殺衆官佔據省城共圖富貴即或各兵不從爾
時合城慌亂無人追究儘可逃避鄭曼年等俱各
稱善馬逢樂希圖免累於擇日後旋即潛回河州
鄭曼得因馬逢樂不辭而去心生疑慮並以十一
日夜有月光復令佛大善另擇初六日亥時起事

迨十一月初三日鄭曼得因城內山子石地方有
斗母宮一所地基幽僻先向住持道人胡本太誑
稱造製麻繩賃住廟內第三院空房胡本太信實
租給是日鄭曼得與佛大善移居廟內佛大善因
其見戲班扮演軍師凡過行軍均係執旂指麾遂
與鄭曼得製造紅綢小旂五杆一寫帥字四寫令
字鄭曼得並於旂上墨鈐天海二字圖記未向各
犯告知取義嗣鄭曼得鄭曼年朱金鎊狗兒共湊

器械十件陸續運藏廟內初六日鄭曼年因無利
械知葉昌泰素有好刀隨往見葉昌泰聲稱有人
不惜重價欲買好刀葉昌泰因乏度用即將腰刀
一把交給售賣鄭曼年誑刀入手持赴廟內維時
朱金鎗狗兒糾來預知反謀之陳棋娃子晏朶黑
子二犯同文玉張順相繼至廟鄭曼得復設法先
後誘引不知反情之素識營兵詹學恩繩匠尹悃
伏並負苦貧民陸棕法魏廿年子瓦家九兒趙義

鳳王九個子及不知姓名六人至廟分別圈入空
房給與飲食持刀堵門不容出入至三更時鄭曼
得設立香案放出衆人告知殺官造反逼衆同赴
北門糾人入夥如有不從即先殺斃詹學思等畏
懼勉從佛大善寫就表文內稱祈奏上蒼衆弟兄
聚會體天行道解愚化賢能成者眼目明亮不能
成者眼目昏花不然獲罪於天無所禱也等語當
將表文燒化焚香禱祝各飲符酒並散給衆人符

帖各一紙編入髮內誑稱可得神助鄭曼得手執
蠻刀身背烏鎗鄭曼年朱金鎗狗兒等八犯分攜
刀矛鞭棍佛大善手執紅旂五杆魏甘年子等或
帶麻繩或係徒手共二十一人同時出廟迨出門
後詹學思尹愾伏文玉張順陸棕法及不知姓名
六人俱各畏懼落後逃逸鄭曼年等十犯潛至北
門經守門弁兵知覺喊問鄭曼年鄭曼得朱金鎗
狗兒晏朶黑子四犯各用刀矛將弁兵砍戳致傷

砸斷門鎖擁入米文城等開設住宿窮民乞丐店
內轟起窮民乞丐聲言城內營兵造反脅令盡數
跟隨往搶財物如不依從定即殺死隨將貧民陸
原娃子等九十餘人裹脅隨行鄭曼得慮有散逸
令魏甘年子等持繩攔住後路隨齊赴督標軍裝
庫鄭曼得打開庫門砍傷守庫兵丁搶得號衣兵
械分給衆人穿戴裝作兵丁鬧事希圖煽惑衆心
路經筆帖式額爾精爾署前該筆帖式先因聞鬧

遣令家丁劉福等三人出視適遇該匪徒等紛至
劉福等向問鄭曼得即用力將吳升劉升砍傷劉
福被陳棋娃子砍斃該匪徒隨撲至大街適遇中
營都司袁貴查夜見而喝問鄭曼年首先刀砍袁
貴胎膊等處受傷落馬經跟役搶護救去時被脅
貧民逃散大半僅止陸朶娃子等三十九人未經
逸去鄭曼得隨率衆齊至臣署轅門抬開西柵欄
適外委國生榮見而查問即被鄭曼得戳傷暈倒

鄭曼年隨取身帶火藥一包與朱金鎗狗兒陳棋
娃子晏朶黑子在於頭門放火喝衆吶喊攻撲因
見二門關鎖嚴密不能撲入復率衆順至都司袁
貴公寓攻門進內時袁貴未經回署其家屬已由
牆缺避出鄭曼得隨帶鄭曼年朱金鎗狗兒晏朶
黑子陳棋娃子即在上房放火焚燒復折至臣署
箭道門外吶喊攻撲意欲奪門而入適臣在箭道
查看門垣守備吳珍把守柵門隨令放鎗轟擊經

外委陳芝桂由門隙用鎗打出立將首犯鄭曼得
打斃鄭曼年因見首犯已死內有準備即招呼匪
衆奔逸臣復傳令放鎗開門適臣標將備富興阿
等均各帶兵馳至鄭曼年等畏懼竄赴東門殺傷
守門弁兵打落門鎖擁出臣隨派令文武兵役將
首從各犯及脅從貧民等陸續全數挈獲當交藩
臬兩司訊明大概供情奏奉

諭旨交臣督同嚴鞫各供前情不諱臣查該匪徒等敢

於省垣重地勾結造反蓄謀數月自應多糾夥類
且是夜劫庫放火殺傷官兵聲勢頗衆恐此外尚
有餘黨事敗隱伏情弊連日飭司隔別嚴訊據各
犯僉供因慮事機敗露不敢向人輕吐是以未能
多糾與黨其葉昌泰預知報仇一節提訊各犯堅
稱該叅員實止與聞報仇之語並不知有謀反重
情鄭曼年所執腰刀亦稱係向該叅員誑得並非
知情故與而質之葉昌泰僅止供認鄭曼年是日

曾向詐買腰刀其鄭曼年向告有人願代報仇之
語已據衆供確鑿乃該叅員狡不供吐自應分別
擬結此案鄭曼得鄭曼年因挾都司袁貴不令攬
造麻繩及出征未得保舉私忿胆敢妄談天象捏
稱劉永慶係紫微臨凡勾結謀反藉口裁汰老兵
及川民充補兵額為辭糾衆放火殺官妄冀佔據
省城共圖富貴是夜敢於劫庫殺人焚署傷官實
屬罪大惡極應按律問擬鄭曼得鄭曼年均應照

謀反大逆律凌遲處死鄭曼得業經鎔斃仍判屍
梟示佛大善即馬壯懷朱金鎗狗兒陳棋娃子即
陳玉娃子晏朶黑子四犯均各預聞反謀甘心順
從或妄稱軍師焚表畫符製旂招麾或輾轉勾結
戕殺兵民隨同放火均屬同惡相濟馬壯懷等四
犯均應照謀叛已行律各擬斬立決查鄭曼年馬
壯懷等五名均係決不待時之犯例得恭請

王命先行正法惟據藩臬兩司會詳該犯等藉詞報仇

焚燒衙門皆係關涉臣署請俟奉

旨後再行正法臣因事涉嫌疑既據該司等詳議應請

恭候

諭旨再行辦理文王張順即張二二犯預知謀情臨時
懼避馬逢樂一犯被逼擇日旋即潛逃魏甘牟子
即甘牟子瓦家九兒趙義鳳王九個子四犯先雖
被脅隨行迨至首犯放火攻門時明知造反輒敢
幫同吶喊均屬不法以上七犯應照謀叛知而不

首律杖一百流三千里從重發遣各該犯生長甘
省密邇新疆應請發往吉林黑龍江給披甲人為
奴陸朶娃子張九九子梁泳得岳九九子張全劉
喜陸根根子即陸潮相馬文秀王升柴法旺劉伏
個子王喜成子張丁丁子張祿娃子張得得子袁
俊青潘有全張玉誠康智良黃曾伏子孫陳東兒
潘明志司吉慶子郭三娃子趙虎虎子王玉郭正
侯殿范金魁楊得管伏子李三郭恆太王伏娃子

張成孫老娃子郭立太賈斌唐起成三十九犯雖
係被逼同行均有不合除管伏郭立太郭正三犯
業已病故外其餘三十六犯應與並不知情租給
廟房之胡本太均請於魏廿年子等遣罪上量減
一等各擬杖一百徒三年劉永慶即李永慶聞鄭
曼得捏稱紫微即荅以萬不敢當欲行出首又慮
無據中止核與知情不首有聞第不能早自首告
亦請於遣罪上減一等杖一百徒三年到配各折

責安置已革降調都司葉昌泰於是日鄭曼年詐
取腰刀訊非知情惟當告知報仇始雖阻擋終於
匿不舉發現在不獨鄭曼年供指正明即佛大善
朱金鎬狗兒亦均稱知曉實為衆供確鑿乃該叅
員堅不承認明係畏罪狡飾未便因其抵賴即從
輕脫第鄭曼年告知報仇係屬空言迨後結謀造
反似非其意計所及核其情事應照謀反知未行
而不首者杖一百徒三年律擬杖一百徒三年到

配折責充徒鄭曼年之父鄭愾賓律應緣坐依例
發極邊足四千里充軍鄭曼得之妻馬氏鄭曼年
之妻祿氏同幼子鄭招雄子應遵照嘉慶十八年
奏定章程發福建廣東等處給駐防官員為奴陳
棋娃子之父陳大任例應緣坐發極邊足四千里
充軍惟該犯年逾七十應照律收贖詹學思尹愾
伏陸棕法始被誘逼暫從出門後均各躲避並未
從逆應與倉猝聞變之店戶許雲米文城孫士玉

均免置議先被脅旋即逃避之不識姓名人並免
查究再此案地方文武均有失察之咎惟查臬蘭
縣知縣黃璟於初六日三更以後巡夜至東街當
有陸棕法攔輿投首該縣黃璟隨赴臣衙門稟報
旋即會營並同蘭州府差役即將案犯分投全獲
辦理尚屬迅速所有地方文武失察職名可否免
議之處出自

聖恩謹將全案供招繕冊咨部謹

奏奉

上諭楊

奏覆審匪徒滋事分別定擬一摺此案甘

肅皋蘭縣匪徒鄭曼年等挾都司袁貴不令攬造麻
繩及出征未得保舉私憤並藉口裁汰老兵及川民
充補兵額為詞胆敢於省垣重地糾眾滋事焚署傷
官實屬罪大惡極鄭曼年著即凌遲處死鄭曼得業
經鎗斃仍著剉屍梟示佛大善即馬壯懷朱金鎗狗
兒陳棋娃子即陳玉娃子晏尕黑子四犯均屬同惡

相濟著照所擬斬立決即行正法餘著刑部議奏楊
著交部議處其失察之地方文武各官著一併
查取職名交部議處臬蘭縣知縣黃璟於匪徒滋事
時巡夜聞知立即稟報旋即會營帶同差役將案犯
分投全獲辦理尚屬迅速惟未能先事覺察究有不
合仍著交部察議欽此

初十日

奏為臣精力漸衰舊疾復發懇情籲懇

天恩俯准開缺回籍調理恭摺奏

聞事竊臣邊省庸愚行間効用厯荷

三朝厚澤洊邀五等崇封又復

異數特膺由武臣而畀以總督重任節制兩省凡人臣
難觀之殊榮實臣獨邀之

曠典方念捐糜頂踵不足以仰荅

高深又何敢自外

生成妄有丐閒之請惟緣臣二十五歲從戎自石峯堡

以迄西口軍需無不在事馳驅而苗疆教匪一役
自乾隆六十年以至嘉慶十一年始終其事露處
者十有二年以致兩腿積受潮溼時作痛楚從前
年力壯盛尚可支持現已年近八旬精力漸衰閏
時舉發艱於拜跪乘騎查陝甘總督統轄兩省控
制番回兵數衆多甲於各省在在均關緊要臣以
一介武夫膺茲重任即倍矢勤慎尚虞覆餗矧以
病軀供職益恐精神照料不周設有貽誤負咎匪

輕敬念夙蒙

皇上天地父母之恩自無不可達之下情雖惟疾之憂

深恐上軫

聖慮而不能者止自應仰乞

矜全用敢據實籲懇

天恩俯准開缺迅賜

簡放俾臣得以回籍調理免致曠誤實荷

仁施於無既臣自傷蒲柳早衰駑駘力盡犬馬戀

主之忱名言莫罄值此桑榆暮景得與鄉民野老共樂
昇平則此後有生之年皆

聖主再造之日也謹此繕摺具

奏伏乞

皇上訓示臣不勝惶悚待

命之至謹

奏奉

上諭楊

奏精力漸衰舊疾復發瀝情懇恩開缺回

籍調理一摺楊

起自行間歷事

三朝自少壯從戎每過軍書旁午無不在事馳驅忠勇嚴
明深嫻韜畧功勳懋著游邀五等之封朕御極後特
加簡擢畀以陝甘總督重任復能盡心職守於邊省
事務控制得宜訓練軍實整肅官方實力實心不避
嫌怨老成威望中外皆知實朕心膂股肱之臣茲因
年近八旬舊疾舉發瀝情籲懇開缺調理若重違所
請朕心實有不忍楊 著准其開缺俟瑚松額到

任交代後即緩程來京陞見親加慰勞量為恩施以
榮其行且俾伊得伸瞻戀之忱屆時再令回籍息心
頤養優游林泉以示朕優待勲臣眷念無已至意欽

此

十二日 先妣田太夫人壽終於蘭州署

二月二十日

奏為叩謝

天恩事竊臣前因年力漸衰舊疾復發據實

奏懇開缺回籍調理以免曠誤欽奉

諭旨一道臣跪讀之下感激涕零莫能名狀伏念臣夙
事戎行繼膺疆任歷荷

三朝厚澤濫叨五等崇封草木有知亦抱向陽之願駕駘

雖老詎無戀

主之心祇因任重

恩深寸長未效不敢以衰軀供職自蹈愆尤是以不得
已籲懇解組免致誤公循省寸衷正深悚仄乃蒙

皇上俯准下情

曲加獎注許其旋里俾免詣於夜行仍令趨
朝獲再邀夫

晝接是則車懸七十本人臣致仕之常何期

眷渥

九重創今古歸田之格

矜全終始

寵遇高深臣自顧何人沐斯

曠典捐糜難報心骨皆驚現在趕緊調治腿疾一俟瑚
松額到任交代後即當謹遵

恩旨趨叩

天顏趁茲蒲柳未凋幸遂就瞻之夙悃竊感桑榆已迫
永矢啣結於餘生臣感激欣幸下忱謹先恭摺叩

謝

天恩謹

奏

五月初八日抵京

陸見奉

上諭本年正月間揚

因年近八旬舊疾舉發懇恩

開缺回籍調理朕不忍重違所請降旨准其開缺諭

令緩程來京陸見親加慰勞俾伸瞻戀之忱茲到京

陸見朕於召對時見其康強矍鑠神明不衰篤念功

勲倍深嘉悅揚

自乾隆年間以武舉効力戎行

每遇軍務無不在事馳驅身經百戰歷事

三朝懋著勲勤渥承恩眷前於嘉慶年間平定滑城賊匪

仰蒙

皇考仁宗睿皇帝賞給二等男爵紫禁城騎馬旋晉一等
男爵朕御極後賞加太子少保銜並賞戴雙眼花翎
嗣因克復回疆四城晉加太子太保銜加恩賞用紫
纁特擢陝甘總督重任八年以來於邊疆事務控制
得宜訓練軍實整肅官方盡心職守老成威望中外
皆知恪共忠蓋實國家股肱心膂之臣允宜特沛恩

施以昭殊眷揚
著加恩晉封一等侯爵在籍支
食全俸俾得頤養林泉以示朕優待勲臣寵眷有加
至意連日迭蒙

召見

溫綸獎勞並蒙

恩賞

御製紫光閣畫像贊一軸及人葭服物又

賜以

御書詩扇詩曰元勳入覲允歸榮功立才全際太平宣

力

三朝邀寵錫抒忠百戰播威名官兼文武真難邁志篤廉

明永不更晉爵酬庸延後世林泉頤養話長生

二十二日

陞辭後出京七月朔回籍恭摺叩謝

天恩

皇上於摺尾當於辛丑歲赴京恭祝六旬

萬壽句旁

硃批轉瞬即可面晤也卿其善為調攝不勝戀戀之至

道光十六年丙申七十七歲

十一月十九日奉

上諭予告陝甘總督楊

馥歷中外宣力

三朝朕每軫念勲勞渥加眷注本月四川總督鄂山來京

陛見經朕詢問揚

在籍頤養安和精神矍鑠甚

為欣慰朕特親書福壽字二方並頒發內府人葭十

兩著鄂山帶回賞給楊
祇領以遜休祥其子前
任河南巡撫楊國楨因丁母憂在籍著於服闋後迅
即來京候朕簡用以示優待蓋臣有加無已之至意

府君望

闕叩頭祇領二十日恭摺叩謝

天恩

道光十七年丁酉七十八歲

二月二十日奉到發回謝摺於摺內詣直視如手

足腹心向旁

硃批誠然 府君入春來偶患微疴自奉到

批摺後病勢日增因命繕寫遺疏恭閱一過於二十八
日寅時壽終正寢遺疏交四川總督鄂公山代奏
五月初七日奉

上諭予告陝甘總督楊 自乾隆年間以武舉効力

戎行每遇軍務無不在事馳驅身經百戰歷事

三朝懋著勲績前於嘉慶年間平定滑縣賊匪仰蒙

皇考仁宗睿皇帝賞給二等男爵紫禁城騎馬旋晉一等
男爵朕御極後賞加太子少保銜並賞戴雙眼花翎
嗣因克復回疆四城晉加太子太保銜賞用紫纒由
提督擢任陝甘總督於邊疆事務控制得宜老成威
望中外皆知恪共忠盡實為國家股肱心膂之臣前
年因年近八旬舊疾舉發懇請開缺回籍調理朕不
忍違所請特命來京陞見追念勲勞加恩晉封一等
侯爵准其回籍支食全俸用昭優眷上年冬間四川

總督鄂山來京陛見朕特親書福壽字二方頒發內
府人復十兩令鄂山帶回祇領方冀頤養林泉永膺
祉福茲聞溘逝悼惜難堪披覽遺章不禁垂淚楊

著加恩晉封太子太傅銜兵部尚書照尚書例賜
卹入祀賢良祠賞給銀二千兩在四川藩庫給發俾
得經理喪事任內一切處分悉予開復應得卹典該
衙門查例具奏伊子楊國佐著賞加副將銜所有應
襲侯爵著楊國楨承襲服闋後即來京陛見以示朕

優卹勲臣有加無已之至意

禮部議請祭奠如例

賜諡忠武

恭錄

諭祭文

維道光十七年歲次丁酉 月朔越 日

皇帝遣官

諭祭於予告陝甘總督晉贈太子太傅一等昭勇侯楊

之靈曰朕惟人臣戮力宣勤偉績克彰於中外
國家酬庸錫羨殊恩無間夫初終撫薄海之永清猶
思壯烈驚大星之忽落倍切軫懷考厥彝章式頒奠
醑爾晉贈太子太傅銜兵部尚書予告陝甘總督一
等侯揚 果毅夙成韜鈴素裕由武科而選入行
伍遇軍務必任以馳驅始奮跡於金川旋立功於闕
海掃氛稜於川西楚北息烽燧於陝右甘州仕歷

三朝乃心罔不在王室身經百戰其力足以敵萬人往者

大河之濱屬有么魔之警公然羣盜憑地險以據堅
城曾不十旬申天討而擒巨寇我

皇考褒其忠勇爵秩頻加暨朕躬獎爾勲勞宮銜遞晉入
禁城則鸞鑣示寵錫羽翠則貂珥增華瓊佩頻頒恩
綸疊沛值回疆之不靖率勁旅以邁征援柁墨水之
津熊羆電擊卷甲黃砂之磧鵝鶴雲屯一鼓而前四
城立復超丹陛而特申慰勞賜紫纒而倍示恩榮爰
謀重鎮於邊陲俾建高牙於專閫威聲峻望不愧股

肱心膂之臣武緯文經正資屏翰城垣之寄乃以劬
勞致損陳乞孔殷朕曲體蓋私勉從籲請遂爾瞻戀
闕廷之志許覲天顏安其優游林泉之心准支全俸
雖山河間隔而寤寐時通會疆吏之來朝念舊臣而
存問靈葆遠賚藉資調攝於耆年翰藻親題冀迓休
祥於上壽何期篤疾遽奪遐齡披厥遺章潛焉出涕
憫虎臣之殂謝貢龍綉以褒嘉飾終之典宜崇世及
之恩斯備於戲憶蒼髯之矍鑠音容猶在目前報黃

髮以馨香眷念彌增身後靈其不昧尚克歆承

恭錄

御製晉贈太子太傅銜予告陝甘總督一等昭勇侯楊

入祀賢良祠祭文

經文緯武端資柱石之勲崇德報功首重賢良之祀

懿

三朝之碩彥典備飾終倦一代之偉人儀隆世享爾晉贈

太子太傅銜兵部尚書予告陝甘總督一等侯楊

性秉忠貞學嫻韜畧起由部伍遂宣中外之勞懋
著精勤克靖烽煙之警緬維金川杖策牙帳蜚聲闕
海援抱樓船隱渡湘江蜀棧辛勤旅以馳驅洸水秦
關奮壯猷於步伐迺返轂函之旌旆迅除兗豫之櫓
櫓爰循胙土之文班躋蒲璧俾策禁城之騎寵竒雕
鞍我

皇考既疊沛隆施逮朕躬復丕嘉偉績紫泥三錫特晉宮
銜翠羽重圓聿彰璪飾洎予回疆傳檄遺孽跳梁任

重師干謀資參贊越水山之險阻帳擁貔貅揚沙漠
之聲靈陣驅鵠鷲四城克復萬里凱旋開煙閣以圖
勲丹毫煥采控花驄而增色紫綬分輝畀以封疆謂
長城之可倚膺茲節鉞宜專閫之攸隆乃以百戰身
經艱辛備歷八旬年近籲請彌殷諒彼林泉頤養之
心遂其殿陞瞻依之志彤墀晝接通侯分崇等之封
綠野春長全俸詔太倉之糈咨興居於疆吏宸翰遙
頒冀衣食以延齡靈葆特賜不謂老成凋謝永閔風

猷勲舊淪殂難禁雪涕沛思綸以延賞崇祀典以酬
庸於戲功烈昭垂式煥旂常之色忠誠並著允邀俎
豆之馨渥爾寵榮尚其歆格

恭錄

御製晉贈太子太傅銜予告陝甘總督一等昭勇侯楊

碑文

朕惟睠舊人而圖政鷹揚昭圭璧之勲思元老以壯猷
彪炳飾鐘彝之典予嘉乃績孚心膂於九重世選爾

勞將爪牙其十萬爰勒翠珉而不朽永垂青簡以彌
光爾晉贈太子太傅銜兵部尚書予告陝甘總督一
等侯揚 英毅挺生蓋忠懋著惟光明於上下用
邁相我國家角藝超羣登乙科而待膺甲選顏行就
伍練丁壯而卽佐辰猷騰跡金川蜚聲玉壘八閩電
掃蚺江之旌旆齊飛三省星羅鶴陣之鉦鏡迭奏秦
關四塞投鞭而徼漠氛銷蜀棧千盤負弩而撓櫜稜
熄芭葉山下荆旅哀殘蘭草坪中黔苗竄伏都尉增

其世職倅熾而昌勁勇肇以嘉名有加則賜鈿刀鏤
帶近陪豹尾之班瓊佩瑤筐備獎龍韜之畧既而豫
東會勦復由陝右遄馳籌勝算以臨衝全憑一炬殲
渠魁而報捷未及十旬汴水甫靖夫戈鋌南山更援
夫枹鼓榮加黃褶推

恩直許同心禁曳青驄懋賞尤稱巨擘我

皇考嘉其速歲男爵遞封暨朕躬眷彼多勲宮銜特晉纓

飄翠羽舒眼纈以重圓服拜

龍綸被身章之

遺澤有蜂屯之蒲類忽蟻聚於花門釁生疏勒之疆蠢動
祁連之域備塵宵旰遠度戎機夙秉公忠俾資參贊
四城立復渾巴什之河道爭先一軍皆驚柯爾坪之
回莊頓潰恭行天罰績本邁於無前顧畏民碧策更
周於善後丹宸特申溫慰恰值凱旋紫纒用示優崇
倍隆勲眷偃脩共濟早儲節愷之權揆奮咸宜遂重
巖疆之守褒功論賞開紫閣以圖形錫福延釐介絳

年而益壽膺

三朝之簡畀文武兼資寄兩世之封圻後先濟美乃以桑
榆景迫遽興綠野之思鑒其葵藿情殷命展彤廷之
拜蓋以八旬耆碩正期倚任夫股肱繼思百戰餘齡
未忍勦勞其筋力欽亮功於篤棊階晉通侯許致仕
以稠施廩支全俸昨垂詢於疆吏仍冀祝夫遐年頤
養和神封靈復於十賚徵符吉語揮翰藻以雙題乃
平格方占而淪徂遽告覽遺章而深嘆徒想風儀溯

偉烈以軫懷難禁雪涕殊思渥沛卹典崇頌增加宮
傳之銜厚賜庫鏐之帑賞既延於似續榮更逮夫幽
潛馨入靈祠炳千秋之秩祭名貞介石賜兩字以垂
褒綜厥生平諡之忠武於戲穹碑日麗永懷黃髮於
邊陲寵綍雲緘庶鑒丹心於泉壤昭茲來許尚克欽
承

道光十八年九月署四川總督蘇公廷玉題請入
祀崇慶州及成都省城鄉賢祠奉

上諭已故陝甘總督楊 歷事

三朝身經百戰勤勞懋著功在旂常前已加恩入祀賢良
祠著准其入祀鄉賢祠無庸再交部議

道光十九年 月 日 葬於崇慶州娘娘岡祖塋

之右

